

O LE EKALESIA A IESU KERISO O LE AU PAIA O ASO E GATA AI • IUNI 2016

# OLe Liahona



**Auala e Faamanuia**

**Ai e Tama Olaga o a  
Latou Fanau, i. 4, 10**

Faifeautalai i lapani, Epikopo  
Pulefaamalumalu, Apostolo Fou:  
Elder Gary E. Stevenson, i. 14

Auala ua Toefuatai Mai  
ai e le Tusi a Mamona le  
Vaaiga Faaleagaga, i. 20

14 O Fesili Na Taliina e uiga i le  
Olaga pe a mavae le Oti, i. 32



*"O le a latou lē fia aai pe fia feinu, pe taia foi i latou i le vevela po o le la; ona o ia o lē ua alofa mutimutivale ia te i latou o le a taitaiā i latou, o tafatafa lava o puna o vai o le a taitaiā atu ai e ia i latou."*

1 Nifaae 21:10



## O SAVALI

- 4** **Savali a le Au Peresitene Sili: O Lo Tatou Tama, o Lo Tatou Fautua**  
Saunia e Peresitene Dieter F. Uchtdorf  
**7** **Savali a Faiaoga Asiasi: Sauniga ma Feagaiga o le Malumalu**

## TALA FAAALIA

- 14** **Elder Gary E. Stevenson: O Se Loto Malamalama**  
Saunia e Elder Robert D. Hales  
*O Elder Stevenson e auauna atu ma se loto e malamalama i uunaiuga a le Agaga, i faamanuiga o le Togiola a le Faaoala, ma le mafai e le Ekalesia ona faamanuia i latou o e matitiva.*  
**20** **E Faapupulaina Mata o E ua Tauaso**  
Saunia e Elder Lynn G. Robbins  
*O le Tusi a Mamona o se molimau lona lua ia Iesu Keriso ma Lana talalelei matagofie.*

## 26 o Vavega Alofa e Fitu i le Ala

Saunia e Ephrem Smith  
*O lau malaga mai ni amataga faatauvaa o se tamaititi matuaoati i le auauna atu i le Alii o se faifeautalai sa leai se mea na ese ai o se vavega.*

## 28 O Mai, Mulimuli Mai la te Au: Aoaoina o Mea Faavae i le Aiga

Saunia e Alicia Stanton ma Natalie Campbell  
*Manatu mo le aoaoina o autu faalemasina a le autalavou o se aiga.*

## 32 O Le A Le Mea ua Tatou Illoa e uiga i le Olaga pe a mavae le Oti?

Saunia e David A. Edwards  
*E mafai ona tatou fesoasoani e tali fesili a isi e uiga i le olaga pe a mavae le oti, ona o upumoni manino ma pele o le talalelei toefuataiina.*

## 36 O Le Oo i se Liliuga o le Loto

Saunia e Elder Edward Dube  
*Ina ua mai le ma tama teine, sa ou iloaina sa manaomia ona matuai liua lou loto e pei lava ona sa faia e Alema.*

## MATAGALUEGA

- 8** **O Le Mea Tatou Te Talitonu I Ai: Tatou te Talitonu i le Mulimuli i le Perofeta**  
**10** **O Tatou Aiga, O Tatou Auaigna: O Le Faataitaiga Alofa a Lou Tama**  
Taofia le igoa  
**12** **Musika: O Mai ia te la**  
Saunia e Theodore E. Curtis ma Hugh W. Dougall  
**40** **Ataata: Hurei!**  
Saunia e G. Craig Kiser  
**41** **Auaunaga i le Ekalesia: E Lei la i Lau Vaavaiga!**  
Saunia e Brett J. Porter  
**42** **O Leo o Le Au Paia o Aso e Gata Ai**  
**80** **Seia Tatou Toe Feiloai: O Le A ma le Aisea ma le E Faapefea o le Tuuina Atu o se Molimau**  
Saunia e Peresitene Spencer W. Kimball

## I LE FAAVAA

Luma: Ata na pueina e Cody Bell. I totonu o le faavaa pito i luma: Ata na pueina e iStock/Thinkstock. I totonu o le faavaa i tua: Ata na pueina e Leslie Nilsson.



46

**46 Filiga ma le Avea ma Soo**

Saunia e Elder David F. Evans

*Tatou te manaomia le filiga ina ia avea ai ma soo moni o le Faaola, ma ia ausia ai sini lelei moni ua silafia e lo tatou Tama Faalelagi e manaomia ona tatou ausia e saunia ai mo le faavavau.*

**50 Siamupini mo le Sapati**

Saunia e Samantha McFadyen

*O le filifiliga e a matou lava: a le o le taatalo i le Aso Sa ma taumafai ia avea ma siamupini a le atunuup, po o le lafoai le taaloga ae tausia le paia o le aso Sapati.*

**52 O Le Vaega Aupito Faigata o le Avea ma se Faifeautalai**

Saunia e Wendy Ulrich

*Ua e fatauina le Tusi a Mamona ma le Talai Lau Talalelei. Ae e te le iloa le auala e talanoa atu ai i tagata ese ma feagai ma le teena-inia? Toe faaleleia nisi o tomai o le a mautinoa lava lou manaomia o se faifeautalai.*

**57 O La Tatou Avanoa****58 Mai le Galuega Faamisiona: O Se Agaga o Loo Tagi Mai**

Saunia e Stephen Dugdale

*Sa foliga mai e le o se tagata faaou, e le faigofie ona fai atu i ai se tagata, ma e pei e taufaafese. Ae o le mea moni, o ia o se tagata o loo manaomia ni tali e faavavau.*

**61 Tali mai Taitai o le Ekalesia: Auala e Fesoasoani ai i Faifeautalai**

Saunia e Elder David A. Bednar

**62 Fesili & Tali**

*E palauvavale ou matua, faalogo i musika malomaloa, ma matamata i ata le talafeagai o le televise. O le a se mea e mafai ona ou faia ia lagonaina ai le Agaga i le fale, ae maise lava i aso Sa?*

**64 Auala e Avea Ai ma se Uo Lelei**

Saunia e David Morales

*Tatou te mananao uma lava i ni uo. O nisi nei o auala e fai ai ni uo lelei ma avea ai foi ma se uo lelei.*



76

**66 O Tamaiti E Tutu Maualuluga: Tu mo le Mea Tonu**

Saunia e Aysia Tan

**68 O Le Paga Suesue a Ionatana**

Saunia e Kirstin Ide

*Sa lei iloa e Ionatana le mea e fai e aunoa ma lana paga duesue. Ona maua ai lea o sona manatu!*

**70 O Le Ofutau Atoatoa o le Atua**

*O a ni mea e mafai ona e faia ia saogalemu ma fiafia ai lou agaga?*

**72 O Tali mai se Aposteto:**

**O a folafolaga tatou te faia i le papatisoga?**

Saunia e Elder Neil L. Andersen

**73 O La Tatou Itulau****74 Toa o le Tusi a Mamona: Sa Avea Apiso ma se Faifeautalai****75 E Mafai Ona Ou Fatauina le Tusi a Mamona****76 Tala o le Tusi a Mamona: Ua Aoao Mai e Alema le Auala e Tatalo Ai****79 Itulau e Valivali: E Mafai Ona Ou Migao**

52



O Le Lomiga Faamaonia Faa-Samoa a le Ekalesia  
a Iesu Keriso o le Au Paia o Aso e Gata Ai

**Susuga a le Au Peresitea Sili:** Thomas S. Monson,  
Henry B. Eyring, Dieter F. Uchtdorf

**O Le Korama a Apostolo e Toasefululuua:**

Russell M. Nelson, Dallin H. Oaks, M. Russell Ballard,  
Robert D. Hales, Jeffrey R. Holland, David A. Bednar,  
Quentin L. Cook, D. Todd Christofferson, Neil L. Andersen,  
Ronald A. Rasband, Gary E. Stevenson, Dale G. Renlund

**Faatonu:** Joseph W. Sitati

**Assistant Editors:** James B. Martino, Carol F. McConkie

**Fautua:** Brian K. Ashton, Randall K. Bennett, Craig A.  
Cardon, Cheryl A. Esplin, Christoffel Golden, Douglas D.  
Holmes, Larry R. Lawrence, Carole M. Stephens

**Pule Faatonuuli:** Peter F. Evans

**Faatonuuli o le Lagolago mo Aiga ma**

**Tagata o le Ekalesia:** Vincent A. Vaughn

**Faatonuuli o Mekasini a le Ekalesia:** Allan R. Loyborg

**Pule o Mea Tau Pisini:** Garff Cannon

**Pule Faatonutonu:** R. Val Johnson

**Pule Faatonutonu Lagolago:** Ryan Carr

**Lagolago o Lomiga:** Megan VerHoef Seitz

**Au Tusitusi ma Faatonutonu:** Brittany Beattie, David  
Dickson, David A. Edwards, Matthew D. Flitton, Lori  
Fuller, Garrett H. Garff, LaRene Porter Gaunt, Jill Hacking,  
Charlotte Larcabal, Michael R. Morris, Sally Johnson Odekirk,  
Joshua J. Perkey, Jan Pinborough, Richard M. Romney,  
Mindy Anne Seul, Paul VanDenBerghe, Marissa Widdison

**Pule Faatonuuli Tusiata:** J. Scott Knudsen

**Faatonuuli Tusiata:** Tadd R. Peterson

**Au Mamanu:** Jeanette Andrews, Fay P. Andrus, Mandie M.  
Bentley, C. Kimball Bott, Tom Child, Nata Gines, Colleen  
Hinckley, Eric P. Johnsen, Susan Lofgren, Scott M. Mooy,  
Mark W. Robison, Brad Teare, K. Nicole Walkenhorst

**Faatonu o le Puletaofia ma Fatufatua:**

Collette Nebeker Aune

**Pule i le Gaosiga:** Jane Ann Peters

**Au Gaosi:** Connie Bowthorpe Bridge, Julie Burdett,  
Katie Duncan, Bryan W. Gygi, Denise Kirby, Ginny J. Nilson,  
Gayle Tate Rafferty

**Tailolomi:** Jeff L. Martin

**Faatonuuli Lolumiga:** Craig K. Sedgwick

**Faatonuuli o le Tuafatufaga:** Stephen R. Christiansen

Mo le okaina o mekasini, alu i le store.lds.org po o le  
Faletusi Totuotuna i Pesega. Telefoni 64127. Totogi o le  
Mekasini: \$0.55 (Samoa) ī le kopī. Totogi mo le Tausaga  
Atoa \$6.60 (Samoa).

**Auina atu tusitusiga ma faafesili i luga o le  
initonetū i le liahona.lds.org:** pe meli mai i le *Liahona*,  
Rm. 2420, 50 E. North Temple, Salt Lake City, UT 84150-  
0024, USA; po o le i-meli: liahona@ldschurch.org.

O le *Liahona* (o lona uiga i le *Tusi a Mamona* o le "tapasa"  
po o se "faatonuuli") e lomia i le faa-Alepania, Aminia  
(Sasae), Pisilama, Palekeria, Kemupotia, Sepuano, Saina,  
Kalaotia, Siekisolovakia, Tenimaka, Take, Igilisi, Esitonua,  
Fiti, Finelani, Farani, Si'amani, Eleni, Hanikeri, Initu, Iselani,  
Initonuesia, Italia, Japani, Kiripati, Korea, Latvia, Litunia,  
Malakasa, Masela, Monokolia, Nouei, Polani, Potukale,  
Romania, Rusia, Samoa, Saina (uia faafaofigeina), Silovenia,  
Sipaniolo, Suetena, Swahili, Tagaloka, Tahiti, Tai, Toga,  
lukureini, Urutu, ma Viatename. (E eseese lava gagana.)  
© 2016 Puletaofia e le Intellectual Reserve, Inc. Ua taofia  
ai tatau ura. Lomia i le lunaitē Setete o Amerika.

E mafai ona kopī tala ma ata o le *Liahona* mo le toe  
faaaogaina i lotu po o le aiga ae ia le faia ai ni pisini. E le  
tatau ona kopī nā tala po o ni ata po afai o faasa mai i le  
laina loa tāua ai le e ona lea faatufugaga. Auina atu fesili  
e uiga i le puletaofia i le Intellectual Property Office, 50 East  
North Temple Street, Salt Lake City, UT 84150, USA; i-meli:  
cor-intellectualproperty@ldschurch.org.

**For Readers in the United States and Canada:**

June 2016 Vol. 40 No. 6. O LE LIAHONA (USPS 311)  
Samoan (ISSN 1045-0947) is published monthly by The  
Church of Jesus Christ of Latter-day Saints, 50 East North  
Temple, Salt Lake City, UT 84150. USA subscription price  
is \$10.00 per year; Canada, \$12.00 plus applicable taxes.  
Periodicals Postage Paid at Salt Lake City, Utah. Sixty days'  
notice required for change of address. Include address label  
from a recent issue; old and new address must be included.  
Send USA and Canadian subscriptions to Salt Lake  
Distribution Center at address below. Subscription help  
line: 1-800-537-5971. Credit card orders (Visa, MasterCard,  
American Express) may be taken by phone. (Canada Poste  
Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address  
changes to Distribution Services, Church Magazines,  
P.O. Box 26368, Salt Lake City, UT 84126-0368, USA.

# Manatu mo Afiafi Faaleaiga

O lenei lomiga o loo aofia ai tusiga ma gaoioiga e mafai ona faaaoga mo afiafi faaleaiga.  
O ni faataitaiga nei se lua.



## "O Le Mea Tatou Te Talitonu I Ai,"

itulau 8: O loo aoao mai i lenei tusiga,  
"Ao tatou lagolagoina le perofeta ma  
apostolo, tatou te maua se molimau ia i  
latou o ni auauna a le Atua." E mafai ona  
faateleina lau molimau i perofeta e ala i  
le faiat po o le faalogologo i lauga o le  
konafesi aoao. I le avea ai o se aiga, mafau-  
fau e faiat se tasi o saunoaga lata mai nei  
a Peresitene Monson ma filifili se vaega  
patino o lana fautuaga tou te ola ai. Ao e  
ola i mea ua fai mai ai le perofeta, taumafai  
ia iloa auala o loo faamanuiaina ai oe.

**"O Mai, Mulimuli Mai la te Au: Aoaoina  
o Mea Faavae i le Aiga,"** itulau 28: Na  
aoao mai Peresitene Spencer W. Kimball

(1895–1985), "O lo tatou manuia, taitoatas  
ma o se Eklesia, o le a tele lava ina iloa i le  
ala tatou te taulai atu ai ma le faamaoni i le  
ola i le talalelei i le aiga." Mafaufau e suesue  
o se aiga i se autu o le *O Mai, Mulimuli  
Mai la te Au* mo se masina. E mafai ona e  
suesue i vaega o le autu ua filifilia i vaiaso  
taitasi, e faaaoga ai tusitusiga paia po o isi  
mea e fesoasoani i suesuega e pei o le *Talai  
Lau Talalelei*, LDS.org, o le Taiala i Tusitusiga  
Paia, ma le *The Life of Christ Bible Videos*.  
I afiafi faaleaiga i vaiaso taitasi, e mafai ona e  
faasoatua mea ua e aoaoina ma lagona-  
ina. Mafaufau e faamaumau ou manatu  
ma lagona i se api talaaga mo suesuega ma  
faasoatua mea ua e aoaoina i au uo e ala  
i faasalalauga faaleagafesootai.

## FAAOPOOPOGA O LOO MAUA I LE INITONETI

O loo maua le *Liahona* ma isi mea e faaaoga a le Eklesia i le tele o gagana i le  
[languages.lds.org](http://languages.lds.org). Asiasi i le [facebook.com/liahona.magazine](https://facebook.com/liahona.magazine) (e maua i le gagana  
Peretania, Potukale, ma le Sipaniolo) e sue ai savali musuia, manatu mo afiafi faaleaiga,  
ma mea e faaaoga e mafai ona e faasoatua i au uo ma aiga.

## AUTU I LE LOMIGA LENEI

*E tau mai e numera le itulau muamua o le tusiga.*

**Aiga,** 10, 28, 36, 43, 44, 62

**Amio po o uiga faaalia,** 52

**Aoao atu,** 28, 43

**Aso Sapati,** 45, 50, 62

**Ata o le faaolataga,** 32, 58

**Auauna atu,** 41

**Autalavou,** 41

**Avea ma soo,** 46

**Faaipoipoga,** 28

**Faamanatuga,** 40

**Faatuatua,** 36, 46, 75

**Faauoga,** 64

**Feagaiga,** 7, 28, 72

**Filiga,** 46

**Galuega faafaifeatalai,** 52, 58, 61, 74

**Galuega faalemalumalu,** 7

**Iesu Keriso,** 12, 28, 40

**Le Atua le Tama,** 4

**Liua,** 36

**Lotomaualalo,** 52

**Malumalu,** 44, 73

**Migao,** 79

**Molimau,** 80

**Ola tutoatasi,** 28

**Papatisoga,** 72, 73

**Perisitua Arona,** 41

**Perofeta,** 8, 42, 44

**Sauniga,** 7, 28

**Sini,** 46

**Tatalo,** 12, 58, 61, 66, 76

**Togiola,** 36

**Tulaga faaletamā,** 4, 10

**Tusi a Mamona,** 20, 57, 68,  
74, 75

**Tusi Paia,** 20

**Usiusitai,** 8, 28, 70

**Vavega,** 26



**Saunia e  
Peresitene  
Dieter F.  
Uchtdorf**

Fesoasoani Lua i le  
Au Peresitene Sili

# O Lo Tatou Tama, OLO TATOU FAUTUA

**P**e na e tatalaina se atigipusa o ni vaega [o se mea faitinol], aumai i fafo faatonuga o le faapipiiga, ma mafaufau faapea, “E matuai le fetaui lava lenei mea”?

O nisi taimi, e ui lava i a tatou faamoemoega sili ona lelei ma le mautinoa i totonu, tatou te aumaia ai i fafo se vaega ma fesili, “O le a le mea e faaaoga i ai lena mea?” po o le “E faapefea ona fetaui lena mea?”

E faateleina lo tatou ita pe a tatou tilotilo atu i le atigipusa ma matauina ai se faamatalaga e teena ai le tiutetuaave o faapea mai, “E manaomia le tuufaatasia—o tai 8 tausaga le matutua ma luga atu.” Ona tatou te lei iloa lava le faiga, e le faateleina ai e lenei mea lo tatou mautinoa po o lo tatou mitamita ia i tatou lava.

O nisi taimi e i ai se tatou aafiaga faapea ma le talalei. Ao tatou vaavaai atu i nisi o ona vaega, atonu e valu o tatou ulu ma mafaufau, po o le a le mea e faaaoga i ai lena vaega. Po o le, ao tatou iloiloina se isi vaega, e mafai ona tatou iloa ai, e tusa lava pe sa taumafai malosi ia malamalama atoatoa, ae e le mafai lava ona tatou faavasegaina le mafuaaga na ala ai ona faaaofia ai lena vaega.


## O Lo Tatou Tama Faalelagi O Lo Tatou Fautua

O le mea e lelei ai, ua tuuina mai e lo tatou Tama Faalelagi ia i tatou ni faatonuga matagofie mo le faatulagaina o o tatou olaga ma tuufaatasi ai o tatou lava tagata sili ona lelei. O na faatonuga e fetaui lelei lava e tusa lava po o le a lo tatou matua po o le tulaga. Ua Ia tuuina mai ia i tatou le talalelei ma le Ekalesia a Iesu Keriso. Ua Ia tuuina mai ia i tatou le fuafuaga o le togiola, le ata o le faaolataga, o le fuafuaga lava lea o le fiafia. Na te lei tuua lava na o i tatou

faatasi ai ma le le mautonu uma po o luitau o le olaga, ma fai mai, “Ia o lea. Ia manuia. Sue le faiga.”

Afai e tau lava o le tatou onosai ma vaai ma se lotomaualalo ma se mafaufau matala, o le a tatou maua ai, ua tuuina mai e le Atua le tele o meafaigaluega ia malamalama lelei ai i Ana faatonuga uma mo lo tatou fiafia i le olaga:

- Ua Ia tuuina mai ia i tatou le meaalofa anagata o le Agaga Paia, lea e mafaia ona avea ma o tatou faiaoga patino faalelagi, ao tatou suesue i le upu a le Atua ma taumafai e aumai o tatou manatu ma amioga ia ogatasi ma Lana upu.
- Ua Ia tuuina mai ia i tatou le avanoa e 24/7 e maua ai o Ia e ala i tatalo o le faatuatua ma olega o faamoe-moega moni.
- Ua Ia tuuina mai ia i tatou aposetolo ma perofeta o aso nei, o e faaali mai le afioga a le Atua i o tatou aso, ma i ai le pule e fusifusia pe faamau ai i le lalolagi ma i le lagi.
- Ua Ia toefuataiina mai Lana Ekalesia—o se faalapotopotoga o tagata talitonu o e galulue faatasi e fesoasoani i le tasi ma le isi ao latou sailia o latou faaolataga i le matau, tetemu, ma le olioli e le faatusalia.<sup>1</sup>
- Ua Ia tuuina mai ia i tatou tusitusiga paia—o Lana afioga tusitusia ia i tatou.
- Ua Ia tuuina mai ia i tatou le anoano o meafaigaluega o tekinolosi faaonaponei e fesoasoani i la tatou sava-liga o le avea ma soo. O le tele o nei mea faigaluega ofoofogia e mafai ona maua i le LDS.org.



Aisea ua tuuina mai ai e le Tama Faalelagi ia i tatou le tele naua o le fesoasoani? Ona e alofa o Ia ia i tatou. Ma ona, e pei ona Ia fetalai e uiga ia te Ia, "Aua faauta, o la'u galuega ma lo'u mamalu lenei—ia aumaia le tino ola pea ma le ola faavavau o le tagata."<sup>2</sup>

I se isi faaupuga, o le Tama Faalelagi o lo tatou Atua, ma o le Atua o se fautua ia i tatou.

E silafia lelei lava e lo tatou Tama oi le Lagi manaoga o Lana fanau nai lo o se isi lava tagata. O Lana galuega ma le mamalu o le fesoasoani pea lava pea ia i tatou, ma tuuina mai ia ni punaoa matagofie faaletino ma faaleagaga e fesoasoani i la tatou savaliga e toe foi atu ia te Ia.

#### O Tama Uma Lava o se Fautua

I nisi o itu o le lalolagi, o tama e faamamaluina e aiga ma atunu i le

masina o Iuni. O se mea lelei i taimi uma le ava ma faaaloalo i o tatou matua. E tele mea lelei o loo fai e tama mo o latou aiga ma i ai foi le tele o uiga faaalia lelei. O le lua o matafaoi aupito ttau o loo i ai i tama i olaga o a latou fanau, o le avea lea ma se faataitaiga lelei ma se fautua. E tele atu mea e fai e tama nai lo na o le

tau atu i a latou fanau le mea sao pe sese; e tele atu mea latou te faia nai lo nao le velo atu o le tusi lesona ia i latou ma le manatu e faavasega lava e i latou le olaga mo i latou.

O tama e fautuaina a latou fanau faapelepele ma faaali atu e ala i a latou faataitaiga lelei le ala e ola ai i se olaga faamaoni. O tama latou te

#### AOAO ATU MAI LENEI SAVALI

**A**tonu e te manao e amata i le fai atu ia i latou e te aoaoina e mafaufau i se taimi na fautuaina ai i latou e le Tama Faalelagi. Ona e fai atu lea ia i latou e mafaufau i mea e tutusa ai, i le va o lena taimi ma se taimi na latou lagonaina ai le fautuaina e lo latou tama faalelalolagi. Valaaulia i latou e tusi i lalo mea e tutusa ai auala sa fautuaina ai i latou. E mafai ona e luiina i latou e taumafai e faataitai le mea na latou tusia i lalo, o se taumafaiga ia avea ma se faataitaiga lelei i isi.

le tuua nao a latou fanau, ae faanatinati atu e fesoasoani ia i latou, fesoasoani e faatutu i latou i luga i taimi uma latou te tau pauu ai. Ma o nisi taimi pe afai o le mea talafeagai lea e fai, e tuu ai e tama a latou fanau e tauivi, ma le iloa atonu o le auala sili lea ona lelei mo i latou e aoao ai.

## O Tatou Uma o Fautua

Ao faia e tama faalelalagi ia lenei mea mo a latou lava fanau, o le agaga o le fautuaina o se mea lea e tatau ona tatou ofoina atu i fanau uma a le Atua, e tusa lava po o le a le matua, nofoaga, po o tulaga. Ia manatua, o fanau a le Atua o o tatou uso ma tuafafine; o i tatou uma o le aiga faavavau e tasi.

I lenei la itu, ia avea i tatou uma ma fautua—ia naunau e aapa atu ma fesoasoani le tasi i le isi ia avea ma tagata sili e mafai ona avea ai i tatou. Ona o i tatou o fanau a le

Atua, ua i ai ia i tatou le gafatia e avea ai e faapei o Ia. O le alofa i le Atua ma o tatou uso a tagata, tausia o poloaiga a le Atua, ma mulimuli i le faataitaiga a Keriso, o le ala sao, vaapiapi, ma le fiafia lea e toe foi atu ai i le afioaga o o tatou matua faalelagi.

Afai e alofa tele le Atua o le atulaulau ia i tatou o lea ua avea ai o Ia ma fautua ia i tatou, atonu e mafai foi la ona tatou aapa atu i o tatou uso a tagata, e tusa lava po o le a o latou lanu, atunu, tulaga faaleagafesootai ma le tamaoaiga, gagana po o tapuaiga. Talosia ia avea i tatou ma ni fautua musuia ma faamanuia ai olaga o isi—e le na o a tatou lava fanau, ae faapena foi i fanau uma a le Atua i le lalolagi atoa. ■

## FAAMATALAGA

1. Tagai Galuega 13:52; Filipi 2:12.
2. Mose 1:39.

## TAMAITI

### O Le Fesoasoani a le Tama Faalelagi

**O**na e alofa le Tama Faalelagi ia i tatou, ua la tuuina mai ai ia i tatou le tele o meafaigaluega, po o meaalofa, e fesoasoani ia i tatou. Faafetaui ia meaalofa taitasi ma lona ata o loo i lalo. E mafai faapefea ona e faaaogaina nei meaalofa e faamanuia ai lou olaga ma faamanuia ai isi?



Ia suesue ma le agaga tatalo lenei savali ma saili ia iloa mea e faasoaa atu. O le a faapefea ona faateleina e le "O Le Aiga: O Se Folafolaga i le Lalolagi" lou faatuatua i le Atua ma faamanuitaina ai i latou e te tausia i faiaoga asiasi? Mo nisi faamatalaga, alu i le [reliefsociety.lds.org](http://reliefsociety.lds.org).


## Sauniga ma Feagaiga o le Malumalu

**O**sauniga uma e manaomia mo le faaolataga ma le faaeaga e i ai faatasi ma feagaiga ma le Atua. "O le osia ma le tausia o feagaiga o lona uiga o le filifili lea e noatia i tatou lava i lo tatou Tama oi le Lagi ma Iesu Keriso," o le saunoaga lea a Linda K. Burton, peresitene aoao o le Aualofa.<sup>1</sup>

Na saunoa mai Elder Neil L. Andersen o le Korama a Apostetolo e Toasefululu, "Na fetalai mai le Alii, 'O . . . sauniga ua faaalia ai le mana o le faaleatua.'

"E i ai faamanuiaga faapitoa mai le Atua mo tagata agavaa uma o e ua papatiso, maua le Agaga Paia, ma aai ma feinu soo i le faamanatuga."<sup>2</sup>

"A o alii ma tamaitai i le malumalu," na saunoa mai ai Elder M. Russell Ballard o le Korama a Apostetolo e Toasefululu, "ua faaeeina ia i laua uma le mana lava e tasi, o le mana o le perisitua . . .



" . . . E maua e alii ma tamaitai uma lenei mana e fesoasoani ai i o latou olaga. O i latou uma o e osia feagaiga paia ma le Alii ma e faamaluina na feagaiga o le a agavaa e maua faaaliga faaletagata lava ia, ia faamanuaina e ala i auauanaga a agelu, e fagatua ma le Atua, e maua le atoaga o le talalelei, ma mulimuli ane, ia avea ma suli faatasi ma Iesu Keriso i mea uma o i ai a lo tatou Tama."<sup>3</sup>

### Mau Faaopoopo

1 Nifae 14:14; Mataupu Faavae ma Feagaiga 25:13; 97:8; 109:22

#### FAAMATALAGA

1. Linda K. Burton, "O Le Mana, Olioli, ma le Alofa e Maua i le Tausiga o Feagaiga," *Liahona*, Nov. 2013, 111.
2. Neil L. Andersen, "Mana o le Perisitua," *Liahona*, Nov. 2013, 92.
3. M. Russell Ballard, "Alii ma Tamaitai i le Galuega a le Alii," *Liahona*, Apr. 2014, 48–49.
4. Tagai D. Todd Christofferson, "O Le Mana o Feagaiga," *Liahona*, Mar. 2009, 19, 20–21.

### Mafaufau I le Mea Lenei

E faapefea ona faamalosia ma faamamanaina i tatou e sauniga ma feagaiga o le malumalu?

Faatuatua, Aiga, Toomaga



### O Tala Ola

I le 2007, i le aso lona fa o aso talu ona uma se mafuie tele i Peru, sa feiloai ai Elder Marcus B. Nash o le Fitugafulu i le peresitene o le paranesi o Wenceslao Conde ma lona faletua o Pamela. "Sa fesili atu Elder Nash ia Sister Conde pe na faapefea mai si ana fanau laiti. Faatasi ai ma se ataata, sa ia tali mai ai, o le agalelei o le Atua sa latou saogalemu ma manuia uma ai. Sa ia fesili atu e uiga i le fale o le au Condes.

"'Ua leai se mea,' sa ia tali mai ai.

" . . . 'Ae o lena lava,' o le matau lea a Elder Nash, 'o loo e ataata a o tatou talanoa.'

"'Ioe,' sa ia fai mai ai, 'Sa ou tatalo ma o loo ou toofilemu. O loo ia i maua mea uma ma te manaomia. O loo ia i maua le tasi ma le isi, o loo ia i maua le ma fanau, ua faamauina i matou i le malumalu, ua ia i matou lenei Ekalesia matagofie, ma o loo ia i matou le Alii. E mafai ona matou toe atinae faatasi ma le fesoasoani a le Alii.' . . .

"O le a le mea e faatatau i le osia ma le tausia o feagaiga ma le Atua, e tuuina maia ia i tatou le mana e ataata ai e ui i faigata, e liliu ai tofotofoga i le manumalo . . . ?"

"O le pogai o le Atua. O le mafai ona tatou maua o lena mana ua ala mai i a tatou feagaiga ma la."<sup>4</sup>



# TATOU TE TALITONU I LE MULIMULI I LE PEROFETA

**E**pei o le uluai Ekalesia lea na faatuna e Iesu Keriso i le taimi o Lana galuega i le tino, o le Ekalesia i aso nei ua “atiina ae i luga o le faavae o le au aposetolo, atoa ma le au perofeta, o le maa tulimanu o Iesu Keriso lava lea” (Efeso 2:20). O loo i ai a tatou Aposetolo e toasefululua, faapea foi ma le Peresitene o le Ekalesia ma ona fesoasoani, o perofeta, tagatavaai, ma talifaaliga. Ua valaauiina i latou e molimau ia Iesu Keriso ma aoao atu Lana talalelei i le lalolagi atoa.

E filifili e le Faaola Ana perofeta ma saunia i latou e ala i le tele o aafia e taitai ai le Ekalesia. Pe a talanoa tagata o le Ekalesia e uiga i le perofeta, o loo latou faatatau atu i le Peresitene o le Ekalesia, le tagata e toatasi i luga

o le fogaeleele na te maua faaaliga mo le Ekalesia atoa.

Ona o le Peresitene o le Ekalesia e saunoa mo le Alii (tagai MF&F 1:38), e le o se mea atamai ai le ilo ma filifili na o ni vaega o ana faatuaga lea tatou te mananao e mulimuli ai. Nai lo o lena, tatou te faia ana faatuaga ma valaaulia e pei na tatou mauaina tuusao mai ia Iesu Keriso, “i le onosai ma le faatuata atoa” (MF&F 21:5).

Ao tatou filifili e faalogo ma mulimuli i le perofeta ma isi aposetolo, e faamanuiaina i tatou i a tatou taumafaiga ia avea e pei o Iesu Keriso, ma e puipuia i tatou mai le le saogalemu ma taufaasese a le lalolagi (tagai Efeso 4:11–14).


Mo se faataitaiga, tatou te maua le saogalemu faaleagaga i se lalolagi e fesuisuiai ai amioga lelei ma tulaga faatauaina e ala i le ola i tulaga le fesuisuiai e aoao mai e perofeta ma aposetolo. Tatou te maua foi le puipuiga faaletino i le mulimuli i faatuaga faaperofeta e aloese mai aitalafu, faataatia ese se tupe teu, ma teu meaai.

Ao tuu atu e le Peresitene o le Ekalesia ma le Au Aposetolo o latou ola i le galuega a le Alii—e femalagaai i le lalolagi e molimau atu ia Keriso, aoao le Au Paia, ma vaai le taitaiga o le Ekalesia i le lalolagi atoa—Na te lagolago ma faamanuia i latou ma o latou aiga. Tatou te lagolago ia i latou ao tatou tatalo mo i latou, usitai i a latou faatuaga, ma saili ia maua le Agaga Paia e faamautu ia i tatou upumoni latou te aoao mai.

Ao tatou lagolago i le perofeta ma aposetolo, tatou te maua se molimau ia i latou o ni auauna a le Atua. E ui lava e le atoatoa i latou, ae o le a le faataga i latou e le Tama Faalelagi e taitai ese i tatou (tagai Teuteronomie 18:18–20). ■

E mafai ona e aoao atili e uiga i le mulimuli i le perofeta e ala i le faiataina o le “Lagolagoina o Perofeta” (*Liahona*, Nov. 2014, 74–76) saunia e Peresitene Russell M. Nelson, Peresitene o le Korama a Aposetolo e Toasefululua.

## TAITAIGA E ALA I SE PEROFETA SOIFUA



“Ua toe fetalai mai le Atua ma ua faaauau ona saunia le taiala mo ana fanau uma e ala mai i se perofeta soifua i aso nei. Tatou

te tautino atu e pei ona folafola mai, e faatasi [le Atua] e le aunoa ma ana auauna ma taitai mataupu o lana Ekalesia i le lalolagi atoa.

*Aoaoga a Peresitene o le Ekalesia:*  
Howard W. Hunter (2015), 115.

O nisi nei o faamanuiaga  
ua oo mai ia i tatou e ala  
i perofeta soifua:



Na faaliliuina e le Perofeta  
o Iosefa Samita (1805–44)  
le Tusi a Mamona "e ala i le  
meaalofa ma le mana o le  
Atua" (tagai i le faatomuaga  
o le Tusi a Mamona). Talu  
mai lona lomiaina i le 1830,  
ua faamanuiaina ai olaga o  
le faitau miliona o tagata.



I le 1936, i le vaitaimi o le Pau Tele o le  
Tamaoaiga, na fofogaina ai e Peresitene  
Heber J. Grant (1856–1945) le mea o le a  
oo i ai le polokalama uelefea a le Ekalesia.  
O le aso, o loo fesoasoani lenei polokalama  
i tagata o tapuaiga uma i le lalolagi atoa.



Ia Aperila 1998, ao 51 malumalu o  
le Ekalesia sa faagaoioia, na fofoga  
ai e Peresitene Gordon B. Hinckley  
(1910–2008) se polokalama e  
fausia ai malumalu laiti. O nei  
malumalu ua manuia ai nei le  
toatele ma le anoanoai o tagata  
o le Ekalesia i le lalolagi atoa.



I le 1915, na valaaulia ai e Peresitene  
Iosefa F. Samita (1838–1918) ma ona  
fesoasoani tagata o le Ekalesia e amata  
ona fai afiafi faaleaiga. O loo seleselē  
pea e aiga faamanuiaga e tele na latou  
folafola mai o le a maua mai ai.



I le 2012, na fofogaina ai  
e Peresitene Thomas S.  
Monson e faapea, o le  
matutua o alii ma tamaitai  
e auauna atu faafeautalai  
sa tuuitiitia i le 18 ma  
le 19, i le faatulagaga  
pe'i ona i ai. E faitau afe  
aiga ma faifeautalai ua  
faamanuiaina e ala i le  
taunuuga o le faalauteleina  
o le toatele o faifeautalai.

# O LE FAATAITAIGA ALOFA A LOU TAMA

Taofia le igoa

*Sa faaali mai ia te au e lou tama le ala e alofa ai i lau fanau taase.*

**N**a ou auai i le Eklesia ina ua ou talia se valaaulia mai ni uo se toalua e auai atu i le seminare. Sa lagolago i taimi uma e ou matua au faaiuga ou te papatiso, auauna atu i se misiona, ma faaipoipo i le malumalu. Ae peitai, ou te manatua, le tiga na ou lagonaina (ma ou te matea na oo foi i ou matua) i le iloaina sa latou faatalitali ma le agalelei i le potu faatalitali o le Malumalu a Provo Iuta, ao faamauina i maua ma lou toalua.

Sa ma maua mulimuli ane se fanau e toafa, ma ou te manatua le olioli i le iloaina o i latou taitoatasi na faamauina ia i maua aua sa fananau i latou i le feagaiga. O le ma fanau, o le fanau muamua lea o fanau [a ou matua], ma e ui lava sa lei auai ou matua ma nai ou tei i le Eklesia, ae sa latou latalata lava i le ma fanau taitoatasi. Mo le tele o tausaga sa matou nonofo latalata ai i le tasi ma le isi, ma sa mafai ona vaai ou matua i le ma fanau o auai i taaloga a le aoga ma le autalavou. Sa laua auai i papatisoga a le ma fanau taitoatasi.

Ae peitai, e oo ane i le taimi na avea ai le ma fanau ma ni tupulaga

talavou, ua siitia atu lou aiga i se isi setete ona o lau galuega. Ae e oo lava foi i na tausaga, sa faalatalata mai pea ou matua i le ma fanau e ala i asiasiga ma tusi i taimi uma.

Ao faasolo ina faamatuatagata ou matua, sa amata ona maua lou tina i le mai o le galo o mea [Alesaima].

Sa naunau lou tama e auauna faamaoni e tausi o ia, seia oo lava i le taimi na manaomia ai e lona tulaga se tausiga faasoloatoa. Na oo lava foi i nei tausaga na taua mulimuli, sa aapa mai lava lou tama ia te au e ala i telefonu ma tusi faalevaiaso, ma i nisi o taimi, i aso uma. Sa




vavalalata i taimi uma le matou mafugaga ma ou matua, ae i le aluga o le 10 tausaga mulimuli o le soifua o lou tama, sa faapitoa ai lava ona ma felatai. Sa ou iloa ai foi i le taimi lena, sa tutusa lava lona faamanuiaina i le latalata atu i nai ou tei e toatolu i le ala lava lea e tasi—e ui lava i ese-esega i mea e fiafia ai ma tapuaiga sa matou filifilia ao matou faasolo matutua uma.

O ou matua ma lou aiga sa nonofo i talafatai faafeagai o le Iunaite Setete i le aluga o na tausaga mulimuli, ma sa la faia ni asiasiga se lua e sopoia ai le atunu, e ui lava ina sa tuga le Ale-saima o lou tina, lea sa matuai faigata ai ia Tama ona fesoasoani ia te ia i se malaga umi i le vaalele.

I lenei lava foi taimi, sa taitoatasi ai lau fanau uma ma filifili e le toe o i le lotu. E toalua na aveesea mulimuli ane o laua igoa mai faamau-mauga o le Eklesia. O lenei mea sa avea moni ma tofotofoga i o maua olaga ma lou toalua. Ma e ui lava sa le o ia o se tagata o le Au Paia o Aso e Gata Ai, ae sa tiga lou tama ma sa fenumiai foi i filifiliga a le ma fanau. O ia o se tagata lotu e le iloa lava e

*I le aluga o na tausaga, sa faalatalata mai pea ou matua i le ma fanau e ala i asiasiga ma tusi i taimi uma.*



nisi, ma sa auai ma i matou i na tausaga e tatalo mo i latou.

I le 2005 sa maliu ai lou tama ina ua gasegase i le kanesa, ma sa maliu lou tina i le tolu tausaga mulimuli ane ai. Sa ma olioli ma lou toalua i le fai ma o laua sui i le tuuina atu o sauniga o le malumalu ina ua maliliu i laua.

Ua loa o ou tatalo ia malamalamā i le auala sili ona lelei e talanoa atu ai i lau fanau i le taimi nei ona ua tagata matutua, o nisi ma o latou lava taitoalua ma fanau, ia e leai se tasi e AAG. E faalelagona ona ma latalata atu i le ma fanau uma e toafa, ma ma te faafetai ona e masani ona latou aapa mai i le alofa ia i maua.

Sa iu ina ou maua se tali manino lelei lava i le auala e ao ona ou ola ai, e masalo mo lou ola atoa o totoe, e faatatau i nei fanau ua matutua. Sa manaomia ona ou faia le mea sa fai e lou tama ia te au. E ui lava i le eseese o olaga sa matou ola ai ma le eseese o manatu faalelotu sa i ai ia i matou, sa naunau lava lou tama e faalatalata atili mai ia te au o se tama ma o se uo, ao ou oo i le tiga o le vaai atu i lau fanau ua filifilia ni ituaga olaga ma ni talitonuga e ese mai nai lo au. Sa ou iloaina e ao ona ou mulimuli i le faataitaiga a lou tama, o le sa aoao-inia au i auala e faia ai fanau e ese se tapuaiga: alofa atoatoa ia i latou, e pei o le a faia ai e le Faaola. ■

# O Mai ia te Ia

*Mafaufau Loloto*

♩ = 80–92

Upu: Theodore E. Curtis  
Fati: Hugh W. Dougall

1. Ou      te      sa - vali      i le      fi      -      le - mu  
2. A      tumu      a'u      i le      nau      -      nau      -      ta - iga  
3. E      le      a - fa - ina      po o      le      ā,

Ole      po      ua      taa - li      go      -      li      -      goa  
Ma      öle      mo se      faa - ma      nui      -      a      -      ga,  
Po o      sē      tau - faa - ma      ta - 'u      mai

Na'o      a'u      ma      fe - tu      su      -      su - lu  
E      le      va - aia      se      va      -      ve - ga,  
O      Ia      o      lo'u      ma      lu      -      ta - ga,

Ae      ou      te      iloa      o i      ai      -      le A - tua.  
Ae      moli - oo      mai      i lo'u      a      -      ga - ga.  
Lo'u      malu - ā - papa      mai      fili      u - ma.

E too - tuli ma ta - ta lo ai;  
 A pe - si te le mai - fa ā - fa  
 O mai ia te Ia ē faa - noa noa,  
  
 E oo mai se tali lē - le oa.  
 Le ai se ve ve si na ua.  
 O ē uma ua a ga sa la,  
  
 E ave - e - sea a'u a - ve - ga  
 Se loa uma āfa e o - o mai  
 Ē vai - vai ma fia ma - lo - lo.  
  
 Ma oli - oli ai lo'u loto ti - ga.  
 Pe a faa - tua tua i le Ma - tai.  
 O mai ia te Ia! O mai ia te Ia!



# Elder Gary E. Stevenson

## O SE LOTO MALAMALAMA



Saunia e Elder Robert D. Hales  
O Le Korama a Apostolo e Toasifululu

O le ola ae i Cache County, Iuta, ISA, ma le latalata ane o le Malumalu o Logan Iuta (tagai i le itulau faafeagai), na aoaoina e Gary Stevenson le tele o lesona mai aoaoga a lona tama ma lona tina. Na aoaoina o ia e lona tama ina ia mulimuli i le Agaga Paia, ao lona tina na uunaia o ia e filifili le mea sao. I lona talavou sa ia aoaoina e talisapaia le faaaumea ma le auauanga a ona korama perisitua, o se vaega o lana sauniuniga e auauana atu i lenei vaitaimi i le Korama a Apostolo e Toasifululu.

**I**na ua 11 tausaga o Gary Stevenson, sa ave o ia e lona tama i se savaliga sopo. “Sa ou puna mai lea maa i lea maa i luma o lo’u tama,” sa ia manatuaina. “Sa ou faamoeome ou te pea i luga o se maa tele lava ma tilotilo mai i lalo. A o ou pea atu agai i le pito i luga o le maa tele, sa mau o ia i lou fusipau ma toso mai au i lalo.

“O le a le mea ua tupu?” Sa ou fai atu ai, ma sa ia tali mai, ‘Aua e te pea i le maa lena. Ta tumau pea i le ala.’ O sina taimi mulimuli ane ao ma tilotilo mai i lalo mai luga ae, o le ala, sa ma iloaina se gata uogo i luga o le maa, o taotooto ai i le la.

“O le mea lena na ou toe tosaina mai ai oe i tua,’ o le tala lea a lou tama.

“I se taimi mulimuli ane ao ma tietie agai i le fale, sa ou iloaina o loo ia faatali mo au e tuuina atu le fesili: ‘Na faapefea ona e iloa le gata sa i ai iina?’ Fai mai a ia, ‘Sei ou aoao atu ia te oe e uiga i le Agaga Paia.’ Sa faia se ma lesona e lei fuafuaina e uiga i matafai e mafai ona i ai a le Agaga Paia i o tatou olaga: tagata e puipuia, faamafanafana, ma le e molimau. ‘I le tulaga la lea,’ sa faaso mai lou tama, ‘sa puipuia oe e le Agaga Paia e ala mai ia te au. Sa ia lapataia au e toso ese mai oe.’”

O lenei aafiaga, e ui e faigofie, na fesoasoani ia Elder Stevenson e malamalama ai pe a maua uunaiga a le Agaga, e tatau ona




taliaina ma faatino loa. O se tasi o le tele o lesona sa aoaoina mai lona tama.

### Tina Ofoofogia, Faiaoga Ofoofogia

E tusa ai ma Elder Stevenson, o lona tina sa avea ma faataitaiga o le agalelei moni: “O ona faamoemoega na uunaia ai au. Toeitiiti lava o faatinoga uma ou te faia na fuaina i le manatu, ‘Ou te le manao e faatiga lou tina.’”

Na faamalosia faatasi e ona matua ia mataupu faavae o le talalelei i taimi o afiafi faale-aiga ma isi gaoioiga faaleaiga po o faatasiga. “Sa la taulaina lo matou aiga i aoaoga o le talalelei. Sa avea ma faavae o o matou olaga,” o lana tala lea.

Na taitaiina foi o ia e isi faiaoga taua. “Ou te manatua i nisi o au aoaoga faamasani amata o se Pulega Aoao lea na fautuaina mai ai e



Peresitene Henry B. Eyring, Fesoasoani Muamua i le Au Peresitene Sili, ia tatou faia se lisi o ni tagata se toa 20 o e o i ai se aafiaga lelei i o tatou olaga. Ou te manatu e mafai ona manuia tagata uma mai lea ituaiga gaoioiga. O se tulaga faagaeetia le mafaufau i tamalii ma tamaitai lelei uma o e na i ai iina e fesoasoani ia te au, aemaise lava i lou talavou.”

### Faamalosiauina e Aiga ma Uo

O Gary Evan Stevenson sa soifua mai i le aso 6 Aokuso, 1955, ma sa ola ae i Logan, Iuta, ISA. O ona matua o, Evan ma Jean Hall Stevenson, e toafa o laua alo. O Gary o le lona lua o le fanau ma o le tama ulumatua.

“Sa vavalalata le matou mafutaga ma lou uso ma tuafafine. Sa faamoemoeina au e lou tuafafine matua, o Debbie, ina ia faia le mea sao. Sa faamoemoe ou tei laiti ifo, o Merilee ma Doug, o le a avea au ma se faataitaiga. Sa matou lagonaina uma se tiutetauave ina ia ola amiontonu ma auai i gaoioiga o le Ekalesia.” Na maualuga foi faamoemoega o lona aiga lautele: “Mo se faataitaiga, ina ua malaga atu lou tausoga

matua i se misiona, sa ia sainiina se \$2 pepa ma pasi atu i le tausoga e sosoo ai o loo sauniuni e auauna atu talai. O lena \$2 pepa na fepasai solo i tausoga e toa 16 o e na auauna atu i ni misiona i le lalolagi atoa, faamanatu atu i le tasi ma le isi o loo tuufatasia i matou i le auauna atu i le Alii.”

Na faatosinaina foi o ia e uo perisitua mo le lelei. “Sa ou aoao vave i le olaga i le uiga o le fegalegaleai ma le korama, e le gata i le Aso Sa ae faapea foi i totonu o le nuu ma i le aoga,” na ia fai mai ai. “Sa aumaia ia te au se lagona o le faasinomaga, auai, usoga, ma le auauna atu.” Na te manatua lelei lava le o faatasi ma uso o le korama e ao mai ia taulaga anapogi mai se tuafafine i le uarota ua faataotolia i le fale, tauaso, ma e le tele ni ana tipe. “E ui i ona tulaga, e i ai lava



sana lima sene po o se sefulu sene e ave o se taulaga anapogi,” na te manatuaina.

### O Se Meaalofa Lea e Manaomia ai se Galuega

Ina ua uma ona faauu mai le aoga maua-luga ma i se taimi puupuu auai i le Iunivesite o le Setete o Iuta, sa valaauna Elder Stevenson e auauna atu i le Misiona a Iapani Fukuoka. “Sa ou lagona le atuatuvalue e uiga i le aoaoina o le faalapani. Sa faaauau ona faateleina lou popole i le nofoaga autu mo le aoaoina o faifeatalai. Ae ina ua mavae le ono vaiaso, o le tatalo faatauanau ma le sue-sue maelega na taitaiina atu au i se lagona o le toofilemu o le a faamanuiaina au e le Alii ia aoaoina le gagana Iapani, ae e aunoa ma le leai o se galue malosi. Na aoaoina au e lenei mea o le meaalofa o gagana e tai pei lava o le faatuatua ma galuega ma isi mataupu Faavae o le talalelei. Pe a mavae ona e faia mea uma e te mafaia, ona faaee atu lea ia te oe o le faamanuiaga.”

Ina ua mavae lana misi-onia, na atiaeina e Elder Stevenson se lagona fiafia

mo le talafaasolopito o le Ekalesia, suesueina o le Tusi a Mamona ma le Mataupu Faavae ma Feagaiga, ma sailili i api o talaaga ana-mua ma talafaasolopito o aiga. Na faapitoa lava lona fiafia ia Iosefa Samita ma lona aiga, o le aiga o Uitimera, Oliva Kaotui, ma Matini Harisi. Sa ia toe sailili i le faaliliuga ma le lolomiina o lomiga eseese o le Tusi a Mamona.


Sa ia toe aoaoina foi o le faatuatua ma le galue malosi e o faatasi. “O tali uma i fesili uma o le talalelei e le oo mai i se taimi vave,” na ia fautua mai ai. “E faamoemoeina i tatou e le Alii ia faitau, suesue, mafaufau loloto, ma tatalo. Ma pe a tatou faia lenei mea ma le faatuatua ma se manao amiontonu, o le a oo mai se molimau matagofie i le aluga o taimi.”

I lona olaga atoa, sa ia lagona le matua faamanuiaina o ia ina ua valaauna e faiaoga i vasega a le autalavou i le Aoga Sa, Aooga Faavae o le Talalelei, ma Alii Talavou. O nei valaauga na faatagaina o ia e molimau atu i ona lagona loloto mo le moni o tusitusiga paia, o se talitonuga na atinaeina mai le tele o tausaga o suesuega.

I le toe foi ai i le Iunivesite o le Setete o Iuta, na toe foi atu Elder Stevenson i ana sue-suega i pulega faapisinisi ma mea tau maketi. Sa ia faaluina le tele o itula i le potutusi. “O taimi uma lava ou te ulufale atu ai, e faafei-loai au e se faailoga . . . e faitauina faapea, ‘O mea uma e te maua ia maua mai ai le atama’ [Faataoto 4:7].” Na tamauina lenei mau i totonu o lou loto ma i le tele o tausaga muli-muli ane na avea ma autu o se sauno-agia o le faigalotu na ou tuuina atu i le Iunivesite o Polika Iaga.

“O lenei malamalamaga na oo mai i se tuufaatasiga o le suesue ma le tatalo,” sa ia faamatalaina i lena saunoaga. “A tatou talitonu ma faa-lagolago i le Alii, o le a oo mai se fuatuaga sili o le malamalamaga mai ia te Ia i o tatou loto.”<sup>1</sup>

Sa auauna atu Elder Stevenson i se misiona faafaifeatalai i Iapani (lalo taumatau) ma atinae le alofa mo Asia mo ona tagata. Ina ua ia toe foi mai i le fale, sa ia feiloai i lona toalua i le lumanai ina ua la auai faatasi i se vasega inisitituti. Sa la faaiipoipo i le Malumalu o Idaho Falls Idaho ma o ni matua o ni atalii e toafa: o Craig, Bryan, Brett, ma Kyle. O le fiafia ia o Elder Stevenson pe a ia talanoa e uiga i lona faletua, “o le lasusulu o lou olaga.”



## Mafutaga Faauo i le Inisitituti

I le taimi o le vasega o le Feagaiga Fou i le inisitituti o mataupu faalelotu, sa ia feiloai ai ia Lesa Jean Higley, lea sa siitia atu mai Kalefonia i Idaho ma sa aoga i le taimi lena i le Setete o Iuta. "Sai fai le faiaoga ia Lesa e faatino le vaega a Eva ma o au e faatinoina le vaega a Satani e faaososooso o ia. O se taunuuga, sa alu se tele o ou tauanauina o ia ma te tafafao," sa ia manatuaina ma se ataata. Sa la tafafao faamasani mo le na o le silia ma le tausaga ona faaipoipo lea i le Malumalu o Idaho Falls Idaho i le 1979.

O le fiafia ia o Elder Stevenson pe a ia talanoa e uiga ia Lesa. Na te faatatau ia te ia o "le lasusulu i lou olaga."<sup>2</sup> Sa faauu Sister Stevenson ma se tikeri i aoaoga faatausiaiga, vave ona avea ma faiaoga i le popofou o le la faaipoipoga, ma sa faaaau pea ona saofaga atu lona taimi ma taleni i aoga, faatonu mo nuu ma alalafaga, faalapototoga, ma isi gaoioiga. Peitai e mafaufauna e Elder Stevenson ana meaalofa o se tausiaiga o ona uiga sili ia na tuuina mai e le Atua: "Ua ia te ia se tomai e fatu ai se aiga e totonugalemu i le talalelei, se faasinomaga saogalemu ma talisapaia lea e nofo ai le Agaga." O lenei tomai, faatasi ai ma se malama-lamaaga loloto o le olioli moni e sau mai le auauna atu i isi, ua faamanuiaina ai olaga o lana tane, lona aiga, ma le toatele o siomiaina o ia.

Na avea Elder ma Sister Stevenson ma matua o ni fanau tama se toafa. "Na matou fiafia faatasi i mea uma i le aluga o tausaga," na ia fai mai ai. "Na taaaalo pasiketipolo, lakapi faaAmerika, pesipolo, ma tenisi ia tama. Matou te fiafia uma lava i gaoioiga e fai i fafo e pei o le fa-pau, tietie taavale i le kiona, faasee i seevae faasee i le kiona, faasee i le laupapa i le kiona, ma taaloga eseese i le vai. Ae ui i lea, na uunaia foi e Lesa le ma fanau tama i nisi o aga ma tu, atinaeina i totonusi o i latou o se fiafia i le musika ma faatufugaga. Ma ina ia mafai ona faalautele atu le meaalofa o le auaunaga i isi e ala i lo matou aiga, sa manaomia lona faaaofia ai o le 'malosi faaletino' o tama."

## Fausiaina o se Pisinisi

O le galuega faapisinisi a Elder Stevenson na mafua mai i lona fiafia mo tagata o Asia. Ina ua ia toe foi mai i le aiga mai lana misiona, sa amata e ia ma nisi o ana uo le auina mai o ni mea teuteu mo meaalofa mai Asia. Na oo atu lenei mea i le faatauina atu o oloa fai faamalositino. I le aluga o le isi tolu sefulu tausaga, na tuputupu ae le latou tamai



pisinisi i se pisinisi faamanuiaina ma sa faafaigaluegaina le silia ma le 2,500 tagata.

Na manatua e se tasi o tagata faigaluega le mea sa i le loto o Elder Stevenson o se tamalii faipisinisi: "Sa ma talanoaina se filifiliga faigata o le pisinisi. Sa ou tauina ia te ia e tatau ona matou faamautinoaina o faia le mea e aloaia. Sa ia tauina mai ia te au e le gata i lo matou faia o le mea e aloaia ae ia matou faia le mea sao."

"O le taliaina ma le faaaaogaina atoatoa o mataupu faavae lelei i tulaga faapisinisi e lelei mo le pisinisi," na taua e Elder Stevenson. "O le amiosao, galue malosi, agaalofa, tau-limaina o tagata ma le faaaloalo—ma i le taimi lava e tasi manaomia ai le tali atu o le tagata lava ia—e le o ni aoaoga ia e te talanoa i ai ma e na o Aso Sa e faataitaia ai. O vaega ia e tatau ona faataitaia i aso taitasi o le vailaso."

Ao tuputupu ae le pisinisi, na faapea foi ma le manaomia o lona taimi: "Sa avea au ma se epikopo talavou ma se fanau laiti ma ou te faia foi le tele o malaga i Asia e sili atu ma le 100 aso i tausaga taitasi. Sa sau lou tama ma faapea mai, 'O loo ou matauina a e faatasi ma lou aiga, e te le o taulai moni atu lava ia i latou. Ou te fefe nei faapea a e faigaluega, e te le o taulai atoatoa atu iina, ma ao e faatinoina lau matafaoi o se epikopo, atonu o e popole i lau galuega po o le aiga. E te manaomia le faapalenina sili o lou olaga.'"

O lenei fautuaga e i ai se aafiaga taua tele. Fai mai Elder Stevenson, "Sa ou aoaoina e taua le faatumauina o le faapalenina o le aiga, galuega, ma valaauga o le Eklesia, ma ia faamautinoa o e tausaina lelei oe lava."



I le avea ai ma se Fitugafulu ma se Epikopu Pulefaamalumalu, sa iloga Elder Stevenson mo le agaalofa e pei o le malu o fua o se laau o le cherry (o le fua mai o le cherry e faamanatuina o se faailoga o Iapani). Sa ia aapa atu i tagata e latalata atu i le fale ma mamao ese e faasoa atu "le aao faamalolo o le alofa o lo tatou Faaola." I le avea ai ma se Apostolo o le a faaauau pea ona ia aapa atu i tagata matitiva ma e le tagolima, ina ia "fesoasoani i e vaivai, sii i luga lima ua tautau i lalo, ma faamalosi tuilivea ua vaivai" (MF&F 81:5).

### Tofia e Auauna Atu—I Lea Taimi ma Lea Taimi

Na fautuaina e se taitai pisinisi iloga i se tasi taimi ia Elder Stevenson ina ia, "aoao, mauaina, ma auauna atu." I le 2004 na tototofoina ai le vaega o le "auauna atu" o lena fautuaga ina ua valaauna uma ia Elder Stevenson ma lana paaga faipisinisi mo se taimi umi o Scott Watterson e auauna atu o ni peresitene o misiona. Sa la lagona e tatau ona la faamalamalama atu i tagata fai siea ma tagata faatau eseese le mafuaaga o le a la tuua ai mo se taimi e le tumau le la pisinisi. Sa la asiasi atu ia i latou taitoatasi.

"Ina ua ma faamatalaina atu ia ma vala-auga ma o le a ma auauna atu mo le tolu tausaga e aunoa ma se totogi mai le Ekalesia, sa latou faaaloalo i le lelei o lena tulaga," na ia fai mai ai. Sa la tuua le pisinisi e puleaina e se au faapitoa, ma sa faamanuiaina.

I le avea ai ma peresitene o le Misiona Iapani Nagoya, na iloa ai e Elder Stevenson le faateleina o lona alofa mo Asia. "Ou te mafau-fau i ai o sou aiga lona lua," o lana tala lea. Na faateleina foi le loloto o lona alofa mo lona

faletua ao ia vaavaai atu i lona



opoina o le aganuu o le atunu, aapa atu i isi, e aofia ai faifeautalai ma tagata o le ekalesia, ma faaauau pea ona faafaileleina le la fanau tama e toalua lea na latou malaga faatasi. O le toatele o papatisoga o tagata liliu mai na mafua ona o se taunuuga o ana taumafaiga e faauo atu ia i latou o siomiaina o ia.

E na o le fitu masina talu ona la taunu mai i le fale mai le la misiona ae valaauna loa Elder Stevenson e auauna atu i le Korama Muamua a Fitugafulu i le 2008.

"Sa lofituina au ma ou lotomaualalo. Sa ou faapea 'E toatele atu isi o e e sili atu le latou auaunaga nai lo au.' Ae sa ou manatu i taimi ua tuanai—i le avea ma se peresitene o le korama a toeaina, fautua maualuga, epikopo, ma se fesoasoani i le au peresitene o le siteki—ina ia ou faapea sa lei lava lou tomai e faia mea ua talosagaina au ou te faia. Na ou aoaoina ao lei valaauna i tatou, atonu tatou te *le o agavaa*, ae o le valaauga e *amataina* se faaagavaaina faalelagi.

"O se tasi o mau e sili ona ou fiafia i ai o loo tauina mai ia i tatou ni mea e lua e tatau ona tatou faia pe a valaauna i tatou: Muamua, 'ia e faamaoni.' Lona lua, tu i le tofi ua

tofia i ai oe (tagai MF&F 81:5). O le uiga o lenei mea ia te au o le faaalia lea o le faatuatua, aoao mea e manaomia, ona faia lea o mea uma e mafai ona e faia e faa-lauetele ai le valaauga. Afai tatou te faia lenei mea, o le a faalaueteleina ma faaagavaaina i tatou e le Alii e faama-nuia i isi."

### Ua Toe Asia Foi

I le avea ai ma se Fitugafulu, sa tofia Elder Stevenson o



se fesoasoani i le Au Peresitene o le Eria ona sosoo ai lea ma se peresitene o le Eria i Asia Matu.

Ia Mati 2011, na taia Iapani i se mafuie ma se sunami. O le mafuie e 9.0 le malosi lea na mafua ai se sunami ma maliliu ai le toa 20,000 o tagata, tuua ai le faitau afe o tagata ua leai ni fale, ma faaleagaina fale e 550,000.

Sa ia asia eria na pagatia i le tele o taimi. “A o matou feiloai ma tagata, sa tele ni lagona na matou lagonaina,” sa ia toe taua. “Na matou molimauina i le taimi lava e tasi le faalavelave ma aafiaga ua tuufaatasia ma le faamoemoe ma le tofutataiina. Sa ootia o matou loto i lea taimi ma lea taimi ao matou molimauina le aao faamalolo o le alofa a lo tattou Faaoala.”

E le gata i lea, sa ia molimauina patino le auala na fesoasoani ai le Ekalesia ia i latou na mafatia: “O le mafai ona tali atu i se mala ma fesoasoani e faatulaga se fesoasoaniga—o se faataitaiga lena o le faataunuina e le Ekalesia a Iesu Keriso o se tasi o ona tiutetauave na tofainia ai faalelagi o le tausiga o e matitiva ma e le tagolima.” Sa ia faamatatalaina o se faamanuiaga paia e auauna atu ai ia i latou e le tagolima ma vaai o faia foi e isi: “Ua tatou aoao e uiga i le agalelei o tagata.”

## O Talatuu o Epikopo

O lona malamalamaga i le agaalofa sa tele sona aafiaga ia te ia ina ua valaauna o ia i le 2012 o se Epikopo Pulefaamalumalu. I lena valaauga sa ia vaaia ai se vaega lautele o le Ekalesia lea e tilivaina fesoasoani o le uelefea ma tali atu i faalavelave faafusei i le Au Paia o Aso e Gata Ai ma isi, faapea foi ma galuega alofa i fanau a le Tama Faalelagi i “nisi o nofoaga sili ona faigata, nisi o nofoaga sili ona matitiva, nisi o nofoaga sili ona pagatia i le salafa o le lalolagi.”<sup>3</sup>

O le matafaioi o le epikopo e i ai se tulaga taua mo Elder Stevenson. “Ina ua 12 ou tausaga, sa valaauna lou tama o se epikopo,” sa ia toe taua. “Sa toatele fafine ua maliliu o latou tane i le uarota, ma e masani ona ave au e lou tama pe a alu e auauna atu ia i latou. Na te fai mai ia te au e vaai kalone lapisi, faamama se mea i le fale,

pe aumai ni au uo matou te saluina laulaau pe saluese le kiona. Pe a ma o ese, ou te lagonaina pea le lelei i totomu. O le asiati atu i fafine ua oti a latou tane na fesoasoani ou te iloa ai lena vaega o mea e fai e epikopo e auauna atu ai i tagata taitoatasi. O epikopo o le Ekalesia o ni a'u totoa moni lava.”

## O Se Folafolaga mai se Perofeta



I le Aso Lua ao lumanai le konafesi aoao ia Oketopa 2015, na maua ai e Epikopo Stevenson i lena taimi se valaauga o talosaga ai o ia e feiloai ma Peresitene Thomas S. Monson ma ona fesoasoani.

“O Peresitene Monson [na tuuina mai] se valaauga i le Korama a le Toasefulula ia te au. Sa ia fesili mai ia te au pe ou te taliaina. . . . Sa ou tali atu ioe. Ona . . . aapa mai lea ma le agalelei o Peresitene Monson ia te au, faamatala mai le valaauna o ia i le tele o tausaga ua mavae o se Apostolo, . . . sa ia lagonaina foi le le agavaa. Sa ia faatonuina ma le toofilemu au, ‘Epikopo Stevenson, o le a faaagavaaina e le Alii i latou Na te valaauna.’ o nei upu malu a se perofeta ua avea ma se puna o le filemu [talu mai lena taimi].”<sup>4</sup>

O Elder Gary E. Stevenson o se tamalii moni lava e aunoa ma le faaoleole. I le avea ai ma se Apostolo, e pei ona ia faia o se Epikopo Pulefaamalumalu ma o se Fitugafulu ma e pei ona ia faia i lona olaga atoa, o le a faaauau pea ona ia aapa atu i tagata matitiva ma e le tagolima. O le a ia mulimuli i le poloiga a le mau ina ia “fesoasoani i e vaivai, sii i luga lima ua tautau i lalo, ma faamalosi tulivae ua vaivai” [MF&F 81:5]. O se valaauga luitauina, ae o se [valaauga] ua fetau ma ia ona o lona loto malamalamala. ■

## FAAMATALAGA

1. Gary E. Stevenson, “Lean Not unto Thine Own Understanding” (Brigham Young University devotional, Jan. 14, 2014), 2, 3, speeches. [byu.edu](http://byu.edu).
2. Gary E. Stevenson, “O Upumoni Manino ma Taua,” *Liahona*, Nov. 2015, 92.
3. Gary E. Stevenson, press conference, Oct. 3, 2015.
4. Gary E. Stevenson, “O Upumoni Manino ma Taua,” 91.





Saunia e Elder  
**Lynn G. Robbins**  
O Le Au Peresitene  
o Fitugafulu

# E Faapupulaina MATA O EUA TAUASO

*E mafai ona tatou manatu i le oo mai  
o le Tusi a Mamona o se toefuataiga faavavega  
o le vaaiga faaleagaga.*

**S**a valoia e Isaia e faapea, i aso amuli o le a faapea ona faia ai e le Alii “o le vavega lava o le mea foi e ofo ai,” ma sa ia muai tau mai le oo mai o le Tusi a Mamona, i le faapea mai “e faapupulaina foi mata o e ua tauaso, ina ua tea le pouliuli ma le pogisa” (Isaia 29:14, 18).

## O Se “Tulaga Leaga o le Tauaso”

I vaitaimi ao lumanai le Uluai Faaaliga matagofie, sa matuai fenumiai ai lava le vevesi o mea tau lotu i Manchester, Niu Ioka, ISA. I upu a Iosefa Samita, “Sa matua tele nauā le faanunununu ma le gefinauai i totonu o lotu eseese, sa le mafai e se tagata . . . ona maua se faaiuga mautinoa po o ai ua sao ma o ai foi ua sese” (Iosefa Samita—Talafaasolopito 1:8).

Ua taua e le Tusi a Mamona lenei faanunununu ao lumanai le-Toefuataiga o se “*tulaga leaga tele o le tauaso* . . . ona o vaega manino ma sili ona pele o le talalelei a le Tamai Mamoe ua taofia i tua e lena ekalesia inosia” (1 Nifae 13:32; ua faaopoopo le faamamafa).

Mai lava i seneturi, o le vaaiga manino faaleagaga sa tuuina mai e le Tusi Paia na *faanenefuina* ai le tele o mea manino ma pele sa leiloloa, o nisi taimi sa lei fuafuaina e ala i le faaletonu o le faaliliuga ae o nisi taimi sa fuafuaina lava e faasaoga piopio, “ina ia latou faasese ai ala sao le Alii, ina ia latou *faatauaso ai mata* ma faamaaa ai loto o le fanauga a tagata” (1 Nifae 13:27; ua faaopoopo le faamamafa).

## "O Au Le Tauaso, Ua Ou Vaai Nei" (Ioane 9:25)


O se tasi o vavega aupito taatele a le Faaola o le toe faapupulaina o e ua tauaso.<sup>1</sup> Ae peitai, o le misiona ma le vavega aupito sili ona ttau a le Faaola, o le faamaloloina o e ua tauaso faaleagaga. Na fetalai o Ia, "Ua ou sau ai i le lalolagi nei, ina ia latou vaai o e le vaai" (Ioane 9:39).

O le faaaogaina o le tala faatusa a Isaia ma le faaaliga a Nifae i le tauaso faaleagaga i aso amuli, e mafai ona tatou mafaufau ai i le oo mai o le Tusi a Mamona o se toefuataiga faavavega o le vaaiga faaleagaga.

"Pe tuua foi e le Alii le Atua ia tumau pea e faavavau Nuuese i lena tulaga leaga tele o le *tauaso*. . . .



2A. O se meatalo a se tamaititi e faalia ai le mana o le vaaiga loloto mauluga.



1. Ua i ai i tagata soifua se vaaiga faalava, e tusa ma le 190 tikeri o mata e lua, e tusa ma le 120 tikeri lea e vaaia e mata uma e lua.



2E. I le malo o manuvaefā, o mata e lua e tiu atu ai i manu o loo faaolioli e lama le vaaiga mautinoa, e fesoasoani ai e talepe le taufaasese a [se manu o faaolioli mai e ai aano o manu].

". . . o le a Ou alofa mutimutivale i Nuuese i lena aso, e oo lava ina o le a Ou aumai ia te i latou, i lou lava mana, le tele o lou talalelei. . . .

"Aua, faauta, ua fetalai mai le Tamai Mamoe: O le a Ou faaali atu au lava i au fanau, ma o le a latou tusia le tele o mea o le a Ou aoao atu ia te i latou, . . . [ma] o le a natia nei mea, ia oo mai i Nuuese, e ala mai i le meaalofa ma le mana o le Tamai Mamoe.

"Ma o le a tusia i totonus o i latou lau talalelei, ua fetalai mai ai le Tamai Mamoe, ma lau papa ma lau olataga.

". . . O talafaamaumau mulimuli nei . . . o le a faamaonia ai le moni o talafaamaumau muamua. . . . O le a faatutuina i laua uma i le tasi" (1 Nifae 13:32, 34–36, 40–41; ua faaopoopo le faamamafa)—e o mai faatasi e fesoasoani ia tatou iloa le mea moni.

O le "faatutuina i laua uma i le tasi" o le ala lea e vaaig

pe gaoioi ai mata uma e lua. Ona ou te mai i le glaucoma, o lea e tatau ai ona ou tuluiina ni mataua faavavega e sefe ai lau vaai i ou mata uma e lua e faalua i le aso, e puipuia ai mai le tauaso. Ao lei maua e fomai ou te mai i le glaucoma, sa faapea ona le pupula se vaega o se tasi o ou mata. Ou te matuai faafetai lava i vai faafomai faaonaponei ma ou te le o tauaso. Ou te faafetai foi mo lou mata lona lua, lea e faaatoa ai le vaega ua leiloa o le vaai a le isi [mata]. O le faataoto i le mata-lua, ua i ai se taua loloto ma patino mo au.

Ua faamalamalama mai e le tele o suesuega faasaienisi itu e lelei ai le lua o mata i lo le tasi. O le a ou talanoa

auiliili atu i le ono o na itu lelei ma lo latou ogatasi faaleagaga ma le Tusi a Mamona o se *molimau vaaitino* lona lua ia Iesu Keriso i le *toefuataiga* o le vaaiga faaleagaga i le lalolagi.

### 1. O Mata e Lua e Faateleina ai le Lautele o le Vaaig Faaleleia Atili ai le Manino [o le Vaaig]

O tagata soifua e tusa ma le 190 tikeri le tele o le vaaiga faalava o mata e lua, e tusa ma le 120 tikeri o lena vaaiga e fesilita'i pe e vaaia e mata uma e lua. I tua atu o le vaaiga o le folasi fesootai, e tofu le mata ma se folasi i fafo ane e tulaga ese i lena mata.<sup>2</sup>

Ina ua mavae seneturi o le leiloloa o mea manino ma pele, sa fafia ai le Tusi Paia i se mea itiiti ifo nai lo o le vaaiga atoatoa. O le oo mai o le Tusi a Mamona ma lana vaaiga atoatoa, sa le gata ina faateleina ai le folasi o le

vaiga faaleagaga ae na tuuina mai ai foi le manino sa manaomia tele i le vaega fesilita'i o mata faaleagaga e lua, po o le folasi o le vaiga matalua—i le faaletusitusiga paia, tatou te taua lenei tulaga o molimau e toalua (tagai Mataio 18:16; Eteru 5:4; MF&F 6:28).

O le folasi o le vaiga fesilita'i, po o le *vaiga matalua*, e faaleleia ai le mafai ona iloa o mea faitino e tau le iloa atu.<sup>3</sup> E atili manino atu lo tatou vaai i mea ao tuufaatasia ia vaiga eseese na maua i mata taitasi, i se ata se tasi, e tuuina mai ai ia i tatou se fesootaiga o le *laina ogatotonu*<sup>4</sup> ma faapea ona aveesea ai le “faanunununu ma le fefinauai” lea sa fenumiai ai le taulealea o Iosefa (tagai Iosefa Samita—Talafaasolopito 1:8).

O le mea moni e faapea, *o mata e lua e sili atu le lelei nai lo le tasi* o se mea moni aoao ma le mautinoa patino sa filifilia e Isaia se faatusa lelei atu mo le iloaina e le lalolagi: “e faapupulaina foi mata o e ua tauaso” (Isaia 29:18). Tatou te faamoemoe o i latou o e o loo vaai i le taimi nei i le na o le mata faaleagaga e tasi, o le Tusi Paia, o le a iloa le poto o le le teenaina o le Tusi a Mamona o se molimau vaaitino lona lua ia Iesu Keriso ae latou te lei faataitaia. O le a latou iloa ai “o le laau a Iuta” ma le “laau a Iosefa” (Esekielu 37:19) e fesoottai o ni mata e lua e ogatasi faatasi i le atoatoa ma le manino—o se aafiaga e *faapupula-mata!*

## 2. Vaaiga Mautinoa—Aloese i le Taufaasese

“O le vaaiga matalua . . . e mafai ai e tagata soifua ona savavali i luga ae ma faataamilo o maagao i se saosaoa tele ma le mautinoa tele” ona o le vaaiga loloto e sili atu ona sao.<sup>5</sup> O se faataitaiga o lenei manatu o le loloto sili atu, o loo faaalia i le manino o le vaaiga matalua i itu e tolu [3-D] o se ata i luga o se ata pue faigofie.

I le malo o manuvaefa, o mata e lua e tuu atu ai i manu o loo faaolioli e lama le *vaiga mautinoa*, po o le manatu i le loloto tonu, ma le mafai ona iloatino eseesege i itu e tolu [3-D], ma faapea ona fesoasoani ai “e talepe le taufaasese a [se manu o faaolioli mai e ai aano o manu].”<sup>6</sup>

O le Tusi a Mamona e tuuina atu i le lalolagi le puipuiga faapena e ala i le toe aumaia o le manino ma le manatu loloto o le paia, i le folasi matalua faaleagaga, lea e mafai ai ona tatou aloese mai taufaasese ma pepelo a Satani. Sa ia faailoa mai ma le poto le fenumiai e ala i le faanenefuina

o le uiga o le tele o fuaitau faaletusi paia. Sa talepe e le Tusi a Mamona lona taufaasese i faamaoniga manino lelei o faamatagalaga, “e tausese ai mataupu sese” (2 Nifae 3:12) ma le “veteina ai le poto leaga ma mailei ma fuafuaga uma a le tiapolō” (Helamana 3:29).

Sa faasoai mai e Peresitene Ezra Taft Benson (1899–1994) le folafolaga faamalosiau lenei o le Tusi a Mamona: “O loo i ai se mana i le tusi lea e amata ona tafe atu i o outou olaga i le taimi lava e amata ai ona e suesue faamaoni i le tusi. O le a e maua ai le malosi sili atu e tetee ai i faaososoga. O le a e maua ai le malosi e *aloese ai mai mea taufaasese*. O le a e maua ai le malosi e tumau ai i le ala sao ma le vaapiapi.”<sup>7</sup>



*3. O le vaaiga matalua e fesoasoani i se tagata ia iloa atili ai, po o mea uma, se mea faitino e i tua atu o se mea o punitia ai. E mafai ona e iloa le eseesege?*

## 3. Vaai Taamilo i Mea e Punitia Ai

O le vaaiga matalua e fesoasoani i se tagata ia iloa atili ai, po o mea uma o, se mea faitino e i tua atu o se mea o punitia ai. O lenei itu lelei sa faamatala mai e Leonardo da Vinci, o le sa matauina e faapea, o se koluma tusao e punitia ai se mea faitino, e ono poloka ai se vaega po o le mea faitino atoa mai le mata agavale, ae o le mea faitino atonu o loo iloa i le taimi lea e le mata taumatau.<sup>8</sup>

O se faataitaiga faaleagaga o lenei mea o loo maua i fetalaiga a le Faaola i le au sa Iuta: “Ua ia te au foi isi mamoe e le o i lenei lotoa: e tatau ona ou taitaiina mai o i latou foi e faalogo foi i latou i lou leo; ona tasi ai lea o le lafu mamoe ma le leoleo mamoe e toatasi” (Ioane 10:16).

Ona sa lei faailoa mai e Iesu isi o na mamoe, sa le mafai ai e tagata Iutaia ona malamalamā i le uiga o Lana feta-laiga. Ae peitai, faatasi ai ma le *manatu faaopoopo* mai le

Tusi a Mamona, o lena mea sa natia na faapea ona aliali mai: “Ma e moni ou te fai atu ia te outou, o outou ia o i latou ia na ou fai atu ai: Ua ia te au ni isi mamoe e le o i lenei lotoa; e ao foi ona ou aumai i latou, ma o le a latou faalogo i lou leo; ma o le a tasi le lafu, ma tasi le leoleo mamoe” (3 Nifae 15:21). O le taunuuga sa o se vaaiga manino o le folasi ma e leai se le malamalama i le uiga o le fetalaiga a le Faaola—le toe i ai ni talitonuga sese *faalavefau*.

#### 4. O Itu Lelei i Fafo o Mata Taitasi

“O le vaaiga i fafo o se vaega o le vaai lea e tupu i fafo mai o le ogatotonu tonu o le pulatoa.”<sup>9</sup> I se isi faaupuga, ua tatounofouta i mea i le folasi o le vaaiga lea tatou te leo tepataulai moni i ai. O le vaega o lena folasi o le vaaiga—lea o loo i fafo o le vaega o le folasi matalua po o le vaai *matalua*—e tulaga ese i mata taitasi.

Tatou te faafetai tele mo le Tusi Paia ma mea e tulaga ese ma matagofie lona aumaiga ia i tatou—o le mea aupito sili ona taua, o le talaaga o le soifuaga ma le auaunaga a Iesu Keriso.

Tatou te matuai faafetai foi mo le Tusi a Mamona ma le vaaiga lelei atoatoa 20/20 e le faaleagaina ua ia tuuina mai ia i tatou, lea e faamanino mai ai le aoaoga faavae a Keriso, ma faaali mai ai Ana aoaoga e ala i perofeta o Amerika anamua ma Lana asiasiga patino ma le auaunaga i sa Nifae.

E pei o mata e lua e faalelagi le tutusa, o le Tusi Paia ma le Tusi a Mamona e faaatoatoa e le tasi le isi, ma iu ai i se vaaiga lautele mataina i mata e lua, faapea ma vaaiga e tulaga ese i [mata] taitasi.

#### 5. Aveesea o o Tatou Itu Tauaso

E tofu uma i tatou ma se itu tauaso i a tatou vaaiga folasi lea e fai si faigofie ona iloa. Uu le ata o le lio ma le fetu (o loo i lalo), faasao i ou luma tonu ia tusa o lou ogalima le mamao. Pupuni lou mata agavale ma ia tepataulai tonu atu lou mata taumatau i luga o le lio laitiiti. Ao pulatoa atu lou mata taumatau i le lio, ia amata malie ona faamei mai le ata


agai mai ia te oe. Pe o le afa o le agai mai, o le a nimo ai le fetu mai le vaaiga *i fafo mai*.

[Ua e] tei? E te lei iloa e i ai sou itu tauaso? E pei lava ona faapalen i lou mata lona lua lenei itu tauaso, ua tuuina mai foi e le Tusi a Mamona se aoga faapena i le Tusi Paia.

Ma e pei foi ona nimo le fetu i luma tonu o lou mata, sa lei vaai Herota i le fetu i Peteleema ma sa tatau ai ona fesili atu i le Au Makoi “i ona po na iloa ai le fetu” (Mataio 2:7). Sa i ai i lona *itu tauaso* faaleagaga i fafo mai. Sa na o i latou na *suea* le fetu sa matauina.

O aso nei, o le toatele ua pei o Herota, o e mumusu e sue ma vaai i mea o le Agaga. “Oi talofa i e ua tauaso e lē

4. Faataitaiga o le itu tauaso



fia vaai” (2 Nifae 9:32). O le faamaualuga foi na mafua ai le [inoino] o tagata Iutaia “i upu manino, ma . . . o se tauaso na oo mai [ia i latou] i le latou vaai i tala atu o le faailoga” (Iakopo 4:14).

O se tasi o *malamalamaaga* loloto o le Tusi a Mamona o le muai lapataiga e uiga i le itu tauaso e aafia ai tagata uma, o le *faamaualuga*, “o se agasala e faigofie ona *vaaia* i isi ae e tau le taliaina ia i tatou lava.”<sup>10</sup> E pei lava o le manava leaga—e iloagofie e tagata uma ae le o le tagata e aafia ai.

“I le fono i le muai olaga, o le faamaualuga na pau ai Lusifelo.”<sup>11</sup> Sa “o le faamaualuluga . . . o tagata o sa Nifaē, ua [faapea ona] faamaonia ai lo latou faaumatiaga” (Moronae 8:27). O e faamaualuluga o le a mu e pei o tagutugutu o saito pe a faamama e le Atua le lalolagi i le afi (tagai Malaki 4:1; 3 Nifae 25:1).

O le amataga o le ala sao ma le vaapiapi ua faapipiina ai se faaaliga taufaafefe o le “lapataiga”: “FAAETEETE i le faamaualuga, nei avea outou e pei o sa Nifaē anamua.” (MF&F 38:39; ua faaopoopo le faamamafa). O le mea e leaga ai, o le faaaliga “FAAETEETE” *lava ia* e masani lava ona i ai i le itu tauaso o e faamaualuluga. O le mea lea, “Ia tuu atu ia te ia o lē ua [faamaualuga] e aoao le poto i le faamaualaloina o ia lava ma le ole atu i le Alii lona Atua, ina ia tatalaina ona mata ina ia mafai ona vaai o ia” (MF&F 136:32).

## 6. O Le Fesootaiga a le Mata-ma le Faiai

O le faiga o le faaataga e le faiai, e tau mai ai ia i tatou mea o loo vaaia e o tatou mata. O na o mata lava ia e le lava lea e uunaia ai le talitonu po o le *vaaiga moni* (tagai Ioane 12:37).

E pei lava ona galalue faatasi le faiai ma mata, e galalue faatasi foi le Agaga ma tusitusiga paia, lea e fesoasoani tatou te vaai ai faaleagaga. O le na ona faitau o tusitusiga paia e le lava lea e maua ai se malamalamaga loloto faaleagaga ona “e le talia e le tagata faaletino o mea a le Agaga o le Atua: aua o mea valea ia ia te ia: na te le mafai foi ona iloa, aua e faamasinoina faaleagaga” (1 Korinito 2:14).

Ina ia galue le Tusi a Mamona o se mata faaleagaga, e tatau ona tatou talia ma mulimuli faamaoni i le valaaulia a Moronae i le Moronae 10:3–5. O se valaaulia faatasi ma se folafoalga e faapea o le Atua “o le a faaali mai le moni o ia mea ia te outou, i le mana o le Agaga Paia” (fuaiupu e 4; ua faaopoopo le faamamafa).

## Molimau ma le Faafetai

Ina ia aloese mai le tauaso faaleagaga, sa tuu ai e atalii o Liae o latou ola i se tulaga lamatia ina ia maua mai papatusi apamemea (tagai 1 Nifae 3–4). Ana le seanoa papatusi, “po ua [latou] faaitiitia i le lē talitonu” (Mosaea 1:5). O le aso, e faafetai mo le masini lomitusi ma meafaigaluega faafuainumera, ua faigofie atu ma vave atu ona tatou maua ai tusitusiga paia. Ae peitai, e tau leai se eseesega ia Satani, pe na te taofia tagata mai le mauaina o tusitusiga paia—o lana fuafuaga i le Vaitau Pogisa—po o le faaososooso o tagata ia le faitauina—o lana fuafuaga i aso e gata ai. O le fea lava le

ala, o ana “puao o le pogisa ua [manuia] . . . i le *faatauaso* o mata . . . o le fanauga a tagata . . . latou te fano ma se ai” (1 Nifae 12:17; ua faaopoopo le faamamafa).

E pei o au vai tului mata *i aso uma*, e na o le “piimau *pea* i le āi uamea” (1 Nifae 8:30; ua faaopoopo le faamamafa) e mafai ai ona tatou aloese mai le faatauasoina e puao pogisa o aso e gata ai ia ua matuai poto ma taatele. Soo se taimi e le toaga pe tuua ai e se tagata le Ekalesia, e toetoe lava a mautinoa o lena tagata ua le toe faitauina le Tusi a Mamona.

O Le Tusi a Mamona: O Se Tasi Molimau ia Iesu Keriso e moni lava o se galuega taura ma le ofoofogia. O se

***o mata =  
latou te vaavaai***

5.

*molimau vaaitino* lona lua ia Iesu Keriso ma Lana talalelei matagofie, ua ofoina mai ai itu lelei uma o se mata lona lua.

Tau ina ia tatou pipiimau pea i le ai uamea, ina ia mafai foi ona tatou agavaa i le faamemelo a le Faaola i Ona soo: “Amuia o outou mata, aua ua vaavaai” (Mataio 13:16). ■

## FAAMATALAGA

1. Tagai Mataio 9:27–31; 12:22–23; 15:30–31; 21:14; Mareko 8:22–26; 10:46–52; Luka 7:21–22; Ioane 9; 3 Nifae 17:7–9; 26:15.
2. Tagai “Binocular Vision,” Wikipedia, en.wikipedia.org.
3. Tagai Randolph Blake and Robert Fox, “The Psychophysical Inquiry into Binocular Summation,” *Perception & Psychophysics*, vol. 14, nu. 1 (1973), 161–68; tagai foi “Binocular vision.”
4. Tagai “Vergence,” Wikipedia, en.wikipedia.org.
5. “Binocular Vision.”
6. “Binocular Vision.”
7. *Aoaoga a Peresitene o le Ekalesia: Ezra Taft Benson* (2014), 259.
8. Tagai “Binocular Vision.”
9. “Peripheral Vision,” Wikipedia, en.wikipedia.org.
10. *Teachings: Ezra Taft Benson*, 18; ua faaopoopo le faamamafa.
11. *Aoaoga: Ezra Taft Benson*, 231.

# O Vavega

## ALOFA E FITU I LE ALA

Saunia e Ephrem Smith

**A**o ou aoaoina ma auauna atu i le tele o tagata lelei i le Misiona a Texas Fort Worth, sa masani ona ou tomanatu ai i lou olaga faamanuiaina. E faapitoa ona ou maofa i le fitu o ou aafiaga, lea ou te taua o vavega.

Muamua, sa ou ola pea i le amataga o lou olaga, lea sa amataina i tulaga aupito sili ona faatauvaa. Sa ou fanau i luga o le fola palapala o le faleoo o si ou tina i Dessie Etiopia. O Tina, na o le pau lea o le tagata o lou aiga sa ou iloaina, ma sa ia fauina nao ia lava le ma faleoo foliga lapotopoto e valu futu (2.4 m) le tele, e faaaoga ai laau ma le palapala lea sa ia ufiina i vao ma laulaau. O le matou nuu sa leai se suavai mama ma ni mea e faaaoga i faleletaua. O le mai ma le oti sa taatele i le matou *kebele*, po o le pitonuu. O meaai sa faigata tele ona maua, ma sa le mafai ona ma faatauina mai. E leai se aso sa ma le iloaina ai ma lou tina le mea e tau o le fiaai.

Ina ua fa ou tausaga, sa mai tigaina ai lou tina na lata ina oti. I si ana taumafaiga mulimuli lava, sa ma savavali faatosotosololoa atu ai i se falemai, lea na maliu ai si ou tina peleina, ma le vaivai. Sa laveai au e le aufaigaluega a le falemai mai le olaga i luga o le alatele ma le oti i le matelaina, e ala i le faia o feutagaiga mo au ou te nofo i se nofoaga o tamaiti matuaoti i le aai o Addis Ababa, o le laumua o Etiopia.

O le vavega lona lua na oo mai i le suiga faafuasei o lou olaga. I le nofoaga lenei o tamaiti matuaoti, sa ou nofo ai i se fale mama, moe i luga o se moega moi, ma ai meaai uma sa ou manao ai. Sa oo foi i isi tamaiti matuaoti le aafiaga o le maliu o se tasi e pele ia i latou, ma sa latou aoaoina au i le ala e taulima ai le maliu o si ou tina. I afiafi, sa matou faapotopoto e usu pese faaPeretania ma tatalo i le faaAmaharika, o le matou gagana moni lea. Sa matou tatalo mo le tasi ma le isi, ma ole





## *Ua faamanuiaina e le Alii lou olaga i vavega ua fesoasoani ia te au ou te mulimuli ai i le ala o loo ia te Ia mo au.*

atu i le Atua e faamanuia i matou ina ia vaetamaina i ni “aiga lelei, agalelei ma alolofa.” O musika ma tatalo na faia se aafia ga tele i lou olaga. Ou te lei tuua lava le tatalo.

Lona tolu, sa faailoa atu au i faifeautalai ma le Eklesia i le valu o ou tausaga. Sa valaaulia au e matamata i le faapaiaga o le uluai falelotu a le Eklesia AAG i Etiopia, i le aso Sa, 30 Novema, 2003. I le faapaiaga sa ou lagonaina ai le uunaiga mamana a le Agaga Paia, ma sa susulu mai i faifeautalai sa auai le olioli, fiafia, ma lena lava agaga mamana. Ou te manatua [lou] mafaufau faapea, ou te fia pei lava o i latou. Ae sa ou le iloa pe faapefea ona ou ausia lenei sini.

O le vavega lona fa, sa lei umi lava ae oo mai. Sa vaetamaina au e se aiga i le Iunaite Setete. Sa sau lou tama fou ma piki au mai le nofoaga o tamaiti matuaoti ma ave au i le fale. Sa matou amataina le faagasologa o le faamasani, ma sa amata ona ou masani i lou siosiomaga fou.

E anoanoai luitau na aliae mai i le taimi lava na ou tauuu ai. Soo se mea lava sa ou alu i ai, sa talie tagata i lau faaPeretania. O le le lelei o au aoga sa mafua ai ni faafituali i le aoga. Sa ou tatalo mo se fesoasoani, ona ou galue malosi atili lea ma le poto e pupuni le ava o le atamai, ae maise lava i le faaPeretania. Ma sa toe tali mai foi le Tama Faalelagi i au tatalo. O le lua tausaga mulimuli ane, sa ou misia ai ma le mitamita se vasega.

Ona faaletonu ai lea o lou olaga i le aiga. O talosaga i le Alii, sini maualuluga faaletagata lava ia, ma se naunau-taiga loloto ia faamanuiaina, sa talitalia au i lena taimi sili ona faigata. Mulimuli ane, faatasi ai ma le fesoasoani a se tagata faigaluega i agafesootai, sa ma malilie ai ma lou tama e faamuta le vaetamaga. Sa o se taimi lenei mo tatalo, onosai, faatuatua, ma le fesoasoani mai le Tama Faalelagi.

O le taimi lenei i le 15 o [ou] tausaga, sa ou nofo ai pe tusa o se tausaga ma se aiga e vaaia au. O le taimi lena na oo mai ai le vavega lona lima. Ao matou tietie faasee

[i le kiona] ma ni uo se toalua, sa ou feiloi i se aiga o le AAG sa i ai se fanau teine lelei e toalua. Ao matou tietie mai i le fale, sa faapea leoteli ane se tasi o teineitiit, “Ou te manatu e finagalo le Alii tatou te vaetamaina ia Ephrem Smith.” O le mea e malie ai, sa maua foi e le isi vaega e toatolu o le aiga lena lava musumusuga e tasi. O le tama e faigaluega i le Matagaluega o Auauanga Tau i Agafesootai, ma e lei leva ae ou siitia atu i lou aiga fou. Mai lava i le amataga, sa tuuina mai ai e lou tama fou maoae lou fitalia. Mo se faataitaiga, sa ia faamalamalama mai, o le latou aiga e o i le lotu i aso Sa. Sa ia faatagaina au e filifili e auai ma i latou pe nofo i le fale; sa ia fai mai, o le a latou alolofa pea ia te au pe afai ou te filifili e le alu i le lotu. Sa ou filifili e auai i le lotu, ma talu mai lena taimi na ou faia ai le tele o isi faaiuga amiontonu.

O le vavega lona ono na oo mai ina ua ou mauaina se molimau o le talalelei. I se tasi aso Sa, sa ou saofai ai i le sauniga faamanatuga ma usu le [viiga] “Ou Te Tu ma Ofo” (Viiga, nu. 107). Sa amata ona tafe ifo loimata i ou alafau ao ou mauaina se molimau patino o Iesu o le Keriso ma o le Eklesia o Lana Eklesia lea.

Mulimuli ane, o le iva tausaga mulimuli ane, na ou iloa ai le auala e avea ai e faapei o na faifeautalai! O le matua e mafai ona avea ai ma se faifeautalai lea ua 18, ae peitai, sa lei maea lelei pepa o lou vaetamaga. Sa ou faatali mo ni masina uumi se fitu seja oo ina faamaeaina lou vaetamaga. Mulimuli ane, na mafai ona auina atu ou pepa o le misiona. O le fa o aso mulimuli ane, sa ou mauaina ai lou valaauga o le misiona. I le na o le tasi le vaiaso, sa faamanuiaina ai au e le Alii i pepa faaiu o le vaetamaga ma se valaauga o le misiona. Ou te matuai faapelepele i na pepa e lua! O lau vavega lona fitu na. Ioe, e moni lava, e tele ni vavega i le ala mai lava i lena faleoo palapala i Etiopia seja oo mai i lau misiona faapelepele. ■

*E alala le tusitala i Nevada, ISA.*

# O MAI, MULIMULI MAI IA TE AU: Aoaoina o Mea Faavae i le Aiga

**Saunia e Alicia Stanton ma Natalie Campbell**

**E** pei ona aoao mai e le aunoa ia perofeta, “O lo tatou manuia, faaletagata lava ia ma o se Ekalesia, o le a matua faalagolago lea i le ala o loo tatou taulai atu ai ma le faamamoni i le ola ai i le talalelei i le aiga.”<sup>1</sup>

O le ola i le talalelei o le auala sili lea e aoao mai ma aoao atu ai le talalelei. Ao tatou ola i nei aaooga faavae, o le a tatou aumaia o tatou aiga ma i tatou lava ia latalata atili atu i le Agaga. Faatasi ai ma le fesoasoani a le Agaga, e mafai ai ona sili atu ona tatou aoao atu ma aoao mai nei mataupu faavae. O le a taialaina i tatou i metotia faaleaoaoga e sili ona aoga mo o tatou manaoga ma tulaga ma, faatasi ai ma o tatou aiga, e ola latalata atili ai i le Faaola.



O le mulimuli ai i faataitaiga a nei tagata o le ekalesia, e mafai foi ona e aumaia ai mataupu faavae mai le mataupu aoaoina a le autalavou i totonu o lou aiga.



# IULAI

## Sauniga ma Feagaiga

Sauniga o le Perisitua ma feagaiga paia—o folafolaga tatou te faia ma le Tama Faalelagi—e aumaia ai faamunuiga mamana i o tatou olaga. O se tasi o auala e vaiafaalemafafau ai i faamoemoega o sauniga o le mafaufau lea i ai o ni maa e faailoa ai le mamao i maila o se auala e toe oo atu ai le afioaga o le Tama Faalelagi—le ola e faavavau. Tatou te tumau i luga o lena auala e ala i le tausia o feagaiga na tatou faia.

Mo se faataitaiga, ua faamatala e se tamaitai talavou le ala ua tumau ai o ia i le auala o le feagaiga: “Sa i ai se taimi na talosaga mai ai se tagata o lau vasega mo se fesoasoani. Ou te lei ano tele i ai, sa na ona tuu atu ia te ia o le fesoasoani sa ia manaomia. Ae mulimuli ane, sa faamanatu mai e le Agaga ia te au, o le fesoasoani atu e tauave ana avega, sa ou tausia ai feagaiga na ou faia i le taimi na ou papatiso ai (tagai Mosaea 18:8–10). Ou te faafetai mo avanoa e tuuina mai e le Tama Faalelagi ia te au i aso uma e filifili ai e savali i le auala o le feagaiga.”

I le avea ai o se aiga, atonu tou te faailoa mai sauniga o loo manaomia lava ona maua e tagata taitoatasi o le aiga, ona iloilo lea po o le a le lelei o lou tausia o feagaiga sa e faia. Mo se faataitaiga, o le a se mea o atagia mai i au tapenapenaga ia maua le sauniga faalevaiaso o le faamanatuga e faataatau i lou tautino i au feagaiga? E mafai e le Agaga Paia ona aoao oe i auala e fai ai mea e faaleleia atili.



LUGA: ATA NA TUSA/E DAVID STOKER

## AOKUSO:

### Faaipoipoga ma le Aiga

O le faaipoipoga ma le aiga e totonugalemu i lo tatou fiafia ma i le ata o le faaoataga a le Tama Faalelagi. O le aiga o le iunite faavae i le olaga nei ma le faavavau.

O le aoaoina o lau fanau e uiga i le faaipoipoga ma le aiga e mafai ona faigofie e pei o le faasoaina atu o se aafiaga patino. Sa faasoai mai e se talavou matua auala sa ia maua ai se agaga faafetai mo lona faamauga i le malumalu:

“Ou te manatua le nofo toatasi ai i se potu selestitila avanoa o le malumalu. Sa ou popole, sa ou le iloa pe o le a ou faamau i le malumalu i lena aso ona o se feeseseseaiga i le fesootaiga e uiga i pepa faataga na manaomia e lau paaga.

“Sa amata ona ou tatalo faatauanau ina ia faataga i maua e le Alii ona faamauina i Lona malumalu i lena aso. Ao ou faia, na oo mai se manatu ia te au: E ui lava ina na o oe i le potu selesitila, o le malo selesitila e selesitila, aua o le a le na o oe. O le a e i ai faatasi ma lou aiga e faavavau ma lou aiga faalelagi. O le mafuaaga lena e faamauina ai oe.

“O le fasefulu minute ma ni nai telefoni mulimuli ane, na mafai loa ona faamauina i maua ma lou toalua. Sa lofituina au i le agaga faafetai ma le matuu atu o le popole. Sa oo ina anoa atili le sauniga ia te au ona e mafai ona ma atinaeina se olaga selesitila faatasi ma le Atua i le mea o le a le mafai ona tuuatoatasi ai.”

O a ni aafiaga na aoaoina ai oe e uiga i le matafaioi o le faaipoipoga ma le aiga i le fuafuaga a le Tama Faalelagi? E mafai e le Agaga Paia ona fesoasoani e te manatua ma faasoai atu aafiaga talafeagai. E tusa lava po o le a le tulaga o lou aiga, e mafai e le Agaga Paia ona aoao oe i auala e faaaoga ai mataupu faavae o le faaipoipoga ma le aiga i lou olaga.





## SETEMA: Poloaiga

O poloaiga o tulafono ma tulaga e manaomia ua tuuina mai e se Tama Faalelagi alofa e faamanuia ai o tatou olaga.

O se tasi o auala mamana e aoao ai i latou, e ala lea i le nuesue o tusitusiga paia e aoao ai e uiga i faamanuiaga e oo mai mai le usiusitai, e pei ona sa faia e le talavou matua lenei:

“A ou nuesue i se poloaiga, ou te fiafia e faitau i mau uma e mafai ona ou maua e uiga i ai, ma faia se lisi o faamanuiaga ua folafola mai e le Tama Faalelagi mo lou usiusitai. O le aoao atili i faamanuiaga folafolaina ua faamalosia ai lau molimau e alofa le Tama Faalelagi ia te au ma finagalo e faamanuia mai au.”

Ina ia aoao mai pe aoao atu e uiga i poloaiga, e mafai ona outou faitau ma lau fanau le lesona 4 i le mataupu e 3 o le *Talai Lau Talalelei*, nuesue i mau e faatatau i ai, ma fai a outou lava lisi o faamanuiaga folafolaina. E mafai ona outou faaaogaina lenei faiga e aoao ai i faamanuiaga e faatatau i soo se mataupu faavae o le talalelei.



## OKETOPA:

### Avea Atili e Faapei o Keriso

I le galuega a Keriso, sa ia poloaiina ai i tatou, “O lenei, ia atoatoa ona lelei o la outou amio, e pei o lo outou Tamā o i le lagi e atoatoa ona lelei o ia” (Mataio 5:48). Tatou te taumafai atu i le atoatoa pe a tatou galalue i le atinaeina o se tasi o uiga e tele auaumama o Keriso i le taimi ma taumafai e faaleleia lena vaega faatasi ai ma Lana fesoasoani. Sa amataina e se tasi alii talavou i le galue i le maelega.

“Sa ou manao e atinae ni uiga auaumama se tele o Keriso, o lea sa ou suesueina ai au tusitusiga paia ma le *Talai Lau Talalelei*. I le mataupu e 6 o le *Talai Lau Talalelei*, sa ou tau ai i se mamanu ua fautuaina mai mo le atinaeina o uiga faaKeriso ma filifili ai loa e faataitai i le uiga o le maelega. Sa ou tusia muamua i lalo lau lava faauigaga o le maelega ma au fesili e uiga i ai. Ona ou sueina lea i mau fautuaina e faatatau i le maelega ma faamau-mau ou lagona ma tali sa ou mauaina ao ou faitau. Ina ua uma lena, sa ou faatuina se sini ina ia maelega atili i au meaaoga, ma sa oo ina ou lagona ai le uunaia atili i taimi uma ao ou tatalo i po taitasi mo le maelega.”

Ao e taumafai e atinae ma aoao lau fanau i auala e atinae ai uiga faaKeriso, e mafai ona fesoasoani punaoa o le Ekalesia e te iloa ai le mea e amata ai. E tuuina mai i taimi uma i mau ia faataitaiga a Keriso, ma o punaoa e pei o le *Talai Lau Talalelei* ua ofo mai ai mamanu e fesoasoani tatou te faatuina ai ni faiga masani o le nuesue ma faatutu ni sini. Pe a faaaoga faatasi, e fesoasoani tusitusiga paia ma isi punaoa

tatou te faaaoga ai mea tatou te  
aoaoina ina ia mafai ona  
tatou avea atili e faapei  
o Keriso.



# NOVEMA

## Ola Tutoatasi Faaleagaga ma le Faaletino



O le atinaeina o le ola tutoatasi o lona uiga, o le faaaogaina o lo tatou faitalia e tausia ai i tatou lava ma o tatou aiga, ma le faia o le mea sili tatou te mafai e sue ai fofo i a tatou lava faafitauli. O le faateleina o le ola tutoatasi e tuuina mai ai ia i tatou le gafatia faateleina e auauna ai i o tatou aiga, le Ekalesia ma o tatou alalafaga. O se tasi o auala sili ona lelei e aoao ai nei mataupu e ala lea i faataitaiga, e pei ona faamatala mai e le tagata lenei o le ekalesia:

“Mo se umi e mafai ona ou manatua ai, e alapo ai lou tina i aso taitasi e duesue tusitusiga paia. Ua ou vaai i le ala ua ia atinaeina ai le malosi faaleagaga lea na fesoasoani ia te ia i taimi faigata. E faalagolago o ia i lana lava mafutaga ma le Tama Faalelagi e fai ma ona fesoasoani. Faatasi ai ma lona malosiaga faaleagaga, ou te maofa lava i lona mafai ona tausia lo matou aiga. Sa ou vaai o ia paketi, ositaulaga mea sa ia manaomia, saili i aoaoga, ma faaalia le tele o le lotomaualalo i auala na faapea ona mafai ai ona ia taulimaina manoga tautupe a le matou aiga ma i ai pea i le fale mo lana fanau i le tuua o le aoga. Ou te manao i le ituaiga malosi lea o loo ia te ia, ma ou te matuai faafetai mo lana faataitaiga ua aoao ai au i le ala e maua ai.”

E mafai faapefea ona avea oe ma se faataitaiga lelei atu o le ola faasoasoa lelei i lau fanau? Afai e le tele ni mea ua e iloa e uiga i vaega faapitoa o le ola tutoatasi, e mafai ona e valaaulia lau fanau e aoao faatasi ma oe, o lena mea o le a avea ma se faataitaiga sili lava.

# TESEMA

## Fausiaina o le Malo o le Atua i Aso e Gata Ai

“E iloa e ai po ua fai oe ma masiofo ona o se aso faapenei?” (Eseta 4:14). O le ituaiga fesili lenei e mafai ona e fesili ai ia te oe lava ma lau fanau ao outou iloa o a outou matafai i le fausia o le malo o le Atua.

Sa iloa e lenei tagata o le ekalesia ona faalagolago i le Alii e fesoasoani ia te ia i le fausia o le malo: “Ou te manatua le aoaoina o au e ou matua mai lava o ou laititi, tatou te talia i taimi uma o tatou valaauga ona e tuuina mai e le Alii. Ao ou i ai i le kolisi, sa tuuina mai ai ia te au le valaauga o le peresitene o le Aualofa. Sa lofituina au, ae sa lei oo mai lava i lou mafaufau e faapea e fai atu leai. O lea sa amata ai le tausaga i le silia ma le 100 tamaitai e vaai, itiiti se potomasani, ma le faatuatua o le a faaatoa e le Alii mea e le o atoa. O se tausaga mulimuli ane sa faamaloloina ai au. A ou toe tepa i taimi o faaialiga, i taimi na ou iloa lelei ai lava po o le a le lesona e fai po o manatu e faasoa atu, po o taimi e tele e fai mai ai e se tasi se meaai mo au ona sa ou pisi tele e fai se kuka, po o le faaputuga o faamatalaga faamalosiau sa ou mauaina, sa ou iloa ma se mautinoa, sa faalauteleina e le Alii au taumafaiga i le fausiaina o le malo.”

Ao outou mafaufau ma lau fanau i auala e fausia ai le malo o le Atua, manatua e ofo atu ia i latou le faamalosiauga ma avanoa e auauna atu ai. Atonu e te mafaufau e talanoa i auala e auauna atu ai i isi i valaauga o loo ia te oe. O a isi auala e mafai ona e fesoasoani ai e faaagai i luma le galuega? E le afaina po o fea e te auauna ai, e taua au taumafaiga. E pei ona saunoa Peresitene Dieter F. Uchtdorf, Fesoasoani Lua i le Au

Peresitene Sili, “Tutu faaputupu faatasi ma faamaualuga le mea [e te] tu ai.”<sup>2</sup> ■

*E alala tusitala i Iuta, ISA.*



### FAAMATALAGA

1. Spencer W. Kimball, “Living the Gospel in the Home,” *Ensign*, Oke 1978, 101; tagai foi L. Tom Perry, “O Le Avea ma Soo,” *Liahona*, Ian. 2001, 72.
2. Dieter F. Uchtdorf, “Faamaualuga Le Mea E Te Tu Ai,” *Liahona*, Nov. 2008, 56.

*O le vaega 1 o le tusiga lenei sa lomiaina ia Ianuari 2016*  
*Liahona.*



**Saunia e David A. Edwards**

Mekasini a le Ekalesia

**I**le talafaasolopito atoa, e le mafaitaulia tagata ua fesili i le fesili na tuuina mai e Iopu: “Afaí e oti le tagata, e toe ola mai ea o ia?” (Iopu 14:14). Ina ia alaga “Ioe!” e tali atu ai i sea fesili, o le avanoa maoae lea o i latou ua i ai se molimau ia Iesu Keriso ma Lona Toetu.

Ae o le toatele o i latou o loo siomia i tatou e ola i lenei olaga e “aunoa foi ma le Atua i le lalolagi” (Efeso 2:12) ma e tatau ona iloatino le va o mea moni ma talitonuga eseese e faatatau i le oti. Mo se tasi, ua i ai le faamaoniga o mea latou te matauina patino, po o le “mea moni le manaia” e faapea, o le oti e aoao ma maoti—latou te lei vaai lava i se tasi o toe foi mai ai. O loo i ai foi lipoti salalau solo o aafiaga na toetoe a oo ai i le oti, ma le maeu o le laugatasia o ia [aafiaga]. Ma e i ai foi le mea moni e faapea, o aganuu a tagata i le lalolagi atoa, na i ai lava i taimi uma se ituaiga o manatu e uiga i le olaga i tua atu o le oti, o le isi tulaga laugatasia o loo tauanau mai se faamalamalamaga.

Ae o le faamautinoaga o o tatou olaga e le muta i le oti, e sau mai i le Atua, o le ua faaalia mai, mai lava i le amataga e ala i le anoano o molimau, e aofia ai perofeta, aposetolo, ma le mea aupito taua, o le Agaga Paia.

# OLEALE MEA UA TATOU ILOA E UIGA I LE Olaga pe a mavae

*"Afai e oti le tagata, e toe ola mai ea o ia?" Ioe! Ona a lea?*

# le Oti?

## Mai le Amataga

O le ata o le faaoataga ma aoaoina muamua lava i lenei lalolagi ia Atamu ma Eva, o tatou uluai matua. Sa laua aoao e uiga i le talalelei a Iesu Keriso ma le ala e toe foi atu ai i le afioaga o le Tama Faalelagi—ma sa laua malamalamā o le *toe foi atu* o lona uiga sa tatou i ai muamua faatasi ma Ia. O lea la, mai le amataga, sa manino lelei Atamu ma Eva o lenei olaga, e le na o le pau lea o le mea e i ai. Sa laua iloa—ma aoaoina a laua fanau—ona o le Togiola a Iesu Keriso, o le a latou toetutu pe a mavae lenei olaga ma, afai sa latou usiusitai, e maua le ola e faavavau (tagai Mose 5:10–12).

Ua fautua mai e manatu faalelalolagi e faapea, o le talitonuga i se olaga i tua atu o le oti o se taunuuga e tasi lava o se manaoga aoao faalemafaufau. Ae nai lo o lena, o le manatu lautele e uiga i le olaga pe a mavae le oti, e faatusa i se ituaiga o manatuga faaletupuaga pe aotele (pe afai e le o se manatuaga i le muai olaga) o le mea sa faaali mai i le amataga ona tuufaasolo ai lea mai lea tupulaga i lea tupulaga. O le mea sa saunoa mai ai Peresitene Iosefa F. Samita (1838–1918) e uiga i nisi o faiga masani a tapuaiga e faatatau foi i talitonuga masani e pei o le olaga pe a mavae le oti: “E mautinoa lava o le malamalamā e uiga i [ai] . . . sa aveina atu e le fanau a Atamu i atunuu uma, ma faaauau atu ai . . . ia Noa . . . ia i latou o e na suitulaga ia te ia, ma salalau atu ai i malo ma atunuu uma” (“Discourse,” *Deseret News*, Fep. 19, 1873, 36).

O le mea lena, o le manatu e uiga i se olaga i tua atu o le olaga lenei, ua matuai aoao lava ona o lona afuaga e taimi tutusa lava ma le afuaga o le tagata soifua lava ia.

## O Upumoni Manino ma Taua

I le avea ai ma tagata o le Au Paia o Aso e Gata Ai, e mafai ona tatou fesoasoani e aumai le faamoemoe i olaga o i latou o e ola e aunoa ma le Atua i le lalolagi, e ala i le tuuina atu ma le mautinoa o la tatou molimau i le mea moni o lo tatou i ai: o le oti e le o le mutaaga lea. Ma le isi, e mafai ona tatou talia le tele o fesili e uiga i le olaga pe a mavae le oti ona o upumoni manino ma taua o le talalelei

toefuataiina ua faapea ona faaalia mai. O ni tali pupuu nei i ni nai fesili faapena.

**O le a le mea e tupu ia i tatou i le taimi tonu tatou te oti ai?**

I le taimi o le oti, e tuuveseese ai o tatou agaga mai o tatou tino ona ulu atu lea i le lalolagi o agaga (tagai Iakopo 2:26; Alema 40:11).

**E faapei o tatou agaga?**

O o tatou agaga e foliga lava e pei ona sa i ai i le olaga i le muai olaga: o tino tagata ua atoatoa le tupu i se tagata matua (tagai Eteru 3:16; *Aoaoga a Peresitene o le Ekalesia: Iosefa F. Samita* [1998], 132–33). A mavae le oti, o le a i ai i o tatou agaga ia lava uiga faaalia, mea e fiafia ai, ma manao, ia sa ia i tatou i le taimi na tatou oti faaletino ai i le lalolagi (tagai Alema 34:34).

**O le a le agaga?**

O le agaga o se ituaiga o mea e tino mai, ae “ua sili atu ona lelei pe mamā” (MF&F 131:7).

**E faapei le lalolagi o agaga?**

E lua tulaga po o vaega autu e i ai i agaga i le lalolagi o agaga: o le parataiso ma le falepuipui o agaga. O agaga amiontonu e o i le parataiso, o se “nofoaga e malolo ai, o se nofoaga o le filemu o le a latou malolo ai mai i o latou faalavelave uma ma mai le popole uma, ma le faanoanoa” (Alema 40:12). O agaga o tagata o e e lei taliaina lava le talalelei a Iesu Keriso, e faapea e i ai i le falepuipui o agaga (tagai 1 Peteru 3:18–20). E mafai lava ona latou filifili i le lelei po o le leaga, ma talia pe teena le talalelei. E mafai e agaga o loo i le parataiso ona talai atu le talalelei ia i latou (tagai MFF 138). O i latou o e ua umi se taimi o tuuveseeseina o latou agaga ma tino, ua manatu i lenei tuuveseeseiga o “se pologa” (MF&F 45:17; 138:50).

**O le a le lagi?**

O le lagi ua tele lava ina malamalamama i ai, o le nofoaga lea o loo afio ai le Atua, ma o le nofoaga e iu ina mafai ona nonofo ai tagata amiontonu. I lenei tulaga, e ese mai ai i le parataiso o le lalolagi o agaga.

**O le a lena mea o le seoli?**

I tusitusiga paia, o *seoli* e mafai ona faatatau i se mea e tasi pe lua: (1) “o le nofoaga le tumau i le lalolagi o agaga mo i latou o e na le usiusitai i le olaga faaletino” po o le (2) “o le nofoaga tumau lea o e lē faaolaina i le



togiola a Iesu Keriso” (Taiala i Tusitusiga Paia, “Seoli,” scriptures.lds.org). I se faauigaga faalauaitele, o le tulaga faaleagaga e tigaina ai i latou o e na teenaina le talalelei. Na aoao mai Iosefa Samita: “O le tiga matautia o agaga ua o ese atu . . . o le iloa lea ua latou le mauaina le mamalu ua fiafia ai isi ma sa ono mafai ona o latou fiafia ai foi, ma o i latou lava e tuua’ia” (*Aoaoga a Peresitene o le Ekalesia: Iosefa Samita* [2007], 238).

**O le a le toetu?**

O le toetu o le toe faatasia o le agaga ma le tino i se tulaga atoatoa, e le toe oti (tagai Alema 11:43).

**O ai o le a toetu?**

O tagata uma o e na ola i le lalolagi o le a toetutu (tagai 1 Korinito 15:22; Alema 11:44).

**O le a le taimi o le a tatou toetutu ai?**

E eseese taimi o le a toetutu ai tagata? O le Toetu o Iesu Keriso sa failogaina i le Uluai Toetu, po o le toetutu o e amiontonu. O nisi tagata amiontonu ua uma ona toetutu talu mai lena taimi. A mavae le Afio Mai Faalua o Iesu Keriso,



o le a toatele isi tagata amiontonu o le a toetutu. I le taimi o le Meleniuma, o le a toetutu ai isi tagata lelei. A mavae le Meleniuma, o le a faapea ona toetutu ai tagata amioleaga. (Tagai MF&F 76:32–112; 88:97–101.)

#### **E faapei ia tino toetutu?**

O tino toetutu o aano ma ivi (tagai Luka 24:39), e le toe oo i ai le oti (tagai Alema 11:45), atoatoa (tagai Alema 11:43), faamamaluina ma matagofie. “E leai se mea e sili atu le matagofie e vaavaai i ai nai lo o se alii po o se tamaitai toetu” (Peresitene Lorenzo Snow [1814–1901], *The Teachings of Lorenzo Snow*, ed. Clyde J. Williams [1996], 99).

#### **O le a le mea e tupu pe a mavae lo tatou toetutu?**

A uma ona toetutu tagata uma ma faaiuina le Meleniuma, o le a aumai i tatou uma i le afioaga o le Atua ina ia faamasinoina e tusa ai ma a tatou upu, galuega, mafauauga, ma manao (tagai Faaaliga 20:12; Alema 12:14; MF&F 137:9). O Iesu Keriso o le a avea ma o tatou Faamasino (tagai Ioane 5:22, 27–29; Roma 14:10).

#### **O le a le mea e tupu pe a uma le Faamasinoga Mulimuli?**

A uma le Faamasinoga Mulimuli, o le a tatou maua se tasi o nei taui e faavavau:

*Malo selesitila:* o le maota o le Tama Faalelagi, Iesu Keriso, ma i latou uma o e ua agavaa mo le ola e faavavau e ala i le faia ma le tausia o feagaiga uma o le talalelei (tagai MF&F 76:50–70).

*Malo teresitila:* o le maota o na tagata lelei o e sa lei talia le talalelei a Iesu Keriso ae na mauaina i le lalolagi o agaga, o e sa lei totoa i le olaga i le molimau ia Iesu Keriso (tagai MF&F 76:71–80).

*Malo telesitila:* o le maota o i latou o e sa amioleaga ma sa lei talia le talalelei a Iesu Keriso, o e sa lei toetutu seiiloga e uma le Meleniuma (tagai MF&F 76:81–89)

*Faasalaga e le gata:* o le tulaga faaiu o atalii o le malaia, faapea foi ma le tiapolo ma ana agelu (tagai MF&F 76:31–49).

#### **O a mea o le a fai e tagata i le malo selesitila?**

O i latou o e o le a mautofi i le tikeri aupito maualuga o le malo selesitila o le a faaeaina, o lona uiga, o le a latou maua le ola e faavavau, avea e pei o lo tatou Tama Faalelagi, ma maua mea uma o loo i ai i le Tama. O le uiga o le avea e pei o le Tama Faalelagi, o le maua o Ona uiga auaumama o le atoatoa, e aofia ai le alofa ma le auauna atu.<sup>1</sup> O lona uiga foi, o le galulue faatasi i Lana galuega ma le mamalu, o le “ia aumaia le tino ola pea ma le ola faavavau o le tagata” (Mose 1:39). O le faaeaga e aofia ai le faamauina i le faaipoipoga mo le faavavau, nonofo i ni aiga e faavavau, ma maua ni fanau agaga e faavavau. (Tagai MF&F 76:59, 62; 130:2; 132:19–23.)

#### **O a mea a isi tagata e fai i isi malo?**

O i latou i isi malo o le a avea ma agelu, “o agelu ia o ni auauna galulue, e auauna atu ia te i latou o e ua agavaa mo se fuataga mamao tele atu, ma silisili atu na’uā, ma faavavau, o le mamalu” (MF&F 132:16). O le a latou le faaipoipo pe maua ni fanau agaga (tagai MF&F 131:1–4; 132:16–17). ■

#### **FAAMATALAGA**

1. “O le auauna atu e le o se mea tatou te tigaina ai i lenei lalolagi ina ia mafai ona tatou maua le aia tatau e ola ai i le malo selesitila. O le auauna atu o le mea tonu lea ua faia ai se olaga faaeaina i le malo selesitila” (Peresitene Marion G. Romney [1897–1988], *Fesoasoani Lua i le Au Peresitene Sili*, “O le Natura Selesitila o le Faalagolago o le Tagata Lava ia ia te ia,” *Liahona*, Ian. 1983, 174).



*Tatou te maua  
le olioli i  
taumafaiga  
masani o le oo  
i se liliuga o le  
loto pe a tatou  
talia le Togiola  
a Iesu Keriso i  
o tatou olaga.*

# O LE OO I SE Liliuga o le Loto



Saunia e Elder  
Edward Dube  
O Le Fitugafulu

**O**le ma ulumatua o Rosamele, sa o se pepe fou aulelei i le taimi na asiasi mai ai lou tina mai lona nuu i le ogatotonu o Zimbabwe. I le avea ai o ni matua fou lava, sa ma fiafia ai lava ma lou toalua o Naume i le asiasi mai o lou tina. Sa ma naunau lava e aoao mai ia mea uma e tatau ona ma iloa e uiga i le tausiga o se tamaitii.

Ina ua taunu mai, sa to mai i fafo e lou tina se asoa ie lapotopoto. Sa afifi totonu o le ie, o lana faamatala mai lea, ia se mea maneta. Sa ia faalala mai le asoa ia Naume e tuu i le ua o Rosamele. O le lagonaina o le faalotolotolua o Naume, sa vave ai ona faapea mai lou tina: "Mai lava i lou laitiiti na tuuina mai ai e lou tina ma lou tinamatua ia te au lenei mea maneta, lea sa puipuia au ma lau fanau uma lava, e aofia ai ma lou toalua. O lenei asoa o le a puipui ai lou afafine mai faamai ma mai soo se ituaiga faalauatau e ono oo ia te ia, ma o le a ia faatoilalo soo se tulaga faigata o le olaga. E tatau ona ia asoaina lenei asoa seja oo ina lima ona tausaga."

O le taimi lena, sa ou auauna atu o se peresitene o le paranesi, ma sa vave lava ona ou mafaufau, "O a manatu o tagata o le paranesi pe a latou vaai i lenei asoa 'faamaneta' i le ua o le ma pepe?" Ona ou mafaufau lea, "Atonu e mafai ona ma ufiufia ina ia tau le iloa mai ai." Sa ou tilotilo atu ia Naume; o ona foliga faaalalia sa tau mai ai ia te au, e le tatau ona ma talia lenei mealofo. Sa ou fesili atu i lou tina pe mafai ona ia faalaititia ma faamanifi le asoa, ina ia tau le iloa ai. Sa ia tali mai sa le mafai, ma e sili atu ona aoga le mea maneta i le faiga lea sa ia saunia ai.

Sa toe tilotilo mai Naume ia te au ma ni foliga ia sa tau manino mai ai lona le ioe i ai. Sa ou faliu atu i lou tina ma faamalamalama atu i ai, i le avea ai ma se peresitene o le paranesi i le matou aulotu, o le a ou le maua ni lagona lelei i le tuu o le asoa i le ma tama. Sa tali mai lou tina ma se lapataiga: sa fai mai o ia, a leai le asoa o le a oti le ma pepe.

## O Se Taimi Faigata o le Le Toa

O ni nai vaiaso talu ona mavae lenei mea na tupu, sa mai tigaina ai si ma tama laitiiti o Rosamele. Sa leai se ma tupe e ave ai o ia e vaai le fomai. Sa tupu i le po, ma i lena taimi sa amata ai ona ou mafaufau i le mea na fai mai ai lou tina i lana lapataiga. Sa amata ona ou mafaufau maimau pe ana ou talia le asoa. Semanu ou te aumaia ma tuu i le ua o Rosamele. I lena taimi o le le toa, sa ou faalogoiai ai se leo malu itiiti o tauanau mai au e faaali lou faatuatua i le Alii o Iesu Keriso. Sa vave ona fai ou ofu lelei o le aso Sa. Sa ou siiina mai le ma pepe ma tuuina i ai se faamanuiaga faaleperisitua. Sa ou lagona le toofilemu ma le toa lelei, ma sa ou iloaina sa faapena foi lagona o lou toalua. Na toetoe o le taimi lava lena, na momoe filemu ai Naume ma pepe Rosamele. Sa faamaloloina le ma tama teine o Rosamele. I aso na sosoo ai, sa faasolosolo malie ona toe manua ma toe maua atoa lona malosi. Oka se vavega na ma molimauina! Sa aapa mai le Alii i Lona alofa mutimutivale ia te au ma faamalosia lou faatuatua ia te Ia.

Sa ou faafetai ae sa ou matamuli laitiiti foi. O au lenei, o se faifeautalai ua uma se misiona ma o loo

auauna atu o se peresitene o le paranesi, ae sa sili atu ona ou popole i tala o le a fai e tagata nai lo o le talitonu i le Atua (tagai Mosaea 4:9). Ioe, e oo lava i lou tina, o le ou te alofa ma faamemelo tele i ai, e le mafai ona malamalama i mea uma. Sa ou manao-mia ona avea ma se tagata e sili atu nai lo na o se faifeautalai ua uma se misiona; se tagata e sili atu nai lo o se peresitene o le paranesi; sa manaomia ona ou liua: ia oo i le mea na oo i ai Alema.

### O Se Taimi o le Liliuga Tele

Atonu foi na iloilo totoa e Alema, le faitaulaga a le Tupu amioleaga o Noa, o ia lava ina ua fesili atu le perofeta o Apinati i le fesili sailili lenei: “Tou te lei faaaogaina o outou loto tou te malamalama ai; o lea, sa outou lē popoto. O lea, o ni a ua outou aoao atu i lenei nuu?” (Mosaea 12:27). E pei foi o Alema, sa ou manaomia se “liuga tele na oo mai i [lou] loto” (Alema 5:12).

I le avea ai ma se faitaulaga i le maota o le Tupu o Noa, sa masani ai Alema i se olaga o faamanuiaga. Sa ia maua se tupe e ola ai e ala i lafoga a le nuu. Sa ia fafia i se tulaga o le pule ma le lauiloa. Sa avea o ia ma se tasi o i latou o e sa “faafefeteina i le faamaualuluaga o o latou loto” (Mosaea 11:5). Ae ina ua iloa e Alema e uiga i le afio mai o le Faaola i le lalolagi—e uiga i Ana aoaoga, puapuaga, maliu, ma le Toetu ma o Iesu Keriso o “o le malamalama ma le ola o le lalolagi; ioe, o se malamalama e lē gata, e lē mafai lava ona faapouliuligia; ioe, ma se ola foi e lē gata, e lē mafai ona toe i ai se otí” (Mosaea 16:9)—sa saunia loa o ia e liliu. Sa sauni lava foi o ia e maliu pe a manaomia ai.

O le siomia ai i le tetee ma mea matautia e lamatia ai le ola, sa augani atu ma le lototele Alema i le Tupu o Noa ia tuu Apinati e alu ma le filemu. O faatinoga a Alema sa sau mai lona loto; sa ia lagona le alofa o le

Faaola sa faasafua atu ia te ia e ala i le perofeta a le Alii o Apinati.

Ina ua ofoina mai e lou tina se asoa o le puipuiga e tuu i le ua o lau pepe, sa faavae ou atugaluga i le vaaiga a tagata. Sa ou popole po o a ni manatu o le a i ai o tagata o le matou paranesi ia te au. O le mea moni, ou te lei oo atoatoa i lena “liuga tele o le loto.” Mai lava i lena taimi ua ou iloa ai, o lo tatou manuia ma le fafia e faavae i le, po o le a le atoatoa ua tatou naunau e molioo ai le talalelei i totonu o o tatou loto. Ina ia mafai ona tatou maua le fafia, olioli, ma le filemu, “e tatau ona gotouga ifo i totonu o o [tatou] loto le talalelei a Iesu Keriso . . . e ala i le mana o le Agaga Paia.”<sup>1</sup>

### O Se Avanoa e Molimau Atu Ai

Faatasi ai ma lenei ituaiga o suiga, o le tepa ae i le Faaola i mea uma ma i nofoaga uma, e mafai ai ona tatou aapa atu i isi. Sa oo ina avea Alema ma se faifeautalai malosi, sa aapa atu i le toatele [o tagata] ma faatu-laga le Ekalesia a Keriso i lona nuu o e sa sosola mai le Tupu o Noa.

Ua outou tagai i le ala na ou misia ai se avanoa e faasoat atu ai le talalelei i lou tina i le taimi sa ia ofo mai ai ia i maua lena mea maneta, lea sa ia talitonu sa puipuia ai i taimi uma o ia ma lana fanau? Semanu na mafai ona avea au ma se mea-faigaluega i aao o le Alii—e pei

*Sa ou stiina mai  
le ma pepe ma  
tuuina i ai se  
faamanuiaga  
faaleperisitua.*



### LILIUGA FAIFAIPEA

“E manaomia ona tatou lagonaina se liuaina faifai pea e ala i le faateleina o lo tatou faatuatua ia lesu Keriso ma lo tatou faamaoni i Lana talalelei i o tatou olaga atoa—e le na o le faatasi, ae ia faifai soo.”

Elder M. Russell Ballard o le Korama a Apostolo e Toasefululua, “Nofo i totonu o le Vaa ma Pipiimau!” *Liahona*, Nov. 2014, 90.





**Sa augani atu ma le lototele Alema i le Tupu o Noa  
ia tuu Apinati e alu ma le filemu.**

lava o Alema—o le sa talaiina atu le talalelei a Iesu Keriso ma “liua o latou loto; ioe, sa ia fafagu i latou mai se moe gase, ma sa latou ala mai i le Atua” (Alema 5:7).

Ao ou tomanatu i lena mea na tupu i lou tina, faamata o le a se mea semanu e tupu pe ana ou tali atu e pei o Alema. Atonu e fagua ai lou tina i le Atua, ma o lona liuga e mafai ona i ai se aafiaga lelei i nai ou tei. O lenei liuga e semanu e i ai se aafiaga tele i olaga o fanau a nai ou tei ma faasolo atu ai i a latou fanau.

O le liuga tele o Alema sa le gata ina lagona e i latou o e sa ia aoaoina, ma i latou o e sa ia molimau atu i ai, ae na faapena foi i lana fanau ma i latou e tupuga mai ia i latou. O lona atalii o Alema, ina ua talai atu i tagata i totonu ma faataamilo i le nuu o Saraemila, sa ia faamanatu atu ia i latou le molimau a lona tama i le Faaola o Iesu Keriso:

“Faauta, e mafai ona ou tau atu ia te outou—pe sa lei talitonu ea lo’u tamā o Alema i upu ia na tuuina mai i le fofoga o Apinati? . . .

“Ma e tusa ma lona faatuatua, sa i ai se liuga tele na oo mai i lona loto” (Alema 5:11–12).

Mo se tagata talavou e pei o Alema, o lenei liuga tele o le loto, lea na amataina e ala i le valaaulia a Apinati ina ia faaaaoga le loto o se tagata ia malamalamā ai i le afioga a le Atua, o le ki lea i lona fiafia ma le manuia i le aapa atu i isi: “Ma faauta, sa ia talai atu le afioga i o outou tamā, ma sa oo mai foi se liuga tele i o latou loto, ma sa latou faamaualala-loina i latou lava ma tuu atu lo latou faalagolago i le Atua moni ma soifua. Ma faauta, sa latou faamaoni seia oo i le iuga; o lea na faaolaina ai i latou.” (Alema 5:13).

### Fai se Liuga Faifaipea

O nisi o tagata talavou i aso nei ua maua i le va o le filifiliga o le mea e sao i le silafaga a le Atua po o le faamalieina o o latou matua po o tagata o loo vaaia i latou, o e atonu e le tutusa o latou lagona o loo i ai e uiga i le moni o le talalelei. Pe a feagai ma se filifiliga faapena, “Pe e fesoasoani lenei faaiguia ia ou lagona ai o au ‘galuega o galuega ia o le amiotonu’ (Alema 5:16), ma pe o ou lagonaina ai pea ‘le fia pepese i le pese o le alofa togiola?’ (Alema 5:26).

E ui e tatau ia i tatou uma ona alolofa ma faamemelo i o tatou matua, e tatau ona tatou iloa o filifiliga tatou te faia, o le a i ai se aafiaga tonu i luga o a tatou fanau ma i latou e tupuga mai ia i tatou. I nisi o i tatou, atonu e alagatatau le o ese mai o tatou siosiomaga ua masani ai, e pei ona sa faia e Alema, o le na sola ese mai auauna a le Tupu o Noa, ma aoao atu le talalelei i ni tulaga sili ona faigata. Sa ia aumaia le liliuga e le gata i lona aiga ae faapea foi i isi. Ina ia oo i se liliuga o le loto, e taua ona tatou mafaufau i isi ma “aufaatasi i le anapogi ma le tatalo malosi mo le manuia o agaga o i latou o e sa latou lē [iloa] le Atua” (Alema 6:6).

Ae faapefea pe ana le manuia Rosamele mai lona mai—e tusa lava pe na uma ona ou tuuina atu se faamaniuiga faaleperisitua ia te ia? O le apoapoiga a le Alii o se malosiaga tele lea ia te au: “O lē maua lona ola, e maumau ai ia te ia: a o le faamaumau i lona ola ona o au, e maua e ia” (Mataio 10:39).

Tatou te maua le olioli i taumafaiga fai soo o le oo i se liuga o le loto ao tatou talia le Togiola a Iesu Keriso i o tatou olaga. Ou te faafetai mo lenei malamalamā, ma ou te iloa i lou loto o lo tatou Faaola na afio atu, “ma mafatia i tiga ma puapuaga ma faaososoga o ituaiga eseese uma; ma o le a oo ia te ia nei mea, ina ia mafai ona faataunuina o le upu ua fai mai, o le a ia ave i ona luga tiga ma ma’i o ona tagata” (Alema 7:11). Ua ou iloa o loo i ai le saogalemu ma le puipuiga moni i le vaai atu i le Alii ma le mulimuli i Ana fautuaga. ■

### FAAMATALAGA

1. Henry B. Eyring, “We Must Raise Our Sights,” *Ensign*, Sete. 2004, 16.

# HUREI!

Saunia e G. Craig Kiser

*Sa fesoasoani se tamaitiiti e fa tausaga le matua ou te talisapaia le faamanatuga i se auala fou.*

**S**a taulai atu lou mafaufau i le Faaola Sao faauma e le au lotu ona usu le pese o le faamanatuga, ae ina ua ou amata ona tapuni le tusipese, sa faaau- au le musika. O se aulotu toatele i lena aso sa alagatatau ai i le ta okeni ona tata isi fuaiupu e lua ao faauma ona tofitofi e le au ositaulaga le falaoa. Sa ou faafetai mo le taimi faaopoopo. Sa mafai ai ona ou maua se taimi faaopoopo e mafaufau loloto ai ma le migao ao lei faia tatalo o le faamanatuga.

I le taimi o tatalo, sa ou mulimuli ma le totoa i upu na tautalagia e ositaulaga ao laua faamanuiaina faatusa o le ositaulaga a Keriso mo i tatou. Na fetaui lava le faaiuina o le tatalo mulimuli, ma i le taimi na faaleo ai e le aulotu lo latou loto i ai, sa maona ae i le ogatotonu o “amene” le leo o se tamaitiiti e fa tausaga le matua, mai laina e lua i tua atu o au.

“Hurei!” o lana alaga lea.

O lona lagona na oso faafuasei ae sa lava le leotele na mafua ai le featai o nisi o tamaiti na lata ane. Ou te

tautino atu, sa ou ataata le malamalama ai ma au ia.

“Hurei?” Sa ou mafaufau ai. O se tali ese lea i tatalo faamanatuga. Sa mautinoa lava o se tali ou te lei faa- logo muamua lava i ai ma atonu o le a le toe faalogoina lava. Aua, tatou te faaiuina a tatou tatalo i le “amene.”

Atonu na tele atu upumoni na lagona e lena tamaitiiti laitiiti nai lo o au.

O le *Hurei* e tau atu ai le fafia. O se alagaina o le olioli, e masani lava mo se manumalo. O nisi taimi e alaga- ina e faaalia ai le taliaina o se tasi ua

faamaeaina lelei se galuega faigata.<sup>1</sup>

O le taimi lava lena, na pue ai e lou mafaufau le manatu. Sa ou mafaufau, ioe, hurei ona ua manumalo Iesu Keriso i le oti ina ia mafai e i tatou uma ona toetutu. Hurei ona o Lona Togiola, ua mafai ai ona Ia faamagalo a tatou agasala! O le mea tonu lava, e mafai ona Ia faamagalo au i *au* agasala! Hurei ona o Lona alofa tunoa e mafai ai ona ou toe foi atu i lou Tama Faalelagi ma olioli i le faamoemoe o le ola e faavavau! Ioe! Hurei!

Ao ou alagaina ma le le leoa nei viiga o le faafetai i lou Tama Faalelagi, sa faatumulia lou loto e le Agaga Paia i se olioli lea na toetoe lava a ou tagi ai. Sa taitaiina au i lena aso e se tamaitiiti laitiiti (tagai Isaia 11:6), ma sa ou fafia ma se vaaiga fou mo faamanuiaga o le Togiola a le Faaola i lou olaga. ■

*E alala le tusitala i Oregon, ISA.*

## FAAMATALAGA

1. Tagai Merriam Webster's Collegiate Dictionary, 11th edition (2003), “hooray”; tagai foi I le en.wiktionary.org/wiki/hooray.



# E LEAI LA I LAU VAAVAAIGA!

Saunia e Brett J. Porter

*O le ki i lo tatou faamanuiaina o le alolofa i alii talavou ao tatou auauna atu ia i latou.*

Sa ou latalata atu i se aiga sa i ai se statii i Alii Talavou. I le taimi o se gaoioiga ao avea o ia ma se tiakono, sa otegia ai o ia e se taitai, ma faalumaina o ia i luma o lana tupulaga. Sa ia lagonaina mulimuli ane le tauvalea atili, ma le toe sau ai i gaoioiga, ma sailia ai ni uo i fafo atu o lana uarota.

Sa i ai se aafiaga tele o lena mea na tupu ia te au. Sa ou naunau o le a le tupu se mea faapena i lau vaavaaiga pe afai e valaauna au e galulue ma alii talavou. O le lua tausaga mulimuli ane sa valaauna ai au e galulue faatasi ma le au tiakono.

I totonus o nai masina, ae ou taulumaina ai se alii talavou o le sa fai soo lava lona tautalaitiiti ma lana amio.

“O le laina lea,” sa iu ina ou fai atu ai e faatatau i ana amioga. “Aua lava nei e sopo ai.”

Sa ia sopoainia, sa fai sina a maua finauga, ma ia aluese ai.

Mulimuli ane, sa ma talanoa ai e foia o maua feeseseaiga. Sa ou faapea atu, “Tavita, ou te alofa ia te oe, ma o oe o se alii talavou lelei, ae ou te le fafia i nisi o mea e te faia. E vaavaai atu isi alii talavou ia te oe o se taitai, ma afai e vaai atu e leai se mea e faia e uiga i au amioga le talafeagai, o le a latou faataitai ai foi.”

Sa ma toe faalelei, sa ia lagonaina le taliaina, ma sa matou fesoasoani o ni taitai e foia nisi o ona luitau patino. Ina ua atoa lona 14, sa ia fai mai ou te faauuina o ia o se aoao. O le aso, i ni tausaga mulimuli ane, na te tuuina mai se opo lapoa ia te au i soo se taimi lava e vaai ai ia te au, ma e talanoa ma le faamemelo e uiga i lona taimi i Alii Talavou.

A tatou alolofa i alii talavou ma fafia i le faatasi ai ma i latou, latou te iloa lava. O le pogai lena na matou

faaalia ai ma ou fesoasoani le fafia moni i a matou alii talavou. Matou te le faia lava se gaoioiga ona sa faatonu mai i le tusi, sa matou faia ona sa matou iloa o le a aoao ai e alii talavou se tomai, tuputupu ae ai, ma maua se taimi fafia.

I se tasi taimi, sa i ai se matou alii talavou sa lei fafia ona matua i la matou polokalama.

“E le afaina lea,” sa ou fai atu ai ia i laua, “ae e te lua malilie e sau pea le lua atalii, e aoao, ma maua sina taimi malie?”

Sa matou faaaofia o ia i le matou polokalama, ma e lei umi ae ioe mai ona matua ia auai atoatoa mai. Sa laua vaaia sa aoao ma fafia le la atalii. Mulimuli ane, sa ia auauna atu i se misiona talai. Sa tuputupu ae foi lona uso laitiiti ma faia foi se misiona.

Sa matou vaaia se sootaga i le va o taitai na fafia i se alii talavou, ma le aoao o lena alii talavou, tuputupu ae, ma iu ai ina faia se misiona. E faamalieina le vaavaai ai i le tuputupu ae o alii talavou, ma o se mea fafia le aoao faatasi ma i latou. O le ki i lo tatou faamanuiaina o le alolofa i alii talavou ao tatou auauna atu ia i latou. ■

*E alala le tusitala i Kalefonia, ISA*



# E MAFAI E TAGATA UMA ONA AOAO MAI I SE PEROFETA

**A**o 17 ou tausaga, sa ou faigaluega ai i se faletalimalo i Kailua-Kona, Hawaii, ISA. O le faigaluega ai o se ave ato a malo i faletalimalo, sa ou vaai ai i le toatele o malo lauiloa a faletalimalo, e aofia ai John Wayne, Dorothy L'Amour, ma Esther Williams.

I se tasi afiafi, i le mavae ai o le taunu mai o le tele o malo, sa fai sau malologa puupuu i le pito i luma o le faletalimalo, ae tu loa se limosini uliuli i le afega ae tulioso mai ai i fafo ni alii se toafitu, sa laei i ni ofuvae uumi uli, ofutino papae, ma ni fusiua. Sa i ai foi se isi alii sa suti uliuli sa o mai faatasi ma i latou. Ina ua uma ona paka e le avetaavale le latou taavale, sa o atu uma loa i latou i le potu ai mo le tau-mafataga o le afiafi. Sa ou faapea, sa foliga i latou o ni alii leoleo nana [FBI] ao ou toe foi i totonu e faaauau ou tiute o le tali atu i valaau mai i potu mo ni auaunaga.

Pe a ma se itula mulimuli ane, sa ou i ai i fafo e ula lau sikaleti, ae toe o mai loa i fafo le vaega lea sa ou vaai muamua i ai e toe foi atu i le latou limo, lea sa faatali atu i le paka. Sa latou o atu i le ala savali agai atu i le taavale ma tatala le faitotoa i tua e alu atu ai i totonu le alii sa laei i le suti uliuli. Ae nai lo o le ulu atu i le taavale, sa tu le tamaloa suti uliuli, liliu ma tilo-tilo mai ia te au o loo ou faalagolago i le fale, ma savali mai ia te au.

E umi ma paee o ia, ma se tioata e sio i uea ma se tamai soesa umi sinasina. Sa faaloaloa mai lona lima e faatalofa mai ia te au ae tuu le isi ona lima i luga o lou tauau. Sa ou tei i le sau o se tamaloa e tulaga taualoa ona foliga ma talanoa mai ia te au, o se alii talavou na te lei iloaina lava.

Ou te le manatua ia upu uma sa ia saunoa mai ai ia te au nai lo o le fai mai "e leaga na mea mo oe," e faata-tau i lau sikaleti. O lona agalelei ma lana amio sa ou faagaeetia ai lava.

I le mavae ai o se tausaga, sa fai ai loa au lesona e faifeautalai ma ou papatiso ai.

Ao ou matamata i ata o taitai o le Ekalesia, sa ou matauina ai se ata o Peresitene Siaosi Alapati Samita (1870–1951) ma sa vave ona ou iloaina o ia o le tamalii agalelei ma tulaga ese lea sa ou feiloai i ai i luma o le faletalimalo. Sa atili ai lou faagaeetia ona o le faia e le Peresitene o le Ekalesia o se mea faapea i se tasi e pei o

au, o se taulealea sa leo se tagata foi o le Ekalesia ma e leai se mea faapitoa e taua ai.

O se tamalii a maoae ma le faalia o se alofa ma se manatu popole faapena mo se taulealea e faigaluega i se tulaga e tau le iloaina, ma le leai o se malamalamaaga o le talalelei po o le alofa o lo tatou Tama Faalelagi mo i tatou.

O le onosefulu lima tausaga mulimuli ane, ua ou maua ai se malamalamaaga sili o lena manatu popole ma le alofa, ma ou te taumafai ia ou vaai atu ia i latou e siomia au e pei ona sa tagai mai ai Peresitene Samita ia te au. ■

Henry Serion Sr., Hawaii, ISA

**N**ai lo o le ulu atu i le taavale, sa tu le alii suti uliuli ma savali agai mai ia te au.



## PE AOGA MONI EA?

Sa tuuina mai ma le mitamita e le ma atalii e fa tausaga le matua o Kolateone, se fasipepa na tuuina atu ia te ia mai lona faiaoga Peraimeri e faamatalatala mai ai lana vaega i le polokalama o loo loma a le Peraimeri. O le ma galuega o le aoao ia te ia o lana laina e fitu-upu ao lei faia le polokalama i le lua vaiaso.

I le afiafi o le Aso Gafua, sa matou liliuina ai le afiafi faaleaiga i se taimi atoa o le faataitaiga. Faatasi ai ma se ataata i ona foliga, sa faia ai e Kolateone le tele o taumafaiga e faataitai, ae ma tuuina atu ma lou toalua ni manatu faaalia e pei o le, "Aua e te tato ao e faia" ma le "Ia mautinoa e tautala manino."

E ui lava ia maua taumafaiga uma, na oo lava ia te au sa ou le mautinoa pe na lelei atu nai lo le mea na matou amata ai.

O le sauni ai mo le lotu i le taeao o le Aso Sa na sosoo ai, na aofia ai ni totini se lua na leiloloa, o se pepe e valu masina le matua ua tulioso ona nifo, ma se tamaitiiti e fa tausaga le matua na tagi.

O le taimi lava na amata ai le sauniga, ma sa lei uma lelei le viiga amata, ae ua faalua ona ou alu i le

falefaafafia ma se tamaitiiti ua tagi. E oo ane i le taimi na tutu ai i luga le aufaipese e pepese, ua toeitiiti lava a ou lafoaia le faamoemoe o le i ai o se aafiaga faagaeetia o le aiga, a lo o lena foi, e faamoemoe ia tau lava ina matou oo atu i le faaiuga o le sauniga.

Ina ua tau le amene faaiu, sa ou faamatuu atu se mapuea lelava o le matuu atu o se avega. Ae ao ou fiafia i le manumalo, sa le mafai lou mafau-fau e faapea, "Pe aoga moni ea? Pe o ma faia moni se alualu i luma i le ma fanau e ala i le aumaia o i latou i le lotu i vaiaso uma?"

Na oo mai i lou mafau-fau upu a Elder David A. Bednar o le Korama a Aposetolo e Toasefululu. Sa ia saunoa: "Na i ai taimi sa ma feita ai ma Sister Bednar ona o faiga masani amiontonu sa ma galulue malosi ai e faia, sa lei foliga mai na maua vave ai ni taunuuga faaleagaga sa ma mamanao i ai ma tatalia. . . .

"Sa ma mafau-fau ma Sister Bednar, o le fesoasoani i le ma fanau tama ia malamalamama i le aano o se lesona faapitoa po o se mau patino, o le taunuuga lava lena o le faamoemoe. Peitai e lei tulai mai se taunuuga faapena i taimi taitasi sa matou

suesue ai pe tatalo pe aoao faatasi. O le faia e le aunoa o lo ma faamoemoe ma galulue, atonu o le lesona aupito sili lea—o se lesona ma te lei malamalamama atoatoa i ai i lena taimi" ("Ia Matua Maelega ma Mafau-fau I le Aiga," *Liahona*, Nov. 2009, 17).

Faatasi ai ma le lototele faafouina, sa ou toe foi ai i le fale ma faaauau ona faataitai ma saga faataitai faatasi ma lou atalii. Ina ua oo i lona taimi e lauga ai, sa ma matuai fiafia i le faalogo atu i le manino ma le toa na ia folafola mai ai, "O Iesu Keriso o le Alo o le Atua."

Sa ma faalogo o ia faia faafia le laina ao lei faia le faaaliga, ae o se mea e uiga i le faalogo atu o ia faia e ese mai i le fale, ma faia e ia lava, sa ese ma sa sili atu ona faamalieina.

E tele ni a ma aoaoga e fai ao lei avea le ma tamaitiiti laitiiti ma se tama matua, ae o le a faaauau pea ona ma faia le mea sili e auai atu ai i a matou sauniga, fai a matou afiafi faaleaiga, ma fai a matou tatalo i aso uma, ma le faamoemoe e i ai se aso, pe a aluese o ia mai le aiga ma alu na o ia lava, o le a ia toe manatua lena lava laina taua tele: "O Iesu Keriso o le Alo o le Atua." ■

Brandon Comstock, Iuta, ISA





Sa naunau lava Callie  
e ave atu lana fanau  
i le malumalu ina ia mafai  
ona laua pai atu i ai.

## LAGONAINA O LE AGAGA O LE MALUMALU

Sa ou maua le avanoa e asiasi atu  
sai i lau tama teine o Callie i Las  
Vegas, Nevada, ISA, lea na faatoa mei  
atu i ai ma lona toalua ma le la fanau  
e toalua. O le uarota a Callie e fai i  
le aoauli, o lea sa matou maua ai se  
taeao manaia e sauni ma talanoa ai  
i ni mea e mafai ona fai pe a tuua le  
lotu. Ona sa lei maua e Callie se ava-  
noa e asiasi atu ai i le malumalu, o lea  
sa matou filifili ai e o atu ma pue ni  
ata o tamaiti i lotoa o le malumalu.

E pei lava o malumalu uma, o lotoa  
o le Malumalu o Las Vegas Nevada  
sa matagofie ma tausia lelei i vaipuna  
ma fugalaau mananaia.

Ina ua uma ona faiatou se tala sa  
faamatala e Peresitene Thomas S.  
Monson, sa naunau lava Callie e ave  
lana fanau i le malumalu ina ia mafai  
ona latou fepai atu i ai (tagai "Mauaina  
o le Filemu," *Liahona*, Mat. 2004, 2–7).  
O le mea muamua lava sa ia faia, o  
le faamalamalama atu o le paia ma le  
taua o le malumalu i lana tama teine  
o Sitela.

Sa malamalamama lelei Sitela e pei  
ona malamalamama ai soo se tamaitiiti  
tolu tausaga, ma sa matou uunaia  
o ia e pai i le malumalu. Sa matou  
pueina ni ata o Sitela ma lona tua-  
gane e tolu masina o fepai atu i le  
malumalu.

Ina ua oo i le taimi matou te o ai,  
sa faapitoa le musu o Sitela e alu. Sa  
matou manatu sa matou malamalamama  
i le pogai; sa ia maua se taimi sili ona  
fiafia i se nofoaga matagofie ma sa le  
masalomia lava lona lagonaina o le  
agaga lava lea sa matou [maua foi].

Ina ua uma ona faasaofai i le  
taavale ma faamau lona fusipau,  
sa amata loa ona matou o ese. Sa ou  
faliu atu i tua, talotalo, ma fai atu ia  
Sitela, "Fai, tofa malumalu." Sa tilotilo  
atu o ia i le malumalu, talotalo, ma fai  
atu, "Tofa, malumalu. Tofa, Tamama-  
tua." Sa ou le mautinoa pe na sao lau  
faalogo atu ia te ia, ae ina ua ou faliu  
atu ia Callie, sa ou vaaia loimata i ona  
mata, na ou iloaina sa ma lagonaina  
le mea e tasi.

O le tamamatua o Sitela—o lou  
toalua o Timi—e fa tausaga talu ona  
maliu ae lei fanau ia Sitela. E mautinoa  
lava sa vaai o ia i ona ata, ma faalogo  
o talanoa le aiga e uiga ia te ia, ae  
sa lei taua o ia i a matou talanoaga  
i lena aso.

Ina ua maliu Timi, sa na o le toatas  
le tama a le ma fanau na i ai. O lenei  
ua toa 12, ma soo se taimi lava ou te  
siiina ai se tasi o na pepe fou faapele-  
pele o le e lei leva ona aluese mai le  
afioaga o le Tama Faalelagi, ou te fia-  
fesili lava i ai, "Sa e feiloai i lou tamam-  
tua? O a ni ana fautuaga na ia tuu-  
ina atu e te sau ma oe?"

O lena aso, sa faamalosia ai lau  
molimau i le paia o malumalu. Atonu  
e le mafai ona tatou aveina atu a tatou  
fanau laiti i totonusi faatasi ma i tatou, ae  
e mafai ona tatou ave atu seia oo lava i  
faitotoa ma faataga i latou e tuu o latou  
lima i faitotoa e le mafaitaulia tagata  
agavaa o le ekalesia ua faaaogaina e  
ulufale atu ai i le maota o le Alii. ■  
Kathy Rossier, Kaledonia, ISA

# O LE A LE MEA SA SILI ONA TAUUA IA TE AU?

P e a o le afa o lou tausaga lona tolu i le kolisi, na ou iloa ai o le tupe sa ou sefeina e totogi ai lou potu mautotogi ma mea e faaaoga, o le a le lava lea ou te ola ai i le taumafanafana. O le taimi foi lea o le tausaga e mafai ai ona ou faigaluega e totogi le semesa e sosoo ai. Sa ou maua se galuega faavaitaimi o se faatauoloa.

Sa lelei lava mea uma seia oo ina suia ou aso faatulagaina e faigaluega ai ia aofia ai ma aso Sa. I le taimi o le faatalanoaga mo le galuega, sa leai sau tala na faia e uiga i le le faigaluega i aso Sa ona o le vaitaimi lea, sa tapuni le faleoloa i le aso lena. E ui i lea, sa taua le galuega ia te au, ma sa ou fiafia i le mea sa ou faia. Sa ma faigaluega ma sau uo, ia i maua, sa mafai ona ma avanoa i aso Sa e lua ae faigaluega i le isi lua. O lenei mea sa mafai ai ona ou auai i nisi o sauniga a le Ekalesia ma fai lou valaauga.

Ae peitai, e lei leva ae ou iloaina e le mafai ona ou alualu ai pea i lenei faatulagaga. Sa ou maua moni se lagona sa le mafai ona ou faia ou tiutetauave o le aso Sa e tusa lava pe ou te le faigaluega i aso Sa uma. Sa amata ona ou fesili ifo ia te au lava, po o le a se mea e mafai ona ou faia i lenei tulaga. Ina ua uma ona ou tatalo ma ole atu mo se auala e faamaluluina ai loto o supavaisa, sa ou faitau i le 1 Nifae 7. Ou te manatua le faitauina o le fuaiupu e 19, lea, ina ua uma ona tatalo Nifae, sa faapea ona faamaluluina loto o ona uso. Mulimuli ane, sa mafai ona ou talanoa atu i ou pule o le galuega e uiga i le le faigaluega i aso Sa.

Sa ou tau atu i ou supavaisa o au o se tagata O Le Ekalesia a Iesu Keriso o le Au Paia o Aso e Gata Ai, ma sa

latou fesili mai ia te au i mea e talitonu i ai le Au Paia o Aso e Gata Ai. Ina ua ou talosagaina i latou pe mafai ona ou malolo i aso Sa, o le tali o le leai. Sa latou faailoa mai, i le taimi o lou faatalanoaga muamua lava, sa ou fai atu ou te avanoa e faigaluega i soo se aso o le vaiaso, ma ou te lei taua lava ni manaoga faalelotu.

Sa mavae le lua masina e aunoa ma se suiga, seia oo i se tasi aso Sa, sa ou teleai mai i fafo mai sauniga Lotu e topetope atu e faigaluega. Sa ou fesili ifo ia te au lava, "O le a le mea e sili ona tauua ia te oe?" Sa vave oo mai le tali ma faigata lava ona misia: o le Ekalesia, o le talalelei, auaunaga i lou valaauga, auai ma lou loto atoa i sauniga o le aso Sa, ma le avea ma soo i le upu ma le amio.

Sa ou filifili ou te toe talosagaina

ina ia ou le faigaluega i aso Sa, ae o le taimi lenei, o le a ou faia ma se tusi faamavae sa uu i lou lima, ina nei latou fai mai faalua ia te au e leai.

Sa ou tatalo, anapogi, ma maua ni savali tesi lagolagosua mai uo.

I le taimi o lou faatalanoaga, e ui lava sa tatavale lou fatu, ae sa ou toa ona sa ou iloa sa ou faia le mea sao. O le taimi la lenei sa fai mai lou supavaisa, ioe. Na tali mai au talosaga. O le taimi lava na ou taunu ai i le fale, na ou sasaeina ai lau tusi faamavae.

Sa ou maua le tele o faamanuiaga mai lenei aafiaga, ae o le faamanuiaga aupito vave ma vaaia, o le sa mafai ona ou faigaluega pea ma tausia pea le paia o le aso Sapati. Ou te matuai faafetai moni ai i le Alii mo lena mea. ■

Eleonora Sonnellini, Trieste, Italia

| se tasi aso Sa, sa ou teleai mai i fafo  
mai sauniga Lotu e topetope atu e  
faigaluega. Sa ou fesili ifo ia te au lava,  
"O le a le mea e sili ona tauua ia te oe?"





Saunia e Elder  
David F. Evans  
O Le Fitugafulu

# Filiga ma le Avea ma Soo

**U**a faauigaina e se tasi o lomifefi-loi i luga o le initoneti le *filiga* o le “faapalepale, onosai, ma le finafinau malosi.” O loo faapea mai foi, “O le filiga o le uiga e faaalia e se tasi e le fati—o le e taumafai pea seja oo lava ina ausia la latou sini.”<sup>1</sup>

Tatou te manaomia le filiga ina ia mafai ona avea ma ni soo moni o le Faaola, ma ia ausia ai sini lelei moni—avea ma se faifeautalai maoae, faamaeaina o a tatou aoaoga, mauaina o se soa e faavavau, ma le amataina o se aiga—lea e silafia e lo tatou Tama Faalelagi e manaomia ona tatou ausia e saunia ai mo le faavavau. O lo tatou gafatia ina ia filiga i mea lelei uma, o le a iloa ai pe avea i tatou ma atalii ma afafine o le Atua lea ua Ia silafia e mafai ma e ao ona avea ai i tatou.

O le augatupulaga i aso nei o faifeautalai faamisiona ua taua “o le augatupulaga aupito maoae o faifeautalai i le talafaasolopito o le Eklesia” ma ua faatusaina i le autau totoa e 2,000 a Helamana.<sup>2</sup> E ui lava i uiga faaalia lelei ma faatuatua ma taumafaiga filiga a nei alii talavou, fai mai Helamana lo latou taitai: “Ma sa oo ina sa i ai le toalua

selau, mai lau lua afe ma le onosefulu, o e na matapogia ona o le tele o le toto sa masaa; e ui i lea, e tusa ma le agalelei o le Atua, ma lo matou ofo tele, ma le olioli foi o la matou autau atoa, sa leai se tagata e toatas i latou na fano” (Alema 57:25).

Sa laveaiiina i latou “ona o lo latou faatuatua tele i ia mea sa aoaoina i latou ia talitonu i ai—e faapea o loo i ai se Atua faamasinotonu, ma o soo se tasi e le masalosalo, o le a faasaoina i latou i lona mana faavavega” (Alema 57:26).

Fai mai Helamana e uiga ia i latou: “Ua latou talavou, ma ua mausali o latou mafaufau, ma ua latou tuu atu o latou faalagolago i le Atua e le aunoa” (Alema 57:27).

E tatau foi ona faapena i tatou. I le olaga, o le taimi e to mai ai timuga ma tatafe mai lologa, ma agi mai matagi ma taia ai i tatou ma luga o o tatou fale, tatou te iloa ai pe faamata e malosi o tatou faatuatua ma pe faamata o tatou faalagolago atu e le aunoa i le Atua. O le mea sao lava ia e leai se tofotofoga seiiloga e i ai se faalavelave.

**la faatuatua i le Atua ma Ana folafolaga, ma fai le mea sao i taimi uma, e tusa lava po o ai na te iloa.**

## Aua Le Faavaivai

I ni nai tausaga ua mavae, sa ma pulefaamalumalu ai ma lou toalua o Mele i le Misiona a Iapani Nagoya. O faaupuga *totoa, lototetele, malolosi, toaaga, ma faamaoni* lea e faamatatalaina ai fitafita totoa e 2,000 (tagai Alema 53:20) e faamatatalaina ai foi faifeautalai sa matou galulue faatasi. O le isi faamatatalaga o fitafita totoa e 2,000—o nisi sa *matapogia* (tagai Alema 57:25)—e faamatatalaina ai foi nisi o a matou faifeautalai.



E le faigofie se misiona. E le faa-pena foi le olaga. E i ai lava se itu o le a faamanualia ai tagata uma. O nisi o nei tiga e oo mai mai solitulafono e lei faaleleia. O nisi e oo mai i ala o faalavelave poo mai. O nisi e oo mai pe a tatou vaai atu ia i latou tatou te alolofa i ai a le ua teena le talalelei a Jesu Keriso, pe ua le faamaoni i le mea ua latou iloa e moni. Ae e ala mai i nei mea uma, e oo ai ina tatou iloa le Atua, ma tatou tuputupu ae ai ia avea ma soo o le Faaola. E suia o tatou loto, ma o lena suiga e oo ina tumau ao faaauau ona tatou filifilia le amiontonu nai lo o le agasala ma le masalosalo.

O na fitafita totoa e 2,000 sa filiga i o latou faanaunauga. O le mea moni sa le mafai ona latou fati, e tusa lava pe na faigata lo latou ala. O se auga-tupulaga na muamua atu, o o latou tama ma tina, sa aoaoina e Amona ma ona uso. Sa tele le faamanuiaina o na faifeautalai, ae sa tatau foi ona latou pipiimau pea ma le fati ina ua oo ina faigata ma lotovaivai a latou misiona.

Ua faamatalaina e Amona na taimi: “O lenei ina ua vaivai o tatou loto, ma toetoe a tatou toe foi i tua, faauta, sa faamafanafanaina i tatou e le Alii, ma fetalai mai: O atu i totonus o o outou uso, o sa Lamanā, ma tauave ma le onosai ou puapuaga, ma o le a ou tuu atu ia te outou le manuia” (Alema 26:27).

Faatasi ai ma le onosai ma le filiga, sa galulue ai Amona ma ana soa i faafitalui ma iu ai ina maua le faam-nuiaina tele.

### Filiga i le Talalelei

I le 1999, na sau ai Sister Marci Barr i le Misiona a Iapani Nagoya,

mai Columbus, Ohiao, i le ISA. Sa lei faigofie le faaSapani ia te ia, ae sa filiga lava o ia. O le taimi lava na ia iloa ai tautala [faaSapani], sa lei toe taofia lona talanoa atu i tagata e uiga i le talalelei.

Ua folafola atu ni folafolaga maoae i faifeautalai e faamaoni, finafinai, ma filiga, o e tatala o latou gutu ma le totoa ma le alofa, ma o e galulue ma o latou malosi atoa i auala ua faatulaga mai e le Alii (tagai MF&F 31:7). Ae peitai, o nisi faifeautalai ua matatau ona o le teenaina ma faataga ai lo latou mata-tau e faatoilalo ai lo latou totoa alofa.

Ae sa lei faapena Sister Barr! Sa ia maua ma aoao, ma sa ia aoao ma maua i lana misiona atoa.

I le aso mulimuli o lana misiona, sa malaga mai ai Sister Barr i le ofisa o le misiona i Nagoya. O le po lena, o le a ou faatalanoaina ai o ia ma tau atu i ai sa ia faia se galuega matago-fie. O le aso na sosoo ai o le a alu ai o ia i le fale.

Ao malaga mai o ia, sa ia vaaia se faapotopotoga o ni teineiti o le vaitausaga o le aoga maualuga o talanoa faatasi i le nofoaga e faatalai ai nofoaafi. Sa alu atu o ia ia i latou ma talosaga pe mafai ona latou feiloai. Sa talanoa atu i ai e uiga i le talalelei ma lona Toefuataiga. Ona ia tuu atu lea o se tamaitusi o lesona a faifeau-talai i se tasi o teineitiit sa foliga mai sa fialoa atili, ma tau i ai ia tamaitai faifeautalai e mafai ona aoaoina o ia i le talalelei.

Ona sau lea o Sister Barr i le ofisa o le misiona ma fai lana faatalanoaga, ae lei faamatalaina mai lava ia te au lona aafiaga i le nofoaga faatali nofoaafi. Ia te ia, sa le o se mea mataina. Sa na

ona ia faia o le mea sa ia iloa sa sao, seja oo lava i le faaiuga. Atonu o le faauigaga sili lea ona lelei o le *filiga* i le talalelei ou te iloa: E tusa lava po o le a, ia faaauau pea ona faatuatua i le Atua ma Ana folafolaga, ma fai le mea sao i taimi uma lava, e tusa lava po o ai e iloaina.

Sa toe foi atu Sister Barr i Columbus. O iina i se uarota o tamaiti aoga, sa feiloai ai i lana tane i le lumana, ma o loo la tausia faatasi se aiga i le talalelei a Iesu Keriso.

O le teineitiit i le nofoaga faatali nofoaafi—o Hitomi Kitayama—sa aoaoina e tamaitai faifeautalai. Sa finafinai Hitomi ma faalia lona lava ituiga o filiga ao ia talaina upumoni o le talalelei, faatoilalo le tetee mai tagata o lona aiga ma ona lava masalosaloga.

Sa matou feiloai ia Hitomi i le toeitiit ono tausaga mulimuli ane i se konafesi a le misiona i Tokyo, lea sa auauna atu ai o se faifeautalai. Sa ia faamatatai mai ia i matou le feiloaiga ma Sister Barr i le nofoaga faatali nofoaafi ma lona liliu mai i le talalelei mulimuli ane ai.

Ina ua uma lana misiona, sa feiloai o ia ma faaipoipo atu i se isi faifeautalai





## TAUIVI MO LE LOTO PULEA SILI ATU

"Ou te uunaia tagata uma, talavou ma matutua, e iloilo ai sini ma faamoemoega ma tauivi e faaaoga se loto pulea tele. O a tatou amioga ma filifiliga i aso taitasi e tatau ona ogatusa ma a tatou sini."

*Elder Quentin L. Cook o le Korama a Apostolo e Toasefululu, "Filifili ma le Atamai," *Liahona*, Nov. 2014, 49.*

na maea lana misiona, o Shimpei Yamashita. O le mea e malie ai, o Shimpei o le atalii o se alii sa ma aoaoina ma Elder Randy Checkettes i le taumafanafana o le 1971 ao ou auauna atu i lau misiona muamua i Japani.

E le na o le faasalalauina atu o le talalelei e manaomia ai lo tatou filiga e fai le mea sao. Tatou te manaomia lenei lava filiga amiontonu ao tatou faatoilaloina agasala patino ma faosoosoga, faamaea a tatou aoaoga, ma saili faaipoipoga faalemalumalu ma se aiga e faavavau. O le a tatou manaomia le filiga, alofa, ma le le faalogologo tiga ao tatou taofimau i o tatou taitoalua ma fanau ma galulue i luitau ia e oo mai i faaipoipoga ma aiga uma lava. Ma o le a tatou manaomia le filiga, tuuto, ma le onosai pe afai e le oo mai faamanuiaga o loo tatou sailia i le taimi tatou te mananao ai.

I nei mea uma ma i isi mea amiontonu uma, o lo tatou tuuto e fai le

mea sao ma ia sao o le a luitauina e le lalolagi. Ae le tatau ona tatou fati. E manaomia ona tatou taumafai pea seja oo ina ausia la tatou sini. O la tatou sini, i le uiga, o le ola e faavavau faatasi ma a tatou tane po o le ava, ma a tatou fanau, ma a latou fanau mo augatupulaga e oo mai.

## Faatutu ni Sini Tauaogaina

E faapefea ona tatou atiina ae lo tatou tuuto e fai le mea sao, ma e faapefea ona tatou maua le malosi e tausia ai?

Muamua, tatou faatutu ni sini tauaogaina o mea e ausia ma faia faatasi ma la tatou sini tupito o le ola e faavavau. E aofia ai sini faaleaoaoga ma faalegaluega lea o le a taitai atu ai ma ia atiina ae faatasi ma o tatou aiga, tuputupu ae patino, auauna atu, toaga i le Eklesia, ma le fiafia patino. O se vaega o le faia o nei sini o la tatou lava lea filifiliga patino, ae o le isi vaega e ao ona aofia ai le tatalo ma faaaliga faaletagata lava ia. Afai e te fia saili lava i le finagalo o le Alii, o le a tali mai o Ia.

Faatasi ai ma le tele o mea e tatau ona e tatalo e uiga i ai, o le sueina o se soa agavaa e mafai ona lua o i le malumlau ma osia feagaiga paia. *Afai e te manao e osia ma tausia feagaiga paia ma maua le uunaiga ia ausia au sini e sili ona amiontonu, ia saili ma le agaga tatalo i faamanuiaga ma tiute-tauave o le faaipoipoga.*

I lenei vaega ma isi vaega o lou olaga, ia saili po o le a le mea o loo finagalo le Atua e te faia. Suesue i ai. Fai faaiuga. Tuu atu i le Alii ma ia maua [mai Lona finagalo]. Ona agai lea i luma i le ausiaina o au sini.

I nei mea uma, afai o le a e filiga i mea amiontonu, e tatau ona tatou ola latalata atu i le Alii e ala i le ola amiontonu. E i ai ni nai mea o le a tele ina faasalaveia i tatou mai le ausia o a tatou sini amiontonu nai lo le agavaa i faamanuiaga a le Agaga i o tatou olaga.

Fai ni sini amiontonu. Ia tatalo e le aunoa ma saili le taitaiga a le Alii. Ia agavaa ma aloese i mea na o le a faalavefau mai pe taotaomia ai lou alualu i luma. Ia i ai ma faaaoga lou pepa faataga o le malumalu. Ia tau-sia au feagaiga, ae maise lava pe a faigata le olaga. Saili i faamanuiaga o le faaipoipoga ma aiga e faavavau. Ona pipiimau lea. Aua le fiu! Aua le fati.

Ia filiga i mea amiontonu uma. O le a e vaaia le faamalosia o lou faatuatua, ma o le a e vaaia le faalolotoina ma le faalauteleina o ou malosiaga ma taleni ao faateleina lou faatuatua. Ma ia manatua le mea ua folafolaina mai e Elder Jeffrey R. Holland o le Korama a Apostolo e Toasefululu: "O nisi faamanuiaga e vave oo mai, o nisi e tuai mai, ae o isi e le oo mai seja oo atu i le lagi; ae mo i latou o e talia le talalelei a Jesu Keriso, e oo mai lava."<sup>3</sup> ■

*Mai se lauga sa faia i se faigalotu, "Tenacity," sa fofogaina atu i le lunesite o Polika Iaga i le aso 4 Novema, 2014. Mo le saunoaga atoa i le gagana Peretania, alu i le speeches.byu.edu.*

## FAAMATALAGA

1. Vocabulary.com/dictionary/tenacity.
2. Tagai M. Russell Ballard, "O Se Tupulaga Sili Ona Maoae o Faifeautalai," *Liahona*, Nov. 2002, 47, 48; mo le auala o loo faamatala ai i latou e le Tusi a Mamona, tagai Alema 53:17–21; 56:17, 45–48; 57:20–21.
3. Jeffrey R. Holland, "O se Faitaulaga Sili I Mea Lelei Atali," *Liahona*, Jan. 2000, 42.

# Siamupini mo le Sapati

**Saunia e Samantha McFadyen**

Ina ua fai mai le faiaoga a le matou au lakapi o le matou taaloga o le pau ma nofo i le taamilosaga o le suega siamupini a le atunu na faatulagaina mo se aso Sa, na pau lava le mea sa ou mafaufau i ai o le, "Aisea lava ua tuu ai i le taimi nei?"

O lau au, o le au lakapi a tamaitai i le 2010 a le Iunivesite a Polika Iaga, sa saunia i le vaitau atoa mo le suega siamupini. Sa matou tulimatai atu e taaalo ma le au sa matou faiaina ai i le taamilosaga o le tausaga na mavae atu. Sa ou mautinoa lava e mafai ona matou manumalo—sa i ai i le matou au nisi o tagata taaalo sili ona lelei a le atunu. Sa matou mananao e faamaonia atu i matou lava i le lalolagi o lakapi e ala i le manumalo i se suega siamupini a le atunu, ae na iu ane, sa ese le ala sa i ai a le Tama Faalelagi mo i matou.

## Tumau Pea i a Matou Tulaga Faatonuina

Sa faamautinoa mai e taitai o le taamilosaga o le a faatulaga a matou taaloga i le aso Faraile ma le aso Toonai, ae ona o se faaletonu, o lea na seti ai taaloga mo le aso Toonai ma le aso Sa. Na faatoa matou iloaina le faaletonu ae toe lima lava aso amata


le taamilosaga, lea na faia i Sanford, Florida, ISA. Talu ai ona o le lakapi a tamaitai sa lei avea ma se au aloaia a le IPI i lena vaitaimi, o lea, o le faaiuga pe matou te taaalo pe leai, sa tatau ona fai lava e i matou. Sa matou filifili e le taaalo. Sa o se faaiuga na autasi i ai, ma sa leai se tasi na faasea.

O le taalo i le aso Sa, sa le o se mea foi e filifili ai. Ia te au lava, sa lei faapena lava. Sa aoao au e ou matua ia tausi le paia o le aso Sapati, ma sa ou faamamaluina lena poloaiga i lou olaga atoa. O le tausia o poloaiga a le Tama Faalelagi sa sili atu ona taua nai lo o se taaloga lakapi.

Ae peitai, o le iloaina sa matou faia le mea sao sa lei faigofie ai lava. Sa matou lotovaivai ao matou felelei atu i Florida ma le iloa, pe matou te manumalo pe faiaina, o le aso Toonai o le matou taaloga mulimuli lea.

Ina ua matou taunu i Florida, sa matou maua se valaau mai se tagata faasalalau a le *New York Times* o le sa manao e faasalalau le matou tala. Sa matou taufai ofo. Matou te lei faamoe-moe lava e i ai se tasi e fia manatulia la matou faaiuga e faamamalu le Sapati, ae maise lava o se nusipepa a le atunu.

**Sa leai ma sau sou manatu o a tatou filifiliga e tausia le paia o le aso Sapati o le a aafia ai le toatele o tagata.**



I le Aso Faraile, i le taimi matou te taaalo ai pe ana faapea e lei tupu le faaletonu i le faatulagaga o taaloga, sa matou o atu ai i le Malumalu o Orlando Florida ma fai papatisoga mo e ua maliliu. Ina ua uma ona matou faia ia sauniga, sa talanoa mai le peresitene o le malumalu ia i matou. Sa ia aumai i fafo se tusiga sa tusia e uiga ia i matou ma faitau mai nisi o manatu faaalia sa tuu i luga o le initoneti e le au faitau e lagolago ai la matou faaiuga.

Sa faitau mai mulimuli ane e le matou faiaoga nisi o manatu faaalia sa ia mauaina. Sa faafetai mai le Au Paia o Aso e Gata Ai ma isi ia i matou mo la matou faataitaiga, ma fai mai sa o se mea manaia le vaaia o tagata o tumau pea i o latou



tulaga faatonuina. O a latou upu sa siitia ai o matou agaga. O le taimi lena sa amata ai ona matou iloa le aafiaga e mafai ona tatou faia e tusa lava pe le avea ma ni siamupini i le atunu.

Sa ou iloa sa silafia e le Tama Faalelagi i matou, ae ou te lei manatu sa i ai se isi tagata na matamata mai. O le tali i la matou faaiuga, na tuuina mai ai ia i matou se faamoemoega fou mo le i ai i Florida: matou te lei i ai i o ina ia manumalo, ae ia tulai atu mo a matou tulaga faatonuina.

### O Se Auala Sili Atu

Na oo mai le aso Toonai, ma sa manumalo la matou taaloga e 46 i le 7. Ina ua uma, sa matou savavali atu i taitai ma tau atu i ai ua faaleaogaina le taaloga sa faatulagaina matou te taaalo ai i le aso Sa—lea sa tuu matou te fetaui ai ma le au sa matou faiaina ai i le tausaga ua mavae. Sa ou le fiafia ona ua faaiuina faapenei la matou taamilosaga. Maimau pe ana matou taaalo ma le au lenei, ae ou te le momoo e taaalo ma i latou, po o se isi lava au, i le Sapati.

E tele ni tusiga sa tusia e uiga ia i matou, ma sa faaaauau pea ona matou



ATA MAI FAALAOALOGA A LE AU LAKAPI A TAMAITAI O LE (BYU) MA PAUL MEYERS



### FAAMAMALUINA O LE ASO SAPATI

"Ua faailoa mai e le Faaola o la Lava o le Alii o le Sapati. O Lona aso lea! Ua la toe faamanatu mai peia ia i tatou ina ia *tausia* le Sapati po o le *faapaia* le aso Sapati. Ua tatou osi feagaiga o le a tatou faia lena mea.

. . . [Tatou te] fesili ifo ia i [tatou lava], 'O le a le *faailoga* ou te manao e avatu i le Atua?' O lena fesili e matua ta'u manino mai ai lava [a tatou] filifili-ga e uiga i le aso Sapati. . . .

. . . Ua tatou iloa po o fea lava o tatou nonofo ai o i tatou o ni faataitaiga o e talitonu ia Keriso i totonusi o tatou aiga, tuaoi, ma uo. O tagata talitonu faamaoni e *tausia* le paia o le aso Sapati."

**Peresitene Russell M. Nelson, Peresitene o le Korama a Aposetolo e Toasefululuia, "O le Sapati o se Aso Fiafia," *Liahona*, Me 2015, 129-130, 132.**

maua ni tusi ma ni imeli e lagolago mai. O le tulai atu mo o matou tulaga faatonuina, sa tele atu ai tagata na matou aapa atu i ai nai lo le mea e ono i ai pe ana faapea matou te manumalo i le siamupini.

Ua ou aoaoina e faatuatua i le Tama Faalelagi e taitai au i se auala e sili atu nai lo o le ala o loo ou mafaufau i ai mo au lava. Sa mananao le matou au e faamaonia i matou lava e ala i le avea o ni siamupini, ae o lenei ua ou iloa sa finagalo le Tama Faalelagi matou te tau atu se mea e matuai ese mamao lava. Sa ia taitai atu i matou i le avanoa e avea ai ma faataitaiga i le taimi sa matou manatu ai, na leai se isi na matamata mai, ma sa mafai ona ia faaaoga i matou mo le lelei ona sa matou filifili e usitai. ■

*O le tusitala e alala i Uosigitone, ISA.*

O Le

# VAEGA AUPITO FAIGATA o le Avea ma se FAIFEAUTALAI

O nisi taimi, o le luitau aupito tele lava i le galuega faafaifeautalai e le o le galuega faafaifeautalai.

Saunia e Wendy Ulrich, PhD.

Sa tau mai e se faifeautalai ia te au, "A fai mai tagata o se misiona o le a faigata, sa ou faapea o le suiga o lena mea, o le a ou maalili pe feagai ma ni tulaga faigata o mea e nonofo ai, pe tauivi foi ma le gagana. Ae mo au o le vaega aupito faigata, o mea ou te mafaufau ai i totonu o lou ulu—e pei o le lagonaina o le faavaivai po o le oo o le ita i soa po o le le fiafia e talanoa i tagata ese—o le feagai ma aafiaga lelei ma leaga, o le teenaina, o suiga."

Ina ia saunia mo se misiona, e mafai ma e tatau ona e faitau le *Talai Lau Talalelei*, suesue i tusitusiga paia, ma aoao e kuka ma fai tagamea. Ae e tatau foi ona e maua ni aafiaga faatino i le taimi nei ma le *faalelagona, faaleagafesootai, ma isi* tomai o le a e manaomia o se faifeautalai. O se lisi lenei o nisi o na tomai. E mafai ona e siaki faasao se tasi pe lua o na mea e amata faataitai i le taimi nei.

## O Tomai o le Lotomaualalo e aunoa ma le Lagonaina o le Faalumaina.

E pei ona tau mai e se tamaitai faifeautalai i Apalama, ISA, ia te au, "Ou te matea sa ou mafaufau ina ua latou vaetofia au, atonu o le a ou maua ni mana. O lea sa fai si ou tei i le iloina ina ua ou taunu i lau misiona, o au lava lea. Sa i ai lava mea ia sa ou vaivai, fefe, ma le atoatoa ai. Ma sa lei o ese moni na mea. Sa faapea ona ou aoao i le auala e taulima ai le le atoatoa i le faiga o le galuega a le Alii."

Pe e te sau i totonu o le misiona ma le tele o mea ua faamanuiaina ai oe pe itiiti foi, afai e te lotomaualalo, aaoogofie, ma naunau e tau-mafai pea ma galue, e mafai ona oulu galulue ma le Alii. Ae na pau le ala e mafai ona faaleleia

atili ai ou tomai faafaifeautalai o lou faataitai, fai atu fesili, sue mai le fesoasoani, ma taumafai pea. Afai ua faatalitonuina oe e faapea, o tagata e masani lava e lelei (pe masani lava e leaga), i le galuega faafaifeautalai, gagana, molimau, po o mafutaga, o le a e maua se taimi fai-gata atu.

Sa fai mai se faifeautalai ia te au, "Sa manaomia ona ou iloa o le galuega lea a le Alii, ae le o sau [galuega]. Ma e le afaina pe a ou lagona le le atoatoa ai, aua ou te le atoatoa. O le a le mafai lava ona ou atoatoa i le faiga o le mea e nao le Atua lava e mafai ona faia. E tele mea e mafai ona ou faia ia alualu ai i luma, ae e le faapea e tatau ona ou faia nao au lava. E mafai ona ou faalagolago ia te Ia."



Taumafai e fai ni mea fou ma ni mea faigata. O le a e iloa ai ona le faamamafaina fua ia lagona o le le atoatoa. Mo se faataitaiga:

- Faataitai ona fai mea e aveese teisi atu ai oe mai mea ua e masani ai, e pei o ni galuega fou, gaoioiga faaopoopo i le kosi aoaoina masani, po o ni vasega e le masani ai. Fai atu ni fesili, sue mai ni fesoasoani, iloilo mea sese, ma taumafai pea. Faaaoga mea e tatau ona e faamasani ai ma galue i ai ina ia e aoao e talitonu *o le a* e alualu i luma pe a faia se taumafaiga.
- Toe talanoa atu i leo i lou mafafau lea e fai atu ia te oe o tagata e fananau mai pe leai foi ma taleni, atamai, po o tomai faaleagafesootai. O tagata o le lalolagi e aupito sili ona lelei i afeleti, musika, ma atamamai—ma fai-faualalai—e oo i le tele o le toilalo ma le tele o itula e faataitai ai, i o latou ala i le manuia.



## O Tomai o le Fetaiaiina o le Ono Teenaina (ma le Teenaina Moni)

O le teenaina ma le le fiafia o aafiaga na o aso uma i se misiona. Ia faataitai ona fai mea e ono afaina ai ma le fetaiai ma le teenaina, ina ia e lelei ai i le taulimaina o na lagona.

- Talosaga mo se galuega, fai faatalanoaga o galuega, ma faigaluega faavaitaimi pe tumau foi.
- Faataitai ona taalo mo se au po o se tala faatino.
- Talosaga atu i tagata mo ni tafaoga pe fai ni gaoioiga.
- Pe a le sologa lelei ni mea, ia matau ni manatu ma ni amioga e fesoasoani ia te oe e taulima lelei ai ma lagona ai le fiafia.
- Aoao mai mea sese ma toe taumafai.

## O Tomai o le Taulimaina o Faaosofiaga

O i tatou uma e tatau ona iloa auala e faaosofia ai i tatou lava pe a tatou iva ma faatoofilemu i tatou lava pe a tatou soona popolevale foi.

- Afai o se tulaga e iva pe e le o agai i luma, ia e fia iloa po o le a le mea ua sese ma pe faapefea ona faaleleia, ia fai ai se taaloga, pe sue ni mea e mafai ona e aoao mai ai.
- Ia iloa taimi e te popolevale ai ma aoao mea e mafai lava ona e faia i se misiona e faatoatoa malie ai (talanoa atu i se tagata, malolo, tusitusi, pese, savalivali). Mafau-fau i le faafitauli, vaevae le faafitauli, ia faaaofia ai isi, fai ni suiga laiti, tatalo, ma teena mafaufauga le lelei e oo atu i lou mafaufaugau.



## O Tomai o le Taulimaina o Feeseseaseiga

O soa, taitai, tagata o le au paia, ma tagata sailili i le a lelei tele, ae e i ai taimi o le a tofo-tofoina ai foi lou onosai.

Faataitai ma nai ou tei ma uo ona:

- Aoao e talisapaia isi e ala i le fesili atu pe aisea latou te faia ai mea o loo latou faia.
- Talia le tiutetauave ma faatoese faamaoni pe afai ua tiga se tasi ona o sau amio, e tusa lava pe e te lei fuafuaina ia afaina ai.
- Vaavaai mo se faamalamalamaga agaalofa mo le amio a se isi tagata. Aua le taofiofia se mea e tiga ai.
- Faailoa atu se faafitauli ma talosaga mo se fesoasoani i le fofoina nai lo o le tautuuai po o le faapopoleina ai.
- A tulai mai ni feteneiga, faaaoga se leo malu ma faaali atu le faaaloalo mo lagona o isi.
- Ia potu faatasi ma se tagata e ese mai ia te oe. Ia i ai se manatu lelei ma fia iloa e uiga i mea latou te mananao i ai.



## O Tomai i Talanoaga

E tusa pe o oe o se tagata matamuli po o tagata e tau le faamasania, e mafai ona e aoao-inia tomai o le talanoa lelei o le a e manaomia i se misiona ma i lou olaga atoa.

Afai o oe o se tagata e matamuli tele:

- Faatu se sini e talanoa atu i se tagata fou (aemaise lava o tagata matutua e te le masani ai) mo le lima minute i vaiaso uma.
- Ataata, ia fia iloa e uiga i tagata, ma aoao ni fesili lelei ia faatalanoa mai ai isi tagata.
- Vaai ni auala e amata ai se talanoaga ma faauma faalelei ai se talanoaga.
- Ia matau taimi e taumafai ai isi e amata se talanoaga ina ia mafai ona e malamalama ma tali atu i ai.

Afai o oe o se tagata e tau le faamasania lava:

- Ia tatai mai isi e ala i le fai atu o ni fesili.
- Faataitai ona avea ma se tagata e lelei le faalogo.
- Vaavaai mo faailoga e faapea ua lelava lau tagata faalogologo. Tuu le avanoa i isi.

## O Tomai Faaletino o le Ola Manuia

I le avea ai ma se peresitene o le misiona, sa talanoa atu ai lou toalua i se tasi o faife-autalai o le sa matuai atuatuvala lava ma sa faigata [ia te ia le galuega]. Sa lagona e lou toalua le musuia e fesili atu ia te ia, “A, Elder, o le a lau malutaeao na fai?”

“Aisa kulimi.”

“O le a lau mea na tausami i le aoauli?”

“Pateta falai.”

“O le a sau mea na tausami i le afiafi?”

“Pateta falai ma le aisa kulimi.”

“O le a le umi talu ona e tausami na o Pateta falai ma le aisa kulimi?”


“Pe a ma se masina.”

“O le mea la lenei e te alu e fai: alu i le fale e ai se mea lanumeamata—ae le o le aisa kulimi lanumeamata [mint].”

O meaai paleni ma le faamalositino e aafia moni ai le ala tatou te manatu ai e uiga i le olaga. Amata nei ona:

- Aoao e uiga i le taumafa tatau. Ai meaai paleni. Afai e te filifili meaai, amata ona faataitai i ni nai mea fou.
- Faamalositino. O le faamalositino soo e fesoasoani i tagata uma ia taulima lelei ai le atuatuvala ma le le fiafia. Amamatata malie ma faasolosolo lemu ae lava, e pei o se savalivali i le afiafi (atonu faatasi ma se uo pe ma se musika), savali i le mea o loo e tu ai i le taimi o faalauiloa a le televise, po o ni nai nofo i luga ma uunai i luga.
- Aoao e vaai faalelei au meatotino, lavalava, tupe ma taimi.
- Pulea [lau] moe. Afai e faigata ona e alu e moe pe ala i luga, fesili atu i ni tagata mo ni manatu. Fai ni taimi masani e moe ai ma ala i luga, e mafai ona e faaaogaina o se faifeautalai.





## O Tomai o le Maua Soo o Lagona Lelei

- Atiina ae se aga malie. Ata ia te oe lava, ae leo i isi. Aua e te maemaea i mea uma e faapea ona oso ai lou le fiafia.
- Fai atu ia i latou sa avea muamua ma ni faifeautalai e faamatala'atu se mea sa faigata ia i latou ma pe na faapefea ona latou taulimaina. Saili ni manatu e mafai ona e faaaogaina.
- Lisi ni mau ma ni viiga e faagaeetia ai oe ma faatumulia ai oe i le faatuatua.
- Teena le leo le lelei o loo i lou mafau-fau i se manatu lelei. Afai o lena leo e tausuaaiga, faipona, faalumaluma, ita, le alofa, pe faia ai oe ina ia e lagona le leai o se faamoemoe po o se aoga, e le mai le Alii lea. O Lona siufofoga i taimi uma o le faamoemoe, faamalosiau, ma agaalofa, ae maise lava pe ao e taumafai.

## O Tomai Faaleagaga o le Ola Manua

- Ia tatalo moni. Valaaulia le Tama Faalelagi e alala i ou talaane, ma talanoa sao atu ia te Ia e uiga i ou faafitauli, manaoga, ma le loto faafetai. Taumafai e tatalo leotole, tatalo ma se pepa ma se peni e tusitusi ai uunaiga, pe tatalo ia na o le tuuina atu o le faafetai.
- Suesue i tusitusiga paia. Saili mo, ma faatalitali mo ni tali i ou atugaluga.
- Ia avea ma se faifeautalai i le taimi nei. O atu ma auauna atu faatasi ma faifeautalai faamisiona, ia avea le autu o le talalelei e faaaofia i talanoaga o aso uma ma au uo, ma tuuina atu se molimau faamaoni i le lotu. O le a faateleina lou fiafia i le galuega faafaifeautalai ao e faia. ■

*E alala le tusitala i Iuta, ISA.*

## O ITUAIGA TAGATA E TOALUA E MASANI ONA TAUIVI

O tagata o e tauivi faalelagona i luga o se misiona e masani ona aofia ai:

- **O i latou na maea aoga e aunoa ma le matuai galue malosi.** O tagata o e atamai pe lava le talenia e ola ai, e aunoa ma le tau galue malosi, e ono vaai i o latou gafatia o se mea maneta. A le sao la le maneta (ma e i ai lava le taimi e le sao ai), latou te le iloa le mea a fai, vagana ai le taumafai e faalafi a latou mea sese. I le iuga, e tatau ai i tagata uma ona aoao ia lotomualalo, galue malosi, faataitai, saili mo le fesoasoani, ma manumalo i mea faalavefau ma faatoilaloga ina ia faaaauai ai pea ona tuputupu ae ma alualu i luma.
- **O i latou e lei tele se faamanuiaina na latou oo i ai.** O nisi o tagata e vaai atu i mea faigata o se faa-maoniga o i latou e valelea pe le talenia. Ae o le faiai o soo se tagata lava e oo lava ina poto ma sili atu ona mafai ona faia se mea pe a latou tepataulai [i se mea], iloilo po o le a le mea na sese, faataitai ni fofu fatufatui, saili le fesoasoani, galue malosi, ma faataitai.

Afai o loo e i ai i se tasi o ia vaega, ia faamanatu ia te oe lava, e leai se tasi e fanau mai ua avea ma se faifeautalai maoae. O tomai faafaifeautalai e tuputupu ae faatasi ma le faataitai, tele o le galue malosi, faia tulaga e ono afaina ai, faatoilaloina o mea faalavefau, toe taumafai pe a uma ni mea sese, aoao mai isi, ma le faalagolago atoa atu i le Alii. E alofa o la ia te oe, ma o le a fesoasoani ia te oe e faataunuuu au sini patino faapea foi ma se misiona talai.

## SAUNIA MO LE OLAGA FAAFAIFEAUTALAI

*Mo nisi manatu i le ala e saunia ai mo se misiona i le tami nei, ia maua mai le tamaitusi o punaoa Fetunai i le Olaga Faafaifeautalai i le store.lds.org pe ala foi i lou epikopo.*



# O LA TATOU AVANOA



*Pe na e maua se aafiaga o le mana o le Tusi a Mamona i lou olaga?  
la faataitai i ai e pei ona faia e nei faifeautalai!*

## SA OU MAUAINA LE VAEGA NA MISI

**A**o ou i ai i le aoga maualuga, sa ou le fiafia ai e uiga i nisi aaoaoga faavae o le Ekalesia. Sa iu ina ou oo atu ai i le toe malosi i le lotu. Sa ou auai atu i nisi o gaoioiga a se isi lotu, ae sa lei atoa lou olioli. Sa pei lava sa i ai se mea na misi.

Sa umi se taimi ou sueina le mea sa misi, ae i se tasi aso ina ua uma lau tatalo, sa pupula ou mata ma iloa atu le Tusi a Mamona i luga o lau laulau. Sa ou tau moe, ae oo mai se manatu ia te au: "Sa ou fanau mai o se Mamona. Ae aisea la e lei uma ai ona ou faitauina le Tusi a Mamona?" O lena la aso, sa tonu ai o le a ou faaumaina le faitauina o le Tusi a Mamona.

I le mavae ai o le tele o tausaga o sailili, o lenei ua iu ina ou maua le vaega na misi o lena fiafiaga. ■

Elder Jayme Promise, Misiona a Filipaina Aai o Quezon

## PE A SUSUE E TAGATA LE TUSI

**I**lau misiona na ou vaai ai i tagata o e inu ava, ulaula, ma faaaoga fualau faasaina, o susue le Tusi a Mamona ma liliu mai o latou ala ma foi mai i o latou aiga ma le Ekalesia. Ua ou vaai i atalii faamaumau oa o toe foi mai i le aiga ma faia ni misiona ina ua uma ona latou susueina lenei tusi.

Ua ou vaai i aiga malepelepe o faitau faatasi le Tusi a Mamona ma faamauina mulimuli ane ai i le malumalu. Ua ou vaai i tagata o e ua matuai leai se faamoemoe ma leiloa le mea e fai, o susue lenei tusi, ma amata ai ona toe sologa lelei mea uma.

O le taimi lava ou te susue ai le Tusi a Mamona ma faaaoga se fuai-upu e fesoasoani ai i se tasi, e tutupu ai vavega. O le mana o le Atua o loo

taoto i lalo o na itulau, o faatalitali mo se olaga ia suia, faatalitali mo se vavega e tupu. E mafai ona ou folafola atu ia te outou, e tutupu vavega i taimi uma e te susuea ai le Tusi a Mamona. Atonu e le o taimi uma o le mea o loo tatou mananao i ai pe tupu i le taimi tatou te mananao e tupu ai, ae o le a tupu. ■

Elder Benjamin Baradi,  
Misiona a Filipaina Bacolod

MAI LE GALUEGA  
FAAMISIONA

ATA NA TUSIA E DAVID STOKER

# O SE AGAGA O LOO TAGI MAI

*Sa lei foliga mai o ia o se tagata lelei e talanoa i ai. O se vaega o lou tagata sa fefe, ae o le isi vaega sa matuai manao lava e talanoa atu ia te ia.*

## Saunia e Stephen Dugdale

**S**a ou maua le avanoa e avea ai o se faifeautalai i Catania, Italia. Sa i ai se taimi, sa ma feagai ai ma se faafitali faigata i le galuega. O le ma vайaso atoa sa toetoe o mea uma lava na sese, ma o aso taitasi sa o se tofotofoga pe mata o le a tumau pea o ma agaga fiafia pe leai, ataata pea, ma faaauau ona taumafai malosi.

I se tasi afiafi, sa ma naunau ai lava e sui le faagasologa o mea. Sa ma feoai solo e talanoa i tagata i se paka e lata ane i le ma fale, ma sa ma vaaia ai le alii lenei o saofai i se nofoa umi ma lona ulu sa punou ma se sikaleti i lona gutu. Sa ofu uliuli o ia mai lava i le ulu e oo i tamaivae, ma fai le pulou o lona ofutele fefete. Sa lei foliga mai o ia o se tagata lelei tele e talanoa atu i ai. Sa ou tilotilo atu ia te ia, sa tilotilo atu i ai lau soa, sa ma tau fai autilo i le tasi ma le isi, ma toe tilotilo atu ia te ia.

Sa fesili mai Elder Farley ia te au, "Sa ta talanoa muamua ia te ia?"

"Pei uma lava na ta talanoa i ai, ona ou te manatu moni lava ou te iloa o ia," sa ou tali atu ai.

"Ioe, e faapena foi au," na fai mai ai Elder Farley.

O lea sa amata ai ona ma savavali atu ia te ia. O se vaega o au sa fefe ona sa le o ia o se tagata e masani ona

ou talanoa i ai, ae o le isi vaega sa matuai manao lava e talanoa atu ia te ia.

"Malo le soifua, o a mai oe?" sa ma fesili atu ai.

Sa ia tilotilo ae ma ni foliga uli, e pei o loo fai mai, "O ai lea e faalavelave mai i lau moe?" Ona ia fai mai lemu lea, "Malo le soifua." Sa ma faailoa atu i maua o ni faifeautalai, ma sa vave ona ia fai mai ia i maua o ia o se tagata e le talitonu i se atua ma e leai se mea na talitonu i ai. Sa ma fesili atu pe aisea, o lea, ou te manatu sa tei ai o ia,

"Ona, ua oti lou tina, tama, tuafafine, ma le tama teine a lou tuafafine i le masina lava e tasi, ma ua ou ola i se olaga leaga, ma tuuatoatasi ona o lena mea. E leai se mea na faia e tapuaiga ae na o le faaleaga atili mo au."

Sa ma fesili atu pe na te iloa le mea o i ai i latou e pele ia te ia.

"I le fanuatanu i Catania, i le mea ua leva ona latou i ai," sa ia tali mai ai.

Sa ma faamalamalama atu ia te ia le lalolagi o agaga ma le Toetu. Sa ma fai atu ia te ia, o le taimi nei, o i tatou taitoatasi o se agaga ma se tino, ma o le oti ua na o se tuueseesegea le tumau o le agaga ma le tino. Sa ma tau atu i ai, o tagata o lona aiga o loo faatalitali mai mo ia, seja mafai ona latou toe faatasia uma ma o latou tino ma ola faatasi mo le faavavau.

Sa ia tilotilo mai ia i maua, ma le le mautonu ma fai mai, "Ou te lei malamalamama i se mea o na mea. E mafai ona toe faamatala mai mea uma?"

O lea sa ma toe tauina atu ai mea uma. Ona ia faaalu lea i luga se fulufulumata i le le mautonu ma fai mai, "Faatali, o au o se agaga ma se tino? Ma o loo faatali mai lou aiga ia te au ma aoao i le taimi nei?"



Sa ma faitau atu ia te ia nisi o mau mai le Alema 40 ma isi mataupu, ma sa autilo mai ia i maua ma fesili mai, "Ae aisea ou te lei faalogo muamua ai i lenei mea?"

Ailogna ou feiloai muamua i se tagata e matuai lotomualalo faamaoni i lou olaga. O lenei alii sa matuai leiloa lava mo se taimi umi, matuai le mautonu, matuai tuuatoatas lava. Sa ia faalogo i mea uma sa ma fai atu ai, ma fai mai sa na o se mea ititi ua ia malamalamia i ai, ona o mea uma ia na te lei faalogo muamua i ai, ae sa fiafia i ai i mea uma.

Sa ma aoaoina o ia i le auala e mafai ona tatou maua ai tali e ala i le tatalo. Ua ova i le 30 tausaga e lei tatalo o ia, ma o le taimi mulimuli o le taulotoina o le tatalo i le lotu ao laitiiti lava. Ina ua uma ona matou talanoa e uiga i tali mai le Agaga, sa ia fesili mai pe faapei le lagona o le Agaga. Talu ai e mafai ona eseese mo tagata uma, o lea sa ma faasoaa atu ai auala na ma lagonaina ai. Sa ou fai atu ia te ia, o au e pei o le mauaina o se opo mai lou tina i le mavae ai o se taimi umi tele e te lei vaai ia te ia. Sa ou lagona le uuniga e folafola atu ia te ia, e mafai ma o le a ia lagonaina lena lava mea, o se lagona e pei o se opo mai lona tina o le na misia mai lona olaga mo se taimi umi tele.

Sa ma fai atu ia te ia pe mafai ona matou tatalo faatasi ma ia. Sa matuai le mautonu lava o ia ma fai mai, "I le taimi lenei? Ii, i le paka?"

"E mafai ona tatou tatalo i soo se taimi, i soo se mea tatou te mananao ai,"  
Sa ou fai atu ai ia te ia. "E fia faafofoga mai le Atua ia i tatou, ma e faapitoa ona naunau o Ia e faafofoga mai ia te oe ona ua leva tele e lei toe faalogo ia te oe."

E lei faalogo muamua lava o

## AUAI I LE AIGA O LE ATUA

"O [tagata] uma o fanau a le Atua, o ou uso ma tuafafine. E alofa le Atua ia i latou e pei foi ona alofa o la ia te oe. O le toatele o nei tagata o loo sailia le faamoemoega o le olaga. E manatu popole i latou mo o latou aiga. Latou te manaomia le lagona o le fia avea ma se itutino po o se vaega, lea e maua mai i le malamalamia o i latou o fanau a le Atua, o sui o Lona aiga faavavau."

*Tala'i La'u Talalelei: O Se Taiala mo le Galuega Faafafeautalai (2004), 1.*

ia i se tatalo e le taulotoina i se tagata paia, o lea sa fai lava si ona manao e vaai pe faapefea ona fai. Sa punonou o ma ulu, ma sa fai e lau soa le tatalo mo le ma uo fou, o Alefaio, ma talosagaina ni faamanuiaga, fesoasoani, ma faamafanafanaga mo ia. Sa ia ole atu ina ia lagona e Alefaio se tali o loo manuia lona aiga ma o loo i ai moni le Atua. Sa faauma le matou tatalo, ma sa tilotilo mai Alefaio ia i maua ma ni mata lapopoa.

"E tatau ona ou tau atu se mea ia te oulua," na ia fai mai ai. "E le o au o se tagata e pepelo, ae maise lava e uiga i se mea e pei o lenei. Ua ou lagona le pei lava na ou maua se opo lapoa mai lou tina. Ua umi tele ou te lei toe maua se opo mai se tagata. Ese le manaia o lena lagona. Ou te fia iloa pe faapefea ona ou toe maua lena lagona, ona ou te manao i nisi opo se tele faapena."

---

**"Talu mai lava lena tatalo, ua ou fealuai solo ma lou ulu ua ea i luga, ma ou autilo i mea uma. E ese le manaia o lenei lalolagi."**

---

O le aso na sosoo ai, sa matou toe feiloai ai. Sa saofai Alefaio i o ma talaane i luga o lena lava nofoa umi ma fai mai "Elders, o lou olaga atoa sa ou fealuai ma fai le pulou o lou ofu ma punou lou ulu, ma faataupupula i le eleele. Ou te lei savali lava ma lou ulu i luga. Talu mai lava lena tatalo, ua ou fealuai solo ma lou ulu ua ea i luga, ma ou autilo i mea uma. E ese le manaia o lenei lalolagi."

E le tau tau atua, sa faaauau ona ma galulue ia Alefaio, e aumaia nisi opo se tele, malamalamia e tele, ma le tele o le tepa ae i luga i lona olaga. O le alii taufaafefe sa i luga o le nofoa umi o le sa foliga mai o le a ita ia i maua, o le mea moni o se agaga o loo tagi mai, ma augani mai ia ona toe lagonaina le alofa o lona Tama Faalelagi. ■

*E alala le tusitala i Misuri, ISA.*



Elder David A. Bednar

O le Korama a Aposetolo  
e Toasefululua

## AUALA E FESOASOANI AI FAIFEAUTALAI

**A**tonu tatou te tatalo mo le saogalemu ma le manuia o faifeautalai faamisiona i le lalolagi atoa. Ma o se elemene masani i le tele o a tatou tatalo o se talosaga lea ia taitai faifeautalai i tagata ma aiga ua saunia mo le mauaina o le savali o le Toefuataiga. Ae o le mea moni lava, o lo'u tiutetauave ma lou tiutetauave le sailia o tagata mo faifeautalai e aoao. O faifeautalai o faiaoga i le taimi atoa; o oe ma au o le au saili i le taimi atoa. O oe foi ma au i le avea ai o ni faifeautalai i le olaga atoa, tatou te le tatalo e fai e faifeautalai faamisiona le galuega a tatou!

Afai e te tatalo ma ou tatalo ma ole atu ma le faatuatua, e faapei ona faia e Iosefa Samita—afai tatou te tatalo ma le faamoemoe e galulue a e le na o le faailoa atu o o tatou manao—ona agai ai lea i luma o le galuega o le folafola atu o le talalelei i se ala ofoofogia. O lena tatalo o le faatuatua e mafai ona aofia ai nisi o elemene nei:

- Faafetai atu i le Tama Faalelagi mo aoaoga faavae ma sauniga o le talalelei toefuataiina a Iesu

Keriso, lea ua aumaia ai le faamoe-moe ma le fiafia i o tatou olaga.

- Ole atu mo le lototele ma le toa e tatala ai o tatou gutu ma faasoaa atu le talalelei i o tatou aiga ma uo.
- Ole atu ma le faatauanau i le Tama Faalelagi ina ia fesoasoani mai ia i tatou ina ia iloa tagata taitoatasi ma aiga o le a taliaina la tatou valaaulia ina ia aoaoina e faifeautalai i o tatou fale.
- Tautino atu e faia la tatou vaega i le asō ma lenei vайaso ma faatoga atu mo se fesoasoani e faatoilalo ai le atuuvalae, fefe, ma le faalotolotoluia.
- Saili mo le meaalofa o le iloatino—mo mata ia vaai ma taliga e faalogo ai i avanoa faafaifeautalai pe a tulai mai.
- Tatalo faatauanau mo le malosi e faatino ai pe a tatou iloa ua tatau ai.

O le a faaalia le lotofaafetai, ma e mafai foi ona talosagaina isi faamanu-iaga i lena tatalo, lea o le a faaiuina i le suafa o le Faaola. Ona faaauau ai lava



lea ma faateleina le galuega faapaiaina o lena tatalo.

O le mamanu foi lava lea o le fesoootaiga paia ma le galuega faapaiaina e mafai ona faaaoga i a tatou tatalo mo e matitiva ma ē le tagolima, mo e mama'i ma e puapuagatia, mo tagata o aiga ma uo o loo tauivi ma faigata, ma i latou e le o auai mai i sauniga a le Eklesia.

Ou te molimau atu e matua aoga lava le tatalo, pe a tatou ole atu ma le faatuatua ma faatino. Ou te valaaulia i tatou uma ina ia tatalo ma le faatuatua mo le poloaga ua tuuina mai le lagi ia i tatou e folafola atu le talalelei. A tatou faia, ou te folafola atu o le a talaia faitotoa ma o le a faamanuiaina i tatou i le iloa ma galueainaa avanoa o le a tuuina mai. ■

*Mai se saunoaga i le konafesi aoao ia Aperila 2008.*

“E palauvavale ou matua, faalogologo i musika malomaloa, ma matamata i ata le talafeagai o le televise. O le a se mea e mafai ona ou faia ia lagonaina ai le Agaga i le pale, ae maise lava i aso Sa?”

**I**na ua papatisoina oe, na e maua le meaalofa o le Agaga Paia. O le uiga o lenei mea, e le afaina po o a ou tulaga, e mafai ona e maua le mafutaga a le Agaga pe afai e tausisia lou agavaa ma fai faaigu lelei faaletagata lava ia.

Ao e ai ma inu i le faamanatuga i vaiaso taitasi, o le a faamanatu atu ai au feagaiga ma le Tama Faalelagi e “tauave i [ou] luga le suafa o [Lona] Alo, ma manatua pea o ia ma tausia ana poloaiga . . . ina ia mafai ona [e] maua i taimi uma lona Agaga e faatasi ma [oe]” (MF&F 20:77). E ala i le tausia o au feagaiga, e tumau ai lou agavaa mo le mafutaga a le Agaga.

O le auai i sauniga faamanatuga ma isi sauniga a le Ekalesia, e le na o le pau lea o le auala e taulai atu ai lou Aso Sa i le tausia o feagaiga. E tusa lava po o a tulaga o lou aiga, e mafai ona e faaali atu i le Tama Faalelagi lou tautino i au feagaiga e ala i le galue i lou talafaa solopito o aiga, suesue i le talalelei, ma auauna atu i isi, ae maise lava i latou e lagona le tuuatoatasi pe mamai. O le filifilia o nei ituaiga o gaoioiga, e tusa lava pe le faia e tagata o lou aiga, o le a aumaia ai ia te oe le fiafia ma le olioli. (Tagai Russell M. Nelson, “O Le aso Sapati o se Aso Fiafia,” *Liahona*, Me 2015, 129–32.)



### Tautala Atu

E tusa lava pe o ou matua o ni tagata o le Ekalesia pe leai, talanoa i ai i le pogai e taua ai ia te oe le i ai i taimi

uma o le Agaga i lou aiga, ae maise lava i Aso Sa. I lou tulaga, e mafai ona e filifilia le nofoaga aupito toofilemu i totonu o le pale ma valaaulia isi tagata o le Ekalesia e o mai e faatasi ma oe ma valaaulia faatasi ai le Agaga ia i ai iina. Ou te iloa afai e te tausia le paia o le Aso Sapati, o le a faamanuia tele oe e le Alii.

*Joskares C., 16 tausaga, Santo Domingo, Dominican Republic*



### Tatalo mo Ou Matua

E mafai ona e tatalo mo ou matua. E pei ona tusia e Mamona, “Ma o le a manatua foi e le Alii tatalo a e amiontonu,

ia sa tuuina atu ia te ia mo i latou” (Mamona 5:21). Atonu o le a le taofe ou matua i le tami lava lena, ae o le a fesoasoani le Alii ia te oe.

*Cole M., 17 tausaga, Arizona, ISA*

### Taulai atu i le Faia o Mea Lelei

O Aso Sa e faigata lava ia te au i le pale. E na o au le tagata o le Ekalesia i le matou pale, ma o ou matua ma ou uso e matamata televise ma faalogologo a latou musika i le Sapati. Ou te manao e faaali atu lou alofa i le Tama Faalelagi e ala i le tausia ia paia le aso Sapati. E mafai ona ou alu i lou potu ma faitau au tusitusiga paia,



faalogologo i musika Lotu, ma alu a matou asiasiga ma au uo pe faatasi foi ma faifeatalai. Ou te faafetai lava i le i ai o le fesoasoani a le Alii e faamamalu ai le aso Sapati ma le maelega, ma mo le malosiaga o loo Ia tuuina mai i taimi uma ia te au.

*Lais de Jesus M., 19 tausaga, Sergipe, Pasila*

### Liliu atu i Tusitusiga Paia

Talanoa i ou matua e uiga i mea o latou faia, ae afai e le faalogo mai, e mafai ona e tatalo mo le taitaiga i auala e fesoasoani ai e te lagona le Agaga i lou aiga. Ina ia lagona le Agaga i lou aiga, ou te faitau i tusitusiga paia, ma o lena mea e aumaia vave ai le Agaga i totonu o le potu.

*Blake E., 14 tausaga, Iuta, ISA*



### Faaaoga Punaaoa a le Ekalesia

Afai e i ai sau telefoni poto po o se tamai komepiuta feaveai, e mafai ona e siimaia polokalama o le Mormon Channel ma le LDS Youth. E tumu i pese, vitio, ma tautalaga matagofie e aumai ai lava i taimi uma le Agaga pe a ou kiina! E faigofie lava, ae e fesoasoani tele ia te au e lagona ai le Agaga e tusa lava pe siomia au i le pisapisao. E faia ai se eseesege ma aumai ai le filemu i le fale atoa.

*HunterEve V., 16 tausaga, Texas, ISA*

### Mulimuli i le Faataitaiga a Keriso

E taua le faatumulia o se fale i le Agaga, ae e sili atu le taua o le

faatumulia ai o se tagata. O Keriso o le faataitaiga silisili lea o le i ai o le Agaga faatasi ma Ia i taimi uma. Tau lava o le taumafai ia ola atili e pei o Keriso, o le agalelei i isi, ma le vaai atu i le lalolagi i le ala o le a Ia vaai ai, atonu o le auala sili lea ona lelei e faatumau ai le Agaga ia te oe po o fea lava e te i ai.

*Isabel W., 16 tausaga, Oregon, ISA*

### Fautua Atu ni Gaoioiga Faaleaiga

I Aso Sa, atonu e fautua atu gaoioiga e mafai ona tou faia faatasi o se aiga. Fautua atu se mea e mafai ona fai e le aiga e faatasitasi ai, lea e le mafai ai ona tutupu na mea e le talafeagai. Afai o loo outou faia se mea faatasi o se aiga, e aumaia vavalalata ai outou. Ma e avatu ai foi ia i latou se manatu ese o mea e mafai ona tou faia i Aso Sa. Atonu o le Aso Sa e sosoo ai, o le a latou faapea atu, “Ei, o le mea sa tatou faia i le taimi ua tea sa malie—tatou toe faia.”

*Ryan B., 19 tausaga, Idaho, ISA*



### FAATINOINA O UUNAIGA

“Ou te ofo atua lenei faamalosiauga. Sa i ai ni taimi na e lagonaina ai le faatosinaga a le Agaga Paia....

“E mafai ona e taulimaina na taimi o musumusuga e pei o le fatu o le faatuatua na faamatalaina e Alema (tagai Alema 32:28). Toto fatu taitasi. E mafai ona e faia lena mea e ala i le faatinoina o le uunaiga e te lagonaina. O le musumusuga sili ona taua o lou silafia lea o le finagalo o le Atua mo oe....

“A e usitai, o le a atili ona aumai sooi ia uunaiga mai le Agaga, ma saga latalata atu ai pea i le mafutaga faifai pea. O le a faateleina lou mana e filifili ai le mea sao.”

*Peresitene Henry B. Eyring, Fesoasoani Muamua i le Au Peresitene Sili, “O Le Agaga Paia e fai ma Au Soa,” Liahona, Nov. 2015, 105.*

## FESILI O LE A SOSOO MAI

“Fai mai lau uo lelei lava e le talitonu i le Atua. E mafai faapefea ona ou faasoa atu le talalelei ia te ia?”

Auina mai lau tali ma se atapue sili ona manino, pe a e manao i ai, a o lei oo i le aso 1 o lulai, 2016, i le liahona.lds.org, po o le imeli i le liahona@ldschurch.org, pe lafo mai i le meli (tagai i le tuatusi i le itulau e 3).

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) o lau faatagaga tusitusia, ma, afai e itiiti ifo i le 18 ou tausaga, o le faatagaga tusitusia a ou matua (e talia foi le imeli) e lolomiina ai lau tali ma lou atu.

E ono faapupuuina tali mo le uumi po o le manino.

# AUALA E AVEA AI MA SE UO LELEI

Saunia e David Morales

Tatou te mananao uma lava ia lagona le faaaofiaina.  
O mea nei e mafai ona e faia pe afai e te lagona  
po o se isi foi tagata le le faaaofiaina.

## AUALA E FAI AI NI UO LELEI

E tiga le le faaaofiaina, ae o le ita po o le taofimau i le ita o le a le fesoasoani lea e te mauai se lagona lelei. Nai lo o lena, taumafai e fai mea nei:

- Auai i gaoioiga a le Eklesia. O avanoa lelei nei e siomia ai oe lava i tagata o e faaaloalo i ou tulaga faatonuina.
- Aoao ma atiina ae tomai. Auai i faalapotopotoga a tamaiti aoga, au taalo, po o kalapu, o se auala lelei lea e faamasani ai i tagata o e tutusa ia mea tou te fiafia i ai.
- Aua le faatali i taimi uma mo isi tagata e fai atu ia te oe e avea ma a latou uo. Faailoa atu oe lava i isi.
- Ia avea ma tagata sili ona lelei e mafai ona e avea ai, ma ia tumau pea i ou tulaga faatonuina. O le a e maua ni uo e talisapaia oe mo lou tagata ma le malamalamae te faasusuina atu.
- Faaalu lou taimi ma lou aiga. E mafai ona e iloa ai, o nisi o au uo sili ona lelei o loo maua lea i totonu o lou lava aiga.

**S**a amata ona ou suesue i le Eklesia ao ou talavou, ae sa ou le toe alu i sauniga i aso Sa ona sa ou lagonaina le le faaaofiaina e le toatele o le autalavou. O se taimi mulimuli ane, sa valaaulia ai au e se tasi o na talavou i se gaoioiga a le Eklesia. Sa ou talaina ma fiafia i gaoioiga aua o mea ia sa ou fiafia e fai: faatino [ni tala], taalo pasiketipolo, ma le momo'e.



Ao faaaauua ona ou auai i gaoioiga, sa amata ona ou masani i le autalavou ma ou iloa ai, o le toatele o i latou sa aooga i lau aoga. I le aluga o taimi, sa mafai ona ou atiina ae ni faauoga ma alii ma tamaitai talavou o e sa tutusa ia tulaga faatonuina ia sa ou ola ai. Ou te faafetai ona sa valaaulia au e se tasi i se gaoioiga a le Eklesia, ma ou te faafetai ona sa ou taliaina.

Pe na e oo i lagona sa ou oo i ai: o le le faaaaofaina pe faapea ona e le tutusa [ma isi tagata]? Pe sa e iloa se tasi na te lei lagona le taliaina ma sa lei tele ni ana uo sa i ai? Po o le aoga, i le lotu, po o nisi nofoaga, e toatele tagata sa manatu faapena i se taimi o o latou olaga.



## IA MANATU I ISI



“Ou te faamoemoe o le a tatou taumafai i taimi uma ina ia manatu manofouta i mafaufauga ma lagona ma tulaga o i latou o siomiaina i tatou. la aua ne’i o tatou faatiga pe faifai atu. Ae, ia tatou agaalofa ma faamalosiau atu.”

Thomas S. Monson, “Alofa—o le Ute o le Talalelei,” *Liahona*, Me 2014, 93.

## AUALA E FAAAAOFIA AI ISI TAGATA

O nisi taimi e ono foliga faigata ai ona aluese mai mea ua tatou masani ai ma faauo atu i isi tagata, ae a tatou manatua o i tatou uma o fanau a le Atua, o le a tatou vaia le taua o le fesoasoani atu i isi. O nisi nei o manatu:

- Talamoa atu i tagata fou i le aoga ma le lotu. Faailoa atu i latou i au uo.
- Valaaulia se tasi o loo manaomia se uo i se gaoioiga a le aoga po o le Eklesia.
- Aoai—ma le agalelei ma le onosai—tagata o e faia ma le loto i ai ina ia lagona e isi le le taliaina.
- Saofai i talane o se tasi o nofo toatas pe valaaulia o ia tou te nonofo faatasi ma au uo.
- Tatalo i le Tama Faalelagi pe a e le iloa se auala e fesoasoani ai i se tasi. O loo la silafia lelei le mea o loo manaomia e lena tagata ina ia fiafia ai, ma e mafai ona fesoasoani ia te oe e te ofoina atu lena fesoasoani. ■

*E alala le tusitala i Santa Cruz, Polivia.*

# Tu mo le Mea Tonu

Saunia e Aysia Tan, luta, ISA



## TALOFA, O A'U O EVENI!

Ou te nofo i Aialani, ma ou te fiafia e taalo i se taaloga e tau o le sasau. O se taaloga faaAialani e tai pei lava o le hoki i le malae. O le mataupu e sili ona ou fiafia i ai o le matematika. O le avea ma se tagata o Le Ekalesia a Iesu Keriso o le Au Paia o Aso e Gata Ai o se faamanuiaga ia te au.



**TU MAUALUGA I LE AOGA**  
*Sa sauā se tamaitiitī fou i le aoga i ou tuafafine. Sa ou tu atu i lo latou va e puipui ou tuafafine. Ou te usitai foi i le Upu o le Poto. O le toatele o tamaiti i le aoga e inu lauti ma kofe. A ofo mai e se tasi ia te au le lauti, ou te fai atu, "Leai, faafetai."*



### TATALO FAATASI MA UO

*Ou te aoga i se aoga Katoliko. E nao i matou ma ou tuafafine ia tamaiti aoga o ni tagata o le Ekalesia a Iesu Keriso o le Au Paia o Aso e Gata Ai. Ina ua mai lou tinamatua, sa ou talosaga i lou faiaoga pe mafai ona ou faia se tatalo mo ia. Sa piilima ma punonou ulu o tagata uma o le vasega. Sa ou faia leotele se tatalo i luma o le vasega.*

### AVEA MA SE FAATAITAIGA

*E iloa e au uo i le aoga ou te fiafia. Ou te faia se faataitaiga lelei e ala i le le palauvale pe tau fua le suafa o le Alii. E mafai foi ona fai au ma se faataitaiga i lou aiga.*

## O MOTUGAAFA A EVENI MO LE TU MAUALUGA

E manaomia le lototele e ola ai i le talalelei.

- Aua le fiu.
- Faalogo i le Agaga Paia. O le a la taitaia oe.
- Ia manatua, o le fesoasoani i isi tagata ia maua le talalelei, o le a atili fiafia ai o latou olaga.

### O LE TUAGANE MATUA SILI ONA LELEI

*Ou te faia ni sini ia faia pe a mea sao. Ou te fesoasoani i ou matua e vaai ou tuafafine. A fefefe ou tuafafine, matou te taaalo seia oo ina gallo lo latou fefefe. Ao o ese ou matua i se tasi o taimi, sa ou faamatala atu ai i lou tuafafine ni tala seia oo ina moe o ia.*

## AUINA MAI IA I MATOU LOU TULAGAVAE!

E faapefea ona e tu maualuga e mulimuli ia lesu? Tusi lolomi le ata o lou tulagavae ma auina mai ia i matou lau tala ma le ata, faatasi ma le faatagaga a ou matua. Auina mai i le liahona.lds.org (kiliki le "Submit an Article") po o le imeli liahona@ldschurch.org.





# O Le Paga Suesue a Ionatana

**Saunia e Kirstin Ide**

E faavae i se tala moni

*"Le Agaga e taitai ai, ma ou iloa ai mea moni"* (Tusipese a Tamaiti, 66).

**U**a ova ma se tausaga e lei toe vaai Ionatana i lona tuafafine o Kilisi—ae na pei lava ua faavavau! E le o toe umi ae sau o ia i le fale mai lana misiona e fai lona taotoga. Sa faanoanoa Ionatana ona sa mai o ia, ae sa fiafia ona e le toe umi ae la toe faatasi.

Ina ua foi mai o ia mai le aoga i le aso na soso ai, sa saofai atu Kilisi i luga o le nofoa. Sa momoe

atu Ionatana ma fusi o ia.

“Malo, Ionatana! Sa ou misia lava oe!” na fai atu ai Kilisi.

Sa ataata Ionatana. “Sa ou misia foi oe! Tai leaga ua e mai.”

“Faafetai, uo,” o le tala lea a Kilisi. Sa ia uuina le Tusi a Mamona i luga o ona vae.

“E mafai ona ou faitau ma oe?” sa ia fesili ai.

“Aisea e te le alu ai e aumai lau Tusi a Mamona, ona ta amata faatasi lea i le amataga.”

Sa tamoe atu Ionatana i lona potu ma uu mai lana kopi. “Lea ua i ai!”

o lana alaga lea ao toe tamoe mai. Sa ia soso atu i autafa o Kilisi.

Sa la susue i le itulau autu. “O Le Tusi a Mamona: O Se Tasi Molimau ia Iesu Keriso,” na faitau ai Ionatana. Sa la faitau feauauai.

“I lau misiona e duesue ai au tuis-tusiga paia faatasi ma lau soa i aso uma lava,” o le tala lea a Kilisi. “E mafai ona avea oe ma au paga duesue seia oo i le taimi ou te toe foi ai i lau misiona?” o le fesili lea a Kilisi.

“Ia!” o lana tala lea.

O ni nai aso mulimuli ane, sa faia ai le taotoga a Kilisi. Sa sau o ia i



le fale mai le falemai e malolo ma sei toe manuia mo ni nai vайaso. Sa la suesueina faatasi ma Ionatana le Tusi a Mamona i aso uma.

Ao lei toe foi atu o ia i lana misiona, sa fai atu Kilisi, "Ionatana, ou te manao e lui oe e faauma le faitauina o le Tusi a Mamona ae e te lei papatiso!"

Sa mafaufau Ionatana i lena mea. O lona aso fanau lona valu sa na o ni nai masina oo i ai. O le a tele ana fatauga e fai. Ae sa ia manao e fai. "Ioe," na fai atu ai Ionatana.

"Ao e faitau, e mafai ona e tatalo ma fesili pe moni?" sa fesili atu ai Kilisi. "Na folafola mai Moronae, a tatou faia lena mea, o le a tau mai e le Agaga Paia ia i tatou pe moni."

"Lelei la," na fai atu ai Ionatana.

E oo ane i le taimi na toe foi ai Kilisi i lana misiona, ua oo le la fatauga faatasi i le 2 Nifae.

*Na misia e Ionatana le avea ma paga suesue a Kilisi. Ona ia maua lea o se manatu lelei lava!*

Sa matuai misia lava e Ionatana ia Kilisi. Sa faapitoa lava ona ia misia le avea ma ana paga suesue. Peitai, sa ia maua se manatu lelei lava!

I le aoga i le aso na sosoo ai, sa ia savali atu i le kesi a lana uo lelei lava o Siaki.

"O le a ou faitauina atoa le Tusi a Mamona ao lei oo i lou papatisoga," na fai atu ai Ionatana. "Talu ai o le a papatisoina i taua i le aso lava e tasi, e te fia faia foi la?"

"Ioe," o le tala lea a Siaki. "Ou te lei faitauina atoa muamua lava le Tusi a Mamona."

O aso uma lava i le aoga, e fesili ai le tasi i le isi i le fesili lava e tasi.

"O fea lena ua e oo i ai?"

"O le faaiuga o Iakopo. Ae o fea lena ua e oo i ai?"

E lei leva ae le toe manaomia ona la toe faia lena fesili. Sa na o le tilotilo atu o le tasi i le isi ma la iloa ai le fesili.

"Ou te manatu ta te faaumaina i le taimi tonu mo o ta papatisoga," o le tala lea a Ionatana.

Mulimuli ane, na oo mai le aso o o la papatisoga.

"Sa ou faaumaina anapo," sa musumusu atu ai Ionatana.

"Ma au foi!" Na fai mai ai Iakopo. "Ma sa ou tatalo ia iloa pe moni, ma sa ou lagonaina le mafanafana ma le fiafia tele."

Sa ataata Ionatana. "Faapena foi [au]. Sa ou fiafia lava ao ou tatalo." Sa matuai faafetai o ia mo le lui a Kilisi. O lea sa ia atinaeina lana lava molimau. ■

*E alala le tusitala i Virginia, ISA.*



# O Le Ofutau Atoatoa o le Atua

Ua aoao mai tusitisiga paia e tatou ona tatou oofu i le “ofutau atoatoa” o le Atua (tagai Efeso 6:11–18 ma le MF&F 27:15–18). A tatou aoao i tusitisiga paia ma tatalo, e pei o loo tatou faamauluina le ofutau e fesoasoani e puipui saogalemu i tatou.



## PULOU O LE FAAOOLATAGA

O se pulou e puipui ai le ulu. Tatou te tausisa le soagalemu o o tatou mafaufau pe a tatou mulimuli ia lesu ma fai mea e finagalo o la tatou te faia.

## TALIPUPUNI O LE FAATUATUA

Ole faatuatua ia lesu Keriso e pei o se talipupuni o le puipuiga. A tatou talittonu ia lesu ma taumafai e pei o la, e mafai ona tatou fai filifiliga lelei, e tusa lava pe faigata ia mea.

### UFIFATAFATA O LE AMIOTONU

Ole uififatafata e puipuia le fatu. A tatou alolofa i le Atua ma o tatou loto atoa, tatou te taumafai e tauasi Ana poloaiga. E faamanuaina i tatou pe a tatou filifilia le mea sao.



### FUSI O LE FAAMAOANI

O se fusi o se fusipau e fesoasoani e puipuia le tino o se fitafita. O le iloa o le mea moni e puipuia ai i tatou. E moni le talalelei, ma o le ola ai i le talalelei e faamalosia i tatou.

### SEEVAE O LE SAUNIUNIGA O LE FILEMU

O seevae e puipuia vae. Tatou te taumafai e mulimuli i tulagaaao o lesu Keriso ina ia mafai ona tatou nonofa faatasii ma la i se aso.



### PELU O LE AGAGA

O se pelu e fesoasoani e tau faasaga ai i le sese. E fesoasoani le Agaga ia itatou pe a tatou feagaima mea leaga po o mea faigata. O le faalogo i le Agaga e fesoasoani tatou te tumau ai i le saogalemu.



O le a se mea e mafai ona e faia i aso uma ia saogalemu ma fiaffia ai lou agaga?




Saunia e Elder  
Neil L. Andersen

O le Korama  
a Apostolo e  
Toasefululua

# O a folafolaga tatou te faia i le papatisoga?



Tatou te tauave le suafa  
o lesu Keriso i o tatou  
luga ma avea ma se  
tagata o Lana Ekalesia.



A uma lena, ao tatou aai  
ma feinu i le faamanatuga  
i vaiaso taitasi, tatou te  
folafola atu e manatua  
lesu. Tatou te folafola atu  
e tausi Ana poloaiga.



Tatou te talitonu ia te la.  
Tatou te tapuai ia te la.  
Tatou te mulimuli ia te la.

*Mai le "Ia Oo Mai Lou Malo," Liahona, Me 2015, 119–123.*

# O LA TATOU ITULAU



*Sa lelei lava ou lagona i le taimi o lou papatisoga. Sa fai si ou faafefefefe laitiiti i le amataga, ae ina ua ou alu atu i le vai, sa tea ese le fefe. Sa ou lagona le matuai saogalemu i totonus o le faatanoa vai papatisoga. Sa ou lagona le fiafia tele ona sa ou faia se filifili e papatiso. Ou te iloa o le Ekalesia a lesu Keriso o le Au Paia o Aso e Gata Ai e moni ma o loo i ai se Atua soifua.*

Neyiana V., 8 tausaga, Pasila



*E talanoa mai lou tama ma lou tina ia i matou e uiga i le malumalu. La te faaali mai se ata o le malumalu ma molimau mai i ona faamanuiaga e faavavau.*

Tresor I., 7 tausaga, Congo



*Sa matou o atu ma lou aiga i le malumalu, ma ua ou iloa o le malumalu o le maota moni lea a lesu Keriso.*

Helam A., 5 tausaga, o Peru



## O Le Foafoaga

I le amiontonu, sa foafoaina ai e le Tama Faalelagi lenei lalolagi tiotio.

Na la aumaia le malamalama i le pouliuli ma fai le ea, sami, ma laueleele.

Ma le anoanoai o mea ma vaitau fesuisuiai e faaopoopo atu i le naunau fiafia mai.

Na i ai le la, le masina, ma fetu, ma manuvaefa ia i ai faatasi ma i tatou.

Ona foafoaina ai lea o le tagata e pulea lenei lalolagi.

Ua mafai nei ona malolo le Tama Faalelagi.

I le aso paia tatou te aoao ai le tele o mea e uiga i nei upumoni.

C. Ling-yao, 10 tausaga, Taiuani

# Sa Avea Apiso ma se Faifeautalai

**S**a aoao e le tama o Apiso o ia ia talitonu ia Iesu Keriso. I lona nuu, e le toatele ni tagata sa talitonu ia Iesu. Ina ua oo mai Amona i lona nuu ma aoaoina le Tupu o Lamonae, sa iloa e Apiso sa manao le Tama Faalelagi e na te faasoa atu le talalelei i tagata. Sa iu ina mafai ona ia tau atu i tagata uma e uiga ia Iesu.



I se tasi taimi, sa faia ai e le matou aiga se fuafuaga faamisiona. Sa matou filifilia mea o le a fai e i matou uma taitoatasi. Sa ou filifili e tuu atu i lou faiaoga o le vasega lua se Tusi a Mamona. Ina ua ou tuuina atu ia te ia, sa ia fai mai, "Faafetai lava, Atamu. Ou te fiafia e faitau." Ua ou fiafia lava ua mafai ona matou faia se fuafuaga faamisiona.

**Atamu W., 8 tausaga, luta, ISA**



"Apiso ma le Masiofo," Marley D., 6 tausaga, Uosigitone, ISA



Oti, gagau, ma teu lenei kata o le lu'i!

**APISO**



## E Mafai Ona Avea Au ma Faifeautalai i le Taimi Nei!

- Tauloto le Alema 19:36.
- Valaaulia se uo e sau i le Peraimeri e aoao ai e uiga i le talalelei.
- Fesoasoani ia tuputupu ae lau molimau e ala i le faasoa atu i se tasi!
- Ua ou luiina au lava ina ia . . .

## O Mau o le Masina Lenei

A uma ona e faitaua se fuaitau o mau, ona valivali lea o vaega o fuainumera e tutusa i luga o le laauiti!

- 1 Alema 31:5–6, 12–16, 24–26
- 2 Alema 32:1, 4–7, 21–23, 28
- 3 Alema 34:1, 8–10, 17–28
- 4 Alema 36:5–11, 18–24
- 5 Alema 37:3–7, 14–17
- 6 Alema 38:1, 9
- 7 Alema 40:11–12, 23–26
- 8 Alema 41:10



## Totoina o le Faatuatua

**S**a aoao e Alema ma Amoleka le toatele o tagata e uiga ia Iesu Keriso. Sa laua suia olaga o tagata e ala i le totoina o le fatu o le faatuatua. Sa avea Alema ma isi o ni faifeautalai ma talai atu le afioga a le Atua. Vaavaai mo le isi luitau o le faitauga i le isi masina e sosoo ai! ■

# Ua Aoao Mai e Alema le Auala e Tatalo Ai



Sa o atu Alema le Itiiti ma isi  
e aoao atu i le au sa Sorama.  
Sa masani ona talitonu sa  
Sorama i le Tama Faalelagi,  
ae [latou] te lei toe tausia Ana  
poloaiga. Latou te lei talitonu  
ia Iesu.

Ma sa latou le manatuaina  
le auala sao e tatalo ai.

E faatasi i le vaiaso ona auauai sa Sorama e tatalo. Latou te feaei  
i luga o se tulaga maualuga lava. E sisii maualuga o latou lima.  
Ona latou faafetai lea i le Tama Faalelagi ona sa sili atu lo latou  
faapitoa nai lo isi tagata. E fai e tagata uma taitasi lena lava  
tatalo e tasi.





E pau le taimi e tatalo ai sa Sorama o le taimi e feaei ai i luga o le tulaga. Latou te lei mafaufau i le Tama Faalelagi pe tatalo atu ia te Ia i le fale po o se isi lava mea.



Sa aoao e Alema ia tagata e mafai ona latou tatalo i soo se taimi. E mafai ona latou tatalo i le fale, i fanua, po o i le vaomatua. Sa ia aoao atu e mafai ona latou tatalo e uiga i soo se mea ma o le a fesoasoani le Tama Faalelagi ia i latou.



E mafai ona tatou tatalo i le auala na aoao mai e Alema. E mafai ona tatou tatalo i soo se taimi ma i soo se nofoaga. E mafai foi ona tatou tatalo le leoa i o tatou loto. O le a faafofoga mai le Tama Faalelagi ia i tatou i taimi uma! ■

# E Mafai Ona Ou Migao





Saunia e Peresitene  
Spencer W. Kimball  
(1895–1985)

Peresitene Lona  
Sefululuua o le Ekalesia

# O LE A MA LE AISEA MA LE E FAAPEFEA O LE TUUINA ATU O SE MOLIMAU

*O taimi uma lava e tuu atu ai lau molimau  
e faapea ona faamalosiaina ai.*

**E mafai ona maua e tagata uma i lenei lalolagi se faaaliga, e tutusa lava ma le faaaliga na maua e Peteru [tagai Mataio 16:13–17]. O lena faaaliga o le a avea ma se molimau, o se malamalamo o loo soifua Keriso, o Iesu Keriso o le Togiola o lenei lalolagi. E mafai ona maua e tagata uma lenei faamautinoaga, ma a ona maua loa lenei molimau, o le a sau mai le Atua ae le na o le suesue lava ia. Ioe, o le suesue o se elemene taua, ae e tatau ona i ai faatasi ma le suesue ma le tatalo tele ma le aapa atu, ona oo mai ai lea o le faaaliga lenei. . . .**

O sauniga molimau o nisi ia o sauniga sili ona manaia i le uarota i le masina atoa, pe afai e ia te oe le Agaga. Afai e te faaivaiva i se sauniga molimau, e i ai se mea o tupu ia te oe, ae le o isi tagata. E mafai ona e tu i luga e fai lau molimau ma e mafaufau o le sauniga aupito sili lea ona manaia i le masina; ae afai e te saofai iina ma faitau mea sese o le kalama ma ata i le tamaloa e le lelei lana tautala, o le a e



iva, ma o lena tulaga, o le a e sesee sao atu ai i fafo o le malo. . . .

O masina uma lava e fono ai le Au Peresitene Sili ma le Toasefululuua ma Au Pulega Aoao uma i le malumalu. Latou te tuuina atu molimau ma latou tau atu i le tasi ma le isi lo latou alolofa i le tasi ma le isi e pei lava o outou uma. Aisea e manaomia ai e le Au Pulega Aoao se sauniga molimau? O le mafuaaga lava e tasi lea e te manaomia ai se sauniga molimau. E te manatu e mafai ona e alu i le tolu, ma le ono, ma le iva, ma le sefululuua masina e aunoa ma le tuuina atu o lau molimau ma e tausisia ai pea lona taua atoa?

O nisi o o tatou tagata lelei, e matuai fefefe lava i le faia o faamatalaga masani o lea latou te taumafai e aloalo ese mamao ai lava mai a latou molimau e ala i le talanoa i mea e le faatatau i le molimau. Aua lava nei popole i faamatalaga fai soo i moilmau.

A tuuina mai e le Peresitene o le Ekalesia lana molimau, e faapea mai o ia, “Ou te iloa o Iosefa Samita sa valaauiua e le Atua, o se sui o le lagi. Ou te molimau atu o Iesu o le Keriso, o le Alo o le Atua soifua.” Ua e vaai, o le mea lava e tasi lea e fai atu e outou uma lava. O le molimau le mea lena. . . .

O se molimau e le o se apoapoaiga; o se molimau e le o se lauga (e leai se tasi o outou ua i ai iina e apoapoi atu i tagata uma); e le o se talatalaga o se malaga. E te i ai iina e tuuina atu la oe lava tautinoga. E ese le maoae o mea e mafai ona e tautala atu ai i le 60 sekone e ala i le molimau, pe 120, pe 240 po o le a lava le taimi e tuuina atu ia te oe, pe afai tou te tausisi lava na o le molimau. Matou te fia iloa po o a ou lagona. E te fiafia moi lava i le galuega? O e fiafia i le galuega? E te alofa i le Alii? O e fiafia i le avea o oe ma se tagata o le Ekalesia?

. . . Aua e te saofai iina i le tou sau-niga anapogi ma e pepelo ia te oe lava ma fai mai, “E matea o le a le tuuina atu nei lau molimau. Ou te matea o le a le fea lena mea i isi nei o tagata ona ua tele ou avanoa sa maua.” Ia e tuuina atu lau molimau. Ma o le tasi le minute ua lava lena umi e tuuina atu ai.

E i ai sau molimau! E tatau ona atiina ae ma sii ae ma faalautele, ioe, o le mea lena o loo e faia. O taimi uma lava e tuu atu ai lau molimau e faapea ona faamalosiaina ai. ■

*Mai le “President Kimball Speaks Out on Testimony,” New Era, Aok. 1981, 4–7; ua faalaugatasia le faamataitiusi tetele.*

# MALAMALAMAAGA



## E mafai faapefea ona tatou lagona le alofa o le Tama Faalelagi mo i tatou uma o Ana fanau?

"O le auauna atu ma le mataalia i isi, e tatau lava ona tatou vaai atu ia i latou mai se vaiga faamatua, e ala atu i fofoga o le Tama Faalelagi. Ona faatoa mafai lea ona tatou amata ona malamalama i le taua moni o se agaga. Ona faatoa mafai lea ona tatou lagonaina le alofa o loo i ai i le Tama Faalelagi mo Ana fanau uma. Ona faatoa mafai lea ona tatou lagonaina le popole tele o le Faaola mo i latou. E le mafai ona tatou faataunuina atoatoa a tatou matafaioi o le feagaiga e faanoanoa faatasi ma ē faanoanoa ma faamafanafana i ē o loo manaomia ona faamafanafanaina, sei vagana ua tatou vaai atu ia i latou e ala i fofoga o le Atua."

Elder Dale G. Renlund o le Korama a Aposetolo e Toasefululu, "E Ala i Fofoga o le Atua," *Liahona*, Nov. 2015, 94.

# E I Ai Foi i le Lomiga Lenei

## MO TALAVOU MATUTUA



### Siamupini mo le **Sapati**

i.50

Sa tatau ona matou filifili i le va o le tausia o le paia o le aso Sapati ma le taumafai ia manumalo i se suega siamupini i le lakapi a le atunu e faasaga i o matou fili. I le faaiuga, e tele atu mea na matou manumalo ai nai lo le mea sa matou mafaufauina.

## MO LE AUTALAVOU

O Le

### VAEGA AUPITO FAIGATA i.52 o le Avea ma se FAIFEAUTALAI

O sauniuniga mo se misiona e tele atu lona uiga nai lo na o le suesue o tusitusiga paia. O lona uiga foi, o le aoao i auala e galulue ai ma soa, fetaiai ai ma le teenaina, ma ia iloa e le lelei le ai o aisa kulimi mo le malutaeao, aiga i le aoauli ma le aiga i le afiafi!



## MO TAMAITI



### O le Paga Suesue a Ionatana

i.68

Sa ese le fiafia o ionatana e avea ma paga suesue a lona tuafafine mo ni nai aso. Ae o le a le mea o le a ia faia pe a toe foi o ia i lana misiona?